

**BOLAJON,  
BOLAJONIM**



Syamal Myrzua

**PO'LAT MO'MIN**

**BOLAJON,  
BOLAJONIM**



**"CHO'LTON" NASHRIYOTI  
TOSHKENT**

84(5Y)6  
M 80

**Mo'min, Po'lat.**

Bolajon, Bolajonim: She'rlar. - T.: «Cho'lpon», 2003. -160 b.

*Bolajonlarning sevimli ijodkori, O'zbekiston xalq shoiri Po'lat Mo'minning kitoblari kirib bormagan xonadon, she'r va qo'shiqlarini o'qib, eshitmagan o'quvchi bo'lmasa kerak. Ardoqli shoirimizning ilk kitobi nashrdan chiqqaniga ellik yildan oshdi. Mana bir necha o'n yillardiki qalbi qaynoq shoir kichkintoylar uchun hormay-tolmay ijod qilib kelmoqda.*

*«Bolajon, Bolajonim» to'plamiga kirgan quvnoq va ravon she'r, ertak hamda topishmoqlar shoiringizning siz bolajonlarga ko'ngil tuhfasidir.*

**BBK 84(5Y)6**

M  $\frac{4803620202 \text{ - } 55}{360 \text{ (04) } - 2003}$  2004-y.

ISBN 5-8250-0831-4

© “Cho'lpon” nashriyoti, 2004-y.

# **CHIROY QO'SHAY O'LKAMGA**

**(SHE'RLAR)**





\* \* \*

*Ey, aziz kitobxonim,  
Yetgancha kuch-imkonim,  
Sizga she'rdasta tuzdim,  
Qarzimni bir oz uzdim.  
Qolmayin deb ginada,  
Quduq qazdim ignada.*

*To 'qidim qo 'shiq, ertak,  
Bular emasdir ermak.  
Erinmay o 'qib chiqing,  
Yaxshisi, mag'zin chaqing.  
Eslab yoursangiz uni,  
Kerak bo 'lar bir kuni...*

*Etmang deb aslo taqlid,  
Yomonni qildim tanqid.  
Ko 'pingizni maqtadim,  
Yaxshilikdir maqsadim.*

*Siz bergan zavqdan toshdim,  
Kitobim— ko 'nglim ochdim.*

## BOLAJON, BOLAJONIM

Ey, so‘zlari biyronim,  
Chopqillagan jiyronim.  
Erkatoym, polvonim,  
Bolajon, Bolajonim.

Sizlar lola yonoqsiz,  
Chin ko‘ngildan inoqsiz.  
Bulbulu qarqunoqsiz,  
Bolajon, Bolajonim.

Siz kelajak egasi,  
Baxt bog‘imiz mevasi.  
Chamanlarning jilvasi,  
Bolajon, Bolajonim.

Tezda o‘sib, uningiz,  
Shod o‘tsin har kuningiz.  
Kulib tursin gulingiz,  
Bolajon, Bolajonim.

Chopqirligingiz.  
Bilag‘on va biyron  
Topqirligingiz.  
Gulzorlar bo‘yida  
Kezishlaringiz,  
Goh charchab, toliqib  
Mizg‘ishlaringiz.  
Ming yayrab ketaman  
Aytsangiz qo‘shiq,  
Traqaydi bir zumda  
Tashvishu to‘sinq.  
Bo‘lmasin hech sizning  
Kamu ko‘stingiz,  
Ko‘paysin har yerda  
Yaqin do‘stingiz.  
Olamni yangratsin  
Kulgilaringiz.  
Gullar yozaversin  
Orzularingiz.

Bolalar, sizlarga  
Kelar havasim.

## KELTIRASIZ HAVASIM

Bolalar, sizlarga  
Aytayin rostim,  
Har qachon, har yerda  
Kelar havasim.  
Yoqadi qiy-chuvlar,  
Shovqinlaringiz,  
Sezilar yurakda  
To‘lqinlaringiz.  
Havasim keltirar

## BIRINCHILIK TILAYMAN

Qani, aytib bering-chi,  
Ne degani birinchi?  
Eh, mazmuni qandayin,  
Yoqar qaymoq, qanddayin.  
Muallimni ko‘rganda  
Salom bergen birinchi.  
Senga yana oshadi  
Dilda mehri, sevinchi.  
Birinchilar — bilag‘on,



Fikri bo‘lar ilag‘on.  
Doim hushyor yurishar,  
Ko‘p ishga ulgurishar.  
Birinchilik xo‘p maza —  
Tarqar yaxshi ovoza.  
Yashasin birinchilik,  
Barcha uni biladi.  
Maktab, uyda, ko‘chada  
Hamma hurmat qiladi.  
Esda tutgil, odatda,  
Birinchi bo‘l odobda.  
Esingda bo‘lsin, o‘rtoq,  
Bo‘lma birinchi qoloq!  
Birinchi to‘polonchi,  
Va birinchi yolg‘onchi...  
Bolajonlar, sizlarga  
Birinchilik tilayman.  
Kim birinchi olsa “besh”,  
Birinchi tabriklayman.

### **CHIROY QO‘SHAY O‘LKAMGA**

Tongda turib kuzataman  
Tabiatni,  
Tabiatda uchrataman  
Ming san’atni:  
  
Borliq salom berar bir-bir  
Tong, oftobga.  
Quyosh iliq nurin sochar  
Chor-atrofga.  
  
Nur yugurar tog‘lar oshib,  
Oshib bog‘lar.

Havo toza, rohatijon,  
Ajib chog‘lar.  
  
Kecha gulda ko‘rgan edim  
Uchta g‘uncha,  
Bitta g‘uncha ochilibdi,  
Go‘zal shuncha...

Qushlar esa in quradi  
Chug‘urlashib,  
Zavqim qaynar, fikrim yana  
Chuqurlashib.

Eh, qandayin jozibador  
Ona o‘lkam,  
Tez ulg‘ayib yana chiroy  
Qo‘shay men ham.

### **SAN’AT G‘UNCHALARI**

San’at bog‘larining  
Mevasi sizlar.  
Nurli ertamizning  
Egasi sizlar.  
Sizlar kuylasangiz,  
Lol qolar bulbul.  
Sizlar yasansangiz,  
G‘uncha ochar gul.  
San’atingiz ko‘rib  
Xalqim chamalar:  
Sizlar Halimayu,  
Mukarramalar.  
Sizlar o‘lmaydigan  
Tursunoy, Nurxon...

Siz Olim Xo'jayev,  
Siz Shukur Burhon.  
Sizlar Soraxonim,  
Sizlar Sanobar,  
Sizga tahsin aytar  
Barcha barobar.  
Sizni ko'rib turib,  
Kim bo'lmaydi shod.  
Yoningizda turar  
Navoiy, Behzod.  
Baxtlilar baxtlisi  
Sizning o'zingiz,  
San'at sahnamizning  
Guli bo'lingiz.  
San'at chamanida  
Siz hozir g'uncha,  
San'atda nur soching,  
Quyoshcha — kuncha.

## TONG HAVOSI

Tongdagi havo  
Harir — pokiza.  
Bormi unda yo  
Sehru mo'jiza?  
Tong havosining  
Yo'qdir g'ubori.  
Taralgay gulning  
Hidi — ifori.

Turaman barvaqt  
Shimirmoq uchun.  
Ishga yengimni  
Shimarmoq uchun.  
Gulbargchalarda

Yaltirar shabnam.  
Boqib qolaman  
Hayratda bir dam.

Atrof shunchalar  
Yoqimtoy — iliq.  
Esar shabboda  
Biram serqiliq.

Tonggi havoga  
To'lganda o'pkam,  
Yanada go'zal  
Ko'rinar o'lkam.

Tanga singadi  
Tongdagi havo.  
Malham singari  
Toza — musaffo.  
Ming bor tasanno,  
Ey, tonggi havo!

## BOG'CHABOBO

Bobom borlar, har kuni deng  
Qatnaydilar bog'chaga.  
Bobomlarning bu ishlari  
Qiziq emish boshqaga.  
Bobomlarning tengqurlari  
Hazillashar, tegishar,  
— Katta bo'lib qoldingmi-ey,  
Bog'chabobo,  
— deyishar, —  
Beparvolik qilma tag'in  
Bu keksalik fasliga,  
Sal ehtiyot bo'lib yurgin



Borib qolma yasliga!  
 Bobomlarning soddaligin  
 Bola deysiz baayni.  
 Besh yosh ukam Hamdam bilan  
 Juda yaqin og‘ayni.  
 Yuvinishar, choy ichishar  
 Erta-sahar turishib.  
 Ahyon-ahyon xiyolgina  
 Qolishadi urishib.  
 Qarasangiz ularga-chi,  
 Yana bir zum o‘tmayoq,  
 Hazillashib kulishadi,  
 Bo‘lishadi chin o‘rtoq.  
 Har tong bog‘cha borishadi  
 Bir-birini yetaklab.  
 Yo‘l-yo‘lakay bobojonim  
 Aytib berar ertaklar.  
 Bog‘chadagi bolalar ham  
 O‘rganishgan bobomga.  
 Tarbiyachi opalar-chi,  
 Chiqishadi salomga.  
 Hamdamjонни topshirarlar  
 Bobom bog‘cha opaga.  
 Qaytsalar-da izarliga  
 O‘xshamaslar xafaga.  
 Odatlari juda qat’iy:  
 Kechki soat oltida, —  
 Tayyor bo‘lib turadilar  
 Har kun bog‘cha oldida.

## HURMATGA HURMAT

Bir bolakay ketardi  
 Tramvayda o‘tirib.  
 Qarab qo‘yar atrofga

Boshin asta o‘girib.  
 Nariroqda bir yigit —  
 Turar qo‘lda papkasi.  
 Yoshiga qaraganda  
 Go‘yo katta akasi.  
 — O‘tiring, — deb bolakay  
 Hurmat-la joy bo‘shatdi.  
 Bolakayga yigit ham  
 Chin ehtirom ko‘rsatdi.  
 Maza qilib ketar u  
 O‘rindiqqa o‘tirib.  
 Nariroqqa qarasa,  
 Boshin xiyol o‘girib,  
 Xayol surib turardi  
 O‘rtा yashar bir odam.  
 Yigit uni kuzatib,  
 Qarab qo‘yar dam-badam.  
 Yigit o‘sha odamga  
 Dik turib bo‘shatdi joy.  
 Boshqa o‘tirganlar ham  
 Mamnun edi, hoynahoy.  
 Tramvaylar ketma-ket  
 Manzil sari yo‘rtardi.  
 -Turfa xil mashinalar  
 Quvalashib o‘tardi.  
 To‘xtaganda tramvay,  
 Chiqib qoldi bir bobo.  
 O‘tirgan odam dedi:  
 — Qani bobo, marhabo!



Yana bir to'xtaganda  
Chiqdi bolalik ayol.  
Qo'lidagi go'dagi  
Bir yoshlarda ehtimol.

Bobo ham qiziq ekan  
O'tkazmasdan fursatni, —  
U bolalik ayolga  
Kuldi-da, joy ko'rsatdi.

Ayol ham hushyor ekan  
Bu holatni tuzatdi:  
O'g'ilchasin boboga  
Hurmat bilan uzatdi.

Tramvayda o'tgan kun  
Men shularni kuzatdim.

### BUVI BILAN NABIRALAR

Buvisini borib ko'rар  
Nabiralar,  
Ular ancha — Gulnor,  
Dildor,  
Sapuralar...  
O'z holicha sovg'alarin  
Olib qo'lga,  
Apil-tapil tushadilar  
Shoshib yo'lga.  
Xadichani opichlaydi  
Opajoni,  
Dildor esa yetaklaydi  
Marhaboni.  
Keng ko'chaning bir tomoni

To'lib ketar.  
Chaqqonvoylar g'izillashar,  
Oldin yetar.  
Buvijonin ko'rib qolib  
Chopishadi,  
Go'yo ular yo'qotganin  
Topishadi.  
Kichkintoylar qilishadi  
Achom-achom.  
Buvijoni ulashadi  
Sovg'a-salom.  
Bijildoqlar savollarni  
Qalashtirar,  
Nabiralar nomin buvi  
Adashtirar.  
Keyin biri aytib qolsa  
O'z nomini,  
Boshqalari boshlab ketar  
Davomini.  
Kattarog'i so'rар buvi  
Ahvolini,  
Gulnor o'rар oppoq doka —  
Ro'molini.  
Qaysi biri ko'zoynagin  
Olib taqar,  
Opasining urishganin  
Kimdir chaqar.  
Gir aylanib buvijonni  
O'rashadi,  
Ertak aytib bering, deya  
So'rashadi.  
Kechga qadar hol-joniga  
Qo'yishmaydi.  
Buvijonin mehriga hech  
To'yishmaydi.

## **QUSHLAR HAQI**

Tog‘ bag‘rida — qishloqda  
Yashar bir bog‘bon.  
Bog‘bonlarning ichida  
Fozil, bilimdon.  
Bog‘ida mevalarning  
Bor turfa xili.  
Barcha hayron qolarli,  
Mo‘ldir hosili.  
Oralamas bog‘iga  
Biron hasharot.  
Bunda bordir  
Qanday sir,  
Qanday mahorat?  
Qushlarga in qurgan u  
Talay daraxtga.  
Bog‘bon chindan erishgan  
Shu yo‘lda baxtga.  
Mevalarning posboni  
Ana shu qushlar,  
Hasharotlar zotini  
Qirishni xushlar.  
Mehnat qildingiz, deya  
Sizlar butun yoz,  
Etar ekan kuzakda  
Yanada e’zoz,  
Qoldirarkan daraxtda  
Qushlar haqini.  
(Qarang bog‘bon tadbirin,  
Mehru aqlini).  
Hasharotlar oz qolgan  
Kuzda, atrofda.  
Yerlar qolgan mevani  
Yayrab oftobda.

Bog‘da qushlar sayrashi —  
Chug‘ur-chug‘uri:  
Bog‘bonga tashakkurning  
Chuqur-chuquri...  
Bog‘bon bilan barobar  
Xizmatda qushlar.  
Bog‘bon bobo tadbirin  
Eshitgan xushlar.

## **XAT BORDI QIZIDAN**

Tabassumning adasi  
Ketuvdi uzoq yurtga.  
Yozning issiq pallasi —  
Dam olishga — kurort<sup>1</sup>ga.  
Bir xat bordi izidan —  
Tabassumxon qizidan.  
Xatmisan, ajoyib xat,  
O‘qigan qilar rohat.  
“Sog‘inchli salom” xati  
Yozishning husnixati, —  
Deyishgani chin ekan,  
Shunday bo‘lar xat degan.  
Dam oling, deb bermalol,  
So‘rabdi holu ahvol.  
Hatto obu havodan,  
Va so‘rabdi davodan,  
Semirgan, ozganidan,  
Nimalar yozganidan,  
Ko‘nglini bilib-bilib,  
Uzoqni yaqin qilib,  
Bildiribdi mehrnini,  
Ko‘rsatibdi zehnnini.

---

<sup>1</sup> Kurort — dam olish maskani.

Har gapida bor tartib,  
Katta-kichikdan tortib —  
Xabar beribdi bir-bir,  
Xati naq “besh”ga arzir.  
Sirayam yo‘q xatosi,  
Juda yoqar ma’nosi.  
Hammamiz xush, sog’, debdi,  
Ko‘nglimiz ham chog’, debdi.  
Barchadan salom, debdi,  
Achom-achalom, debdi.  
Tez-tez yozib turing xat,  
Deb beribdi maslahat.  
Dadasining izidan,  
Xat boradi qizidan.  
Xatmisan, ajoyib xat,  
O‘rgatganimga rahmat!

### SHOIRLARGA YIGIRMA QOIDA

Kimki bo‘lmoqchi shoir,  
Gapim bor unga doir.  
She‘r yozish oliv niyat,  
Kerakdir qobiliyat!  
Xamirturush bo‘lmasa,  
Nonda bo‘lmaydi maza.

Ustoz top eng avvalo,  
Ishlarining bo‘lar a’lo.  
So‘zlarni so‘zga bog‘la,  
O‘quvchi ko‘nglin chog‘la!  
Qofiyang bo‘lsin to‘liq,  
(Bu ko‘plarga taalluq).  
She‘rni yozgın qiziqroq,  
Buzilmasin hech turoq.

Iste’dod bo‘lsa senda,  
Yozma bir xil vaznda.  
Istiura va majoz —  
She’rga mag‘izu jihoz.  
She’rni she’rga qo‘shmagin,  
So‘z jilovin ushlagin.  
Doim yangi so‘z izla,  
Aslo bo‘lmaysan izza.  
Agarda qilsang taqlid,  
Ko‘ringan qilar tanqid.  
She‘rning bo‘lsin yakuni,  
Oldindan o‘yla buni.  
Dehqon qilganday shudgor,  
Ko‘chirgin takror-takror.  
Qayerda savol, vergul,  
Jiddiy e’tibor bergil!  
Boshqalardan eng oldin  
Uni o‘zing yod olgin.  
Mavzu hayotiy bo‘lsin,  
Ishingdan ko‘ngling to‘lsin.  
SHOIRman deb men yakka  
Uraverma ko‘krakka!  
Go‘yo qilganday tama,  
Hech o‘zingni maqtama.

Bolalar ichida bo‘l,  
Ilhomga ochilar yo‘l.  
Qolibdi yana bir gap:  
Shoirlikka yo‘q maktab.  
Uni o‘zing ochasan,  
Cho‘qqilardan oshasan.  
Sevinar Quddus bobong,  
Elga shirin so‘z bobong.  
Shod bo‘ladi holbuki,  
Quddus boboning ruhi...

## **SENTABR SEVINCHLARI**

Sentabrning sevinchlari  
Yuragimga to'ldilar.  
Yurganimda,  
Turganimda  
Menga hamroh bo'ldilar.

Sentabrning sevinchlarin  
Har qadamda sezdim men.  
Bolaligim  
Davronida  
Yana bir bor kezdim men.

Sentabrning sevinchlari  
Bamisoli kelajak.  
Chamanlarda  
Ochilganday  
Turfa rangda gul-chechak.

Sentabrning sevinchiga  
Quvonchlarim qorayin.  
Guldastalar  
Ko'targancha  
Maktab sari borayin.

Qishin, yozin pishib turgan  
U — tinchlikning mevasi.  
Hamma har vaqt  
Baham ko'rgan  
U — tenglikning mevasi.

Bu sevinchlar,  
Vatan bergen  
Saodatdan yaralgan.

Bolalikning olamiga  
Shuur bo'lib taralgan.

Uni ko'rgach,  
Yayrab ketdim,  
Bolalarning yuzida.  
Ko'zlarida,  
O'zlarida,  
Qo'shiqlari, so'zida.

Sentabrning sevinchlarin  
Qonib ichgan bolalar,  
Tongotarda,  
Qator — safda  
Maktab sari borarlar.

Sentabrning sevinchiga  
Ayting ming bor tahsinlar.  
Odam,  
Olam bolalari  
Shu sevinchda boqsinlar!

## **BIRINCHI QO'NG'IROQ**

Eh, bugun bayramdir,  
Barcha teng, xurramdir,  
Birinchi qo'ng'iroq  
Qaranglar,  
Jaranglar  
Ovozi eng yangroq!  
Barchani chaqirar,  
Har tomon hayqirar;  
Hushyorlar anglashar,  
Qoloqlar yanglishar,  
Maktablar chamasi —

Bilimlar kemasi.  
Safarga otlanar,  
Ko'rganlar shodlanar.  
Direktor — kapitan  
Bol tomor gapidan.  
Eh, hamma yasangan,  
Ustozlar yashargan.  
Bolalar havasda,  
Ko'targan guldasta.  
Chin do'stlar topishar,  
Sinfga chopishar.  
Tor kelar yo'laklar,  
Zavqlanar yuraklar.  
Sinf — dars beshigi  
Ochilar eshigi.  
Partalar yonma-yon  
Gijinglar toysimon.  
Qulay va ozoda  
O'tirish maza-da!  
Qo'ng'iroq jarangi,  
Ohangi eng yangi.  
Bilimlar yurtiga —  
Qani, tez yurdik-a,  
Deganday tuyular,  
Qadamlar qo'yilar.  
Eng quvnoq,  
Eng yangroq,  
Birinchi qo'ng'iroq!

## **YAXSHILIKKA TAYYORLAN**

Har bir ishga  
Eng avvalo  
Tayyorgarlik qilinadi.

Uning qanday  
Bitganligi  
Tayyorlikdan bilinadi.  
  
Tayyorlanmay  
Boshlasang ish  
Sira-sira kelmas o'ngi.  
Undan o'zing  
Xijolatsan,  
Boshqaning ham  
to'lmas ko'ngli.  
  
Ekmoq bo'lsang,  
Agar ko'chat  
Pishitasan avval yerni.  
Kuch-g'ayrating  
Ko'rsatasan  
Peshonadan to'kib terni.  
Bormoq bo'lsang  
Do'sting tomon,  
Tayyorlaysan  
sovg'a- salom.  
  
O'ylab qo'ygan  
So'zlarining ko'p,  
Shirin suhbat  
bo'lmas tamom.  
  
Kelajakka  
Otlangansan,  
Hunar, fanga erursan shay.  
O'z istaging  
Yo'llarida  
Tayyorgarlik ko'r  
og'ishmay.



Har qadamda  
Tayyorlangin,  
Yaxshilikka, omonlikka.  
Faqat-faqat  
Tayyorlanma  
Qabihlikka, yomonlikka!

Virus va mikrob  
Berolmaydi tob.  
Kuyib bo'lar kul,  
Yo'qolar butkul.  
Har bitta bola  
Qilib hafsala,  
Kunda toblansa,  
Eh, qanday maza!  
Tani chiniqar,  
Fikri tiniqar.

### OFTOB ZO'R TABIB

Qilayin ta'rif,  
Oftob zo'r tabib.  
U barcha joyda  
Hammaga foyda.  
Bilsangiz agar  
Go'yo sehrgar.  
O'simlik uning  
Nurin shimirar.  
O'sar, semirar.  
Oftob hissasi —  
Ko'pdir, qisqasi.  
Uchrasa betob  
Davolar oftob.  
Topib turli yo'l  
Qiladi ukol.  
Nurdan ignasi,  
Eng ingichkasi.  
Og'ritmas sira,  
Mohir hamshira.  
Dorisi qiziq,  
Dorisi issiq.  
Vitamini nur,  
Maza va huzur.  
Barcha hujayra  
Oladi bahra.

Hech bir kasallik,  
Xoh dangasalik,  
Qilolmas hamla,  
Biladi hamma.

### BAHOR KELAVERADI

Bahor kelaveradi,  
Takror kelaveradi.  
Gullar kulaveradi,  
Dillar kulaveradi.  
Sovuqlarni quvadi,  
Eritadi muzlarni.  
Tozalaydi, yuvadi —  
Dalalarni — tuzlarni.  
Bir-biriga o'xshamay,  
Hech qayerda to'xtamay,  
Bahor kelaveradi.  
Shaxdam yelaveradi.  
Fasllarning chechani,  
Tenglar kunduz-kechani.  
Dalalarda ishboshi,  
Yoqimtoydir quyoshi.  
Butun borliq uyg'onib,

Daryo, ko'llar to'lg'anib,  
 Yashil kiyib adirlar,  
 Gullar sochar atirlar.  
 Gullarga gul qo'shami,  
 Qo'shiq bo'lib jo'shami.  
 Dehqon yerga egilar,  
 Ko'chat, urug' ekilar.  
 Bahor tansiq fursatdir,  
 G'ayratingni ko'rsat, der.  
 Uchrab qolsa yalqov — bo'sh,  
 Undaylarni ko'rmas xush.  
 Do'stlar do'stni tabriklab,  
 Istaklarin ta'kidlab,  
 Kutadilar bahorni,  
 Bahorni — bebahoni.  
 Bahor aslo tolmaydi,  
 Hech kim to'xtatolmaydi.  
 Gullar sochaveradi,  
 Bahring ochaveradi.  
 Mehnat qilgan teradi.  
 Shamol bo'lib yeladi,  
 Bayram olib keladi,  
 Bahordayin diyorga  
 Bahor kelaveradi.  
 Peshvoz chiqing bahorga,  
 Takror kelaveradi,  
 Bahor kelaveradi,  
 Bahor kelaveradi.

## KO'KLAM SHAMOLI

Ko'klam kelganda shamol  
 Yana ishga tushadi.  
 Yuragida zavqlari  
 Iliqlashib jo'shami.

Yenglarini shimarib,  
 Har tomonga yugurar.  
 Chaqqonligi sababli  
 Ko'p ishlarga ulgurar.  
 Namliklarni eng avval  
 Quritadi, selpiydi.  
 Ishlab terga botganni  
 Huzur berib yelpiydi.  
 Daraxtlarni uyg'otib  
 Maromida tebratar.  
 Chiniqqin deb,  
 O'sgin deb —  
 Talay mashqlar o'rgatar.

Ochilgan gul uforin  
 Dimog'larga yetkazar.  
 Dillardagi g'uborni  
 Yengillatar —  
 Ketkazar.

Bog'bon bobo soqolin  
 Bilintirmay silaydi.  
 Bog'da mevalariga  
 Mo'l-ko'l hosil tilaydi.

Kezadi hech timmasdan  
 Qir, adirlar bag'rini.  
 Keltirgan sof havosi  
 Ochar odam bahrini.

Goho quyosh nuriga  
 Aralashib ketadi.  
 Sho'x boladay ba'zida  
 Sal adashib ketadi.



Shamol olma shoxida  
O'ynab gulbargchasini,  
Qanchasi,  
Qanchasini —  
Go'yo tangachasini,  
Himmat —  
Mehnatingga deb  
Boshlar uzra sochadi.  
Erkalanib,  
Surkalib  
Birdan yana qochadi.  
Bu serg'ayrat shamolning  
O'xshaydi aqli borga,  
Xizmat qilar elimga,  
Xizmat qilar bahorga.

## **YAXSHILIKKA OG'DIRDIM**

Bir yomon bolaga  
Do'st bo'lib qoldim.  
Ba'zilar hayratda —  
Qolishdi oldin.  
“Voy, nega o'ziga —  
Uni ko'rni ep”.  
Achinib-achinib  
So'zlashar hadeb.  
Ularning tashvishi —  
To'g'ri, o'rnida,  
Qashqasi bor edi  
Qanshar, burnida.  
O'rgandim men uning  
Ko'nglin ohista.  
Bechora odobda  
Ekan ko'p xasta.

Ehtimol men unga  
Yoqqanday bo'ldim.  
Do'stlik mehri bilan  
Boqqanday bo'ldim.  
Birga ketib yo'lda  
Otmoq bo'lar tosh,  
Qo'y, unday qilma, deb  
Qimirlatsam bosh, —  
Toshini tashlardi,  
O'sha zahoti.  
Yo'lga tushib borar  
Xulqi — odati.  
Kinolarga tushdik,  
Birga qildik dars.  
Shaxmatlar o'ynadik,  
Goh boshladik bahs.  
Kundan-kun halimday  
Yumshab bordi u.  
Yaxshi bolalarga  
O'xhab bordi u.  
Bir kuni qildik biz  
Qilichu to'qmoq,  
Qasamyod ayladik  
Bo'lishga o'rtoq.  
Aslida emasdi  
Yomon yoki goj.  
Faqat yaxshi gapga  
Ekan u muhtoj.  
Uylariga borsam,  
Xursand oyisi.  
Mehmon qilar rosa,  
Bor-da boisi.  
Yaxshi sifatlari  
Ko'p-da o'zida:  
Yolg'on gapirmas hech,



Turar so'zida.  
Yog'day yoqar unga  
Shirin maqtovim.  
O'ngidan kelganday  
Mo'ljalim — ovim.  
Yaxshilik tomonga  
Axir og'dirdim.  
Qilgan xizmatim shu:  
Ko'pga yoqtirdim.

**O'YNAB KELSAM,  
O'YLAB KELSAM...**

Xonamda ko'p  
O'tirmasdan,  
Hadeb yozib,  
O'chirmasdan,  
O'z-o'zimdan  
Bo'lmay xunob,  
O'z-o'zimga  
Bermay azob,  
O'ynab kelsam.  
Chiniqaman,  
O'ylab kelsam  
Tiniqaman.  
Asablarim  
Yaxshilanar,  
Ruh-ta'blarim  
Yangilanar.  
Ko'zim nuri  
Ravshanlashar,  
Nafaslarim  
Ravonlashar.  
Sho'xligimday  
Sharsharalar,

Soy sohili,  
Keng daralar.  
Gullar ko'rki  
Ko'zga davo,  
Yog'day yoqar  
Toza havo.  
Kuch qo'shilar  
Yurishimdan,  
Fikrim o'sar  
Ko'rishimdan.  
Charchoqlarim  
Chiqib ketar.  
Chala darsim  
Tezda bitar,  
O'ynab kelsam,  
O'ylab kelsam.

**SIZ BIZNI DEYSIZ,  
BIZ SIZNI DEYMIZ**

Sizlar ota-onamiz,  
Bizlar-chi farzand.  
Rosa yayrab ketasiz,  
Biz bo'lsak xursand.  
Yetkazmoqni istaysiz  
Bizni voyaga.  
Oftob o'tsa tortasiz  
Salqin-soyaga.

Gulni o'stirgan misol,  
Bizni ayaysiz.  
Bizning baxtimiz uchun  
Ishlab, yashaysiz.  
Ko'rinxay qolsak agar,  
Zumda izlaysiz.



Ovutib erkalaysiz,  
Goho sizlaysiz.

Bardoshlisiz shunchalar,  
Ota-onalar.  
Eshitasiz bizni deb  
Ba'zan ta'nalar.

Sizni bilib-bilmasdan  
Ranjitamiz goh.  
Payqamaymiz ba'zida  
Chekkaningiz oh...

Oramizda uchraydi  
Nodonlar hanuz.  
Qadringizni bilishga  
Ochsaydilar ko'z.

Chaqiraman ularni  
Sizni sevishga.  
G'amxo'rligu mehringiz  
Dildan sezishga.

Hamma joyda, har qachon  
Siz bizni deysiz.  
Ishoninglar, farzandlar —  
Biz sizni deymiz.

## XO'P MAZA — O'N LAHZA

(*Katta tanaffus*)

Qor yog'ar — bo'ralar,  
Sinfdan  
Siniqqan  
Bolalar mo'ralar.

Boshlandi tanaffus,  
Kech qolgan der afsus.  
Darsidan charchagan,  
O'yinga chanqagan —  
Bolalar yugurar,  
Ketma-ket ulgurar.  
Maktabning maydoni,  
Chiniqish makoni.  
Qor yumshoq poyandoz,  
Juda soz, juda soz.  
Qiy-chuvlar hech tinmas  
Qo'r quoqlar ko'rinmas.

Bir zumda haryonga  
Kattakon maydonga —  
To'kilgan yong'oqday,  
Ochilgan bodroqday,  
Bolalar chopishdi.  
Sheriklar topishdi.  
Go'yoki changishib,  
Sovuqni yengishib,  
Quvlashar,  
Tutolmas.  
Zuvlashar,  
Yetolmas.  
O'ynashar, to'yishmas.  
Bir-birin qo'yishmas.  
Kim chaqqon,  
O'zag'on?  
Juda ko'p epchillar,  
Yerda qor g'irchillar.  
Irg'ishlar shovvozlar,  
Semizlar halloslar...  
Qorlarga yumalar,  
Kimlar sal yumdalar.



Urishar, yarashar.  
 Hazillar yarashar.  
 Yayrashdi bir jahon,  
 Yurishdi tanda qon.  
 Siniqqan chiniqdi,  
 Fikrlar tiniqdi.  
 Tanaffus — o'n lahza,  
 Zab maza, zab maza.  
 Qor hamon bo'ralar,  
 Ko'ringlar, bolalar —  
 G'ayratu shashtini.  
 Yurishar,  
 Surishar  
 Tanaffus gashtini.  
 Eh, afsus, eh, afsus,  
 Tugadi tanaffus.  
 Qo'ng'iroq chalindi:  
 Darsga — deb "yalindi".  
 Boshlandi yana dars.  
 Yana "besh", yana bahs.

## MOMIQ QOR

Yog'adir momiq qor,  
 Beg'ubor, beg'ubor.  
 Ham oppoq,  
 Ham yumshoq.  
 Tutaman kaftimni,  
 Yuzimni, aftimni,  
 Ohista silaydi  
 Va sog'liq tilaydi.  
 Qarang, qor parchalar  
 Yoqimtoy qanchalar.  
 Yozaman qulochim  
 Misoli sor lochin.

Haryonga chopaman,  
 Olam zavq topaman.  
 Qor yog'ar elanib,  
 Oq rangga belanib, —  
 Dalalar yastanib,  
 O'zicha yasanib,  
 Ko'rinar keng borliq  
 Oq qorlik  
 Ohorlik.  
 Bug'doyzor niholin  
 Ko'rpasi misoli  
 Irog'-u yovuqda  
 Saqlaydi sovuqdan.  
 O'ylasam gohida,  
 Daraxtlar shoxiga —  
 Oq qushlar qo'nganday,  
 Go'zaldir, oh, qanday...  
 Yashang deb bezarar  
 Havo ham tozarar.  
 Oppoq qor yog'adir  
 Barchaga yoqadir.  
 Maqtasam kiroyi —  
 Qor qishning chiroyi,  
 Gapimning ochig'i:  
 Qor — yerning ozig'i.  
 Asli mo'l hosildir,  
 Murodlar hosildir.  
 Yog'adir oppoq qor,  
 Hammayoq oq gulzor.

## OPPOQ QISH-EY...

Oppoq qish-ey, oppoq qish,  
 Eh, qorlari yumshoq qish.  
 Chana, konki o'ynatgan,



Quvnoq qish-ey,  
quvnoq qish.  
Dam olmoqda dalalar,  
Keng vodiylar, daralar.  
Fasl gashti atrofga  
Qo'shiq bo'lib taralar.  
Tarnovlarda sumalak,  
Ko'llar oyna — yaxmalak.  
Ayting-ayting bo'lmasin  
Hech kim yo'lda charxpalak.  
Sovuq hazillasharmi,  
Yuzlar jizillasharmi,  
Goho-goho uchragan  
Qo'rkoqni izlasharmi?  
Oppoq qor sut singari  
Ona Yerga singadi.  
Oftob kelib yaqinroq  
Qishning qahrin yengadi.  
Oppoq qish-ey, oppoq qish,  
Tarqoq qish-ey, qo'rkoq qish.

### **QUSHLAR ERTA UYG'ONAR**

Har qachon,  
Hamma yerda  
Qushlar uyg'onar erta.  
Shoxdan shoxga sakrashar,  
Oldin-keyin sayrashar.  
Bunga odat qilishgan.  
Foydasini bilishgan.  
Nafas olishib chuqur,  
Qilishar chug'ur-chug'ur.  
Yurishadi qonlari,  
Orom olar jonlari.

Sof havo dengiz misol —  
Sho'ng'ishadi bemalol.  
O'z tilida so'zlashar,  
Yaxshilikni ko'zlashar.  
Muhtoj bo'lmay birovg'a  
Otlanishadi ovga.  
Aslida shuning uchun  
Mashq qilib,  
Yig'ib kuchin —  
Hasharotni qirishar.  
Elga xizmat qilishar.  
Qushlarning orasida  
Uchrasa ora-sira —  
Dangasa — landavuri  
Qushchalarning hech biri,  
Qo'shishmaydi qatorga,  
Chiqarishar beorga.  
Qushday uyg'ongan erta  
Sog'lomdir hamma yerda.

### **SUMALAK PISHARDI**

Hovlida tong chog'i —  
Azonda,  
Sumalak pishardi  
Qozonda.  
Qiy-chuvlar chalinar  
Quloqqa.  
To'nkami qalashar  
O'choqqa.  
Sumalak ko'pchilik  
Mehnati,  
Yo'q uning hech kimga  
Minnati.



Kelganlar turar-da  
Navbatda,  
Sumalak kavlaydi  
Albatta.  
Momolar udumi,  
Qisqasi,  
Qo'shilgay hammaning  
Hissasi.  
Shunda u pisharu  
Quyilar.  
Shundan u xo'p shirin  
Tuyular.  
Sumalak suzilar  
Barchaga  
Yetar u qanchadan —  
Qanchaga.  
Mehr olar odamlar —  
Odamdan.  
Sumalak darakdir  
Ko'klamdan.

**ONA MEHR-  
DIYDORI  
RA'NOGA BO'LDI  
DORI**

*(Bo'lgan voqeа)*

Oysisidan Ra'noxon  
Ajralmasdi hech qachon.  
Ishidan qaytgunicha,  
Ra'no tinchimay picha,  
Buvi bilan ammaga,  
Ko'ringuncha hammaga,  
Oysisidan so'zlardi,  
Kelishini ko'zlardi.

Ne bo'ldiyu oyisi  
(Bordir sabab, boisi)  
Ketdi uzoq shaharga,  
Ikki oylik safarga.  
Olti yashar Ra'noxon  
Mo'ltilab, bo'lib hayron,  
Buvisi bilan qoldi.  
Shu ahvolda tez kunda  
Bir oz tinchi yo'qoldi.  
Ko'pchilik hayron bunga,  
Hatto rangi siniqar,  
Ona yo'liga chiqar  
Oyisini izlar u,  
Kiyimlarin silar u.  
Qachon kelarlar oyim?  
Buvisidan-chi, doim,  
Ra'no so'rар jovdirab,  
Buvi ba'zan dovdirab,  
Unutar qilar ishin.  
Bilmas nima deyishin.  
Adasi ham erkalab  
Ishga ketar ertalab.  
Buvi doim girgitton,  
Lekin jajji Ra'noxon  
Kundan-kun ketar ozib,  
Oyisi ham haftada,  
Rosa qilib hafsal  
Yurar edi xat yozib.  
Kunlar o'tardi asta,  
Bo'lib qoldi qiz xasta.  
Shifokor ham, avvalo,  
Qildiyu turli davo,  
Ra'no beri qaytmadi.  
Shifokor ham negadir  
Kasalini aytmadи.



Yoinki tutdimi sir?  
Buvi, adasi hayron,  
Tuzalmas Ra'no hamon.  
Ochilmas ta'b-chiroyi.  
Kunlar o'tib borardi,  
Tunlar o'tib borardi.  
Ra'noning oyijoni,  
Sog'ingan mehriboni  
Kelib qoldi bir kuni...  
Endi ko'rsangiz uni  
Kasallari sochilgan,  
Chiroyi ham ochilgan.  
Ona mehr-diydori  
Ra'noga bo'ldi dori.

Kichiklarga ko'magi,  
Barakalla olganning  
Sof bo'ladi tilagi.  
"Barakalla" so'zida  
Bor derlar bol mazasi.  
Qilgan yaxshiliklarning  
Eng birinchi mevasi.  
"Barakalla" kimda ko'p?  
Qo'l ko'taring shu palla.  
Biz ham unga yana bir —  
Aytamiz: "Barakalla!"

## XUMSON HAVOSI

### KIMDA KO'P "BARAKALLA"?

"Barakalla" degan so'z  
So'zlarning guli — sozi.  
Har bolaning ishini  
O'lchovi — tosh-tarozi.  
"Barakalla" va "balli"  
Teppa-teng "besh" bahoga.  
"Balli"si ko'p bolaning  
Dili o'xshar bahorga.  
"Barakalla"ni olish  
Ham osonu, ham qiyin.  
Eshitganmi uni hech —  
"Ikkichi"yu, betayin?  
Agarda-chi, bo'lsa ko'p  
Kimning barakallasi,  
Juda tiniq ishlaydi —  
Uning aqli-kallasi.  
Kattaga bor salomi,

Xumson havosi  
Dardning shifosi.  
Sof havolarning  
Eng musaffosi —  
Eh, musaffosi,  
Xumson havosi!  
Muncha davosan,  
Sehring bormi yo?  
Gullar bo'yini  
Shimibsan go'yo.  
Mayin yel bo'lib  
Yuzim silaysan,  
Shifokor misol  
Sog'lik tilaysan.  
Topar ming davo  
Yuragim, o'pkam,  
Senga zamindir  
Bu ona o'lkam.  
Mo'jiza borday,  
Yam-yashil dara.



Bunchalar chaman,  
Bunchalar sara.  
Toshdan-toshlarga  
Urilar suvlar.  
Sohilni bezar  
Gullar — suluvlar.  
Go'zalliklardan  
Naq, ko'zlar yonar,  
Qalashar zavqim,  
Ilhom uyg'onar.  
Yayraydi tanam,  
Qonlarim jo'shar,  
Rutubatlarim  
Olisga uchar.  
Ey, sehriy havo,  
Shimiray to'yib!  
To'qiymen qo'shiq  
Mehrimni qo'shib.  
Xumson havosi  
Dardning shifosi.  
Sof musaffosi —  
Eh, musaffosi  
Xumson havosi!

## **YAYLOV ROHATI**

Bepoyon yaylov,  
Ketardim yayov.  
O'tlar xilma-xil,  
Ham Mayoq yashil.  
Oyoqyalangman.  
Alang-jalangman —  
To'ymaydi ko'zim.  
O'zimdan o'zim —

Aytaman qo'shiq,  
Yo'q biror to'siq.  
Yel mayin yelar,  
Eh, uchgim kelar.  
Keng osmon yaqin,  
Havo sal salqin,  
Beg'ubor, toza.  
Rohatu maza.  
Bosaman oyoq —  
Gilamday yumshoq.  
Yengilman qushday,  
Misoli tushday...  
Bepoyon yaylov,  
Kezardim yayov.

## **PISHGANDA GILOS**

Shoxlarda gilos  
Pishibdi qiyg'os.  
G'uj-g'uj bo'lishib,  
Oyday to'lishib.  
Shoxlar oralab,  
Bir-bir mo'ralab,  
Goho chiroqday,  
Milt-milt qilishar.  
Yoqut munchoqday  
Yilt-yilt qilishar.  
Tortar ko'zlarni,  
Qo'zg'ar so'zlarni.  
Shoxlarda gilos —  
Eh, pishmish qiyg'os!  
Totli mazasi,  
Mehnat mevasi.

## BOSVOLDI SO'YDIK

Kecha kechqurun  
Bosvoldi so'y dik.  
O'zi ham kelar  
Kattakon qo'ydek.  
Qarab tursangiz  
Sinchiklab unga,  
O'ralsan go'yo  
Beqasam to'nga.  
Bedapoyaga,  
Ekilgan ekan.  
Palagi toza,  
Yetilgan ekan.  
Yoqimli edi,  
Oh, uning hidi.  
Og'irki, zildek,  
Misoli fildek.  
Rosayam shirin,  
Yorgudek tilni.  
Kim topgan ekan  
Bu navni — xilni?  
— Dori solmagan,  
Dehqonga rahmat! —  
Deya tushirdi  
Qovunxo'r Ahmad.  
Nurmat deganlar  
Pishillab qoldi.  
G'ij shira bo'ldi  
Ko'ylagin oldi.  
— Voy, to'ydim, — dedi  
Yeb ikki tilim,  
Hammadan oldin  
Og'aynim Dolim.  
Kecha kechqurun

Bosvoldi so'y dik.  
Naq, asal ekan,  
Besh bola to'y dik.  
Zo'r-da, bosvoldi,  
Anchasi qoldi.

## OTA-ONA QALBI, OTA-ONA QADRI

Quyosh berar issiqlik, nur,  
Deymiz hayot asosi.  
Ota-onada juda aziz,  
Quyoshga teng bahosi.  
Ota-onada aytgan har so'z  
Farzand uchun qarzu farz.  
Hech qayerda va hech qachon  
Etmang dilin xijil, darz.  
Bizlar uchun ayamaydi  
Ular hatto nonini.  
Ayamaydi, ayamagan  
Hattoki o'z jonini.  
Agar chiqsa issig'imiz,  
Yonib ketar olovday.  
Yuguradi tun-kun demay  
Shifokorga darrovda.  
Yursa-tursa bizni o'ylar,  
Quyosh qoyil ularga.  
Yetkazishga urinadi  
Bizni ilmu hunarga.  
Doim quloq tutish zarur  
Ota-onada qalbiga.  
Dil so'zimiz — yetajakmiz  
Ota-onada qadriga.  
Ularning-chi har doimo  
Ko'ngli bo'lar bolada.



Bizlarning ham yosh ko'nglimiz  
Bo'lsin ota-onada.

## ISHLAGAN CHARCHAYDI

Ishlaganlar tishlaydilar  
Yashaydilar,  
Terlaydilar,  
Ishlab-ishlab  
Charchaydilar.  
Charchashlarga bo'lar ekan  
Turli sabab.  
Ba'zi bir xil charchashlarni  
O'tay sanab:  
Chilangarning ishi og'ir —  
Charchar qo'li.  
Pochtachini charchatmasmi  
Bosgan yo'li?  
Haydovchining ko'zlariga  
Keladi zo'r.  
Kecha-kunduz ko'rish qiyin  
Televizor.  
O'qituvchi dam oladi  
Tanaffus chog'.  
Kimlardadir og'riydi bel,  
Charchar oyoq.  
Paxtakorning ishi tig'iz:  
Ekar, terar.  
Chopiq chog'i paykallarda  
Rosa terlar.  
Do'konlarda sotuvchilar  
Ertayu kech,  
Yuk ko'tarar,  
Yurar, tortar,

Tinmaydi hech.  
Olimlarda charchar asab,  
Toliqar bosh.  
Charchaganday tuyuladi  
Oqshom quyosh...  
Charchashlikning g'alatisi  
Bordir yana:  
Og'zi charchar kimki bo'lsa  
Mahmadona.  
Ochofatning charcharmikan  
Qorni sira?  
Charchamaydi,  
Charchatadi —  
Ba'zi xira...  
Ishlab, terlab charchamoqlik  
Rohat juda.  
Na terlash bor,  
Na charchash bor —  
Bekorchida...

## BAHORNING SHARTI

Shamol yelib,  
Ko'klam kelib,  
Menga qarab so'zlar edi:  
— Agar yaxshi bola bo'lsang,  
Ko'rsatgin-chi menga endi  
Himmatingni,  
Hurmatingni.  
Dedim shunda:  
— Seni maqtay,  
Qo'shig'imda yangratayin.  
Bahor so'rар:  
— Undan keyin?



Dedim shoshib,  
 Qalbim toshib:  
 — Undan keyin  
 Quchog‘ingda,  
 Keng bog‘ingda  
 O‘ynab-o‘ynab gullar teray,  
 Ustozlarga eltib beray.  
 O‘zimdan ham,  
 So‘zimdan ham  
 Bahor ko‘ngli to‘limganday,  
 Menden mamnun  
 bo‘limganday,  
 Takror-takror  
 So‘rar bahor.  
 Bahor shartin,  
 Yurak dardin  
 O‘ylab qoldim.  
 So‘ng esimni yig‘ib oldim:  
 — Senga atab  
 Ko‘chat ekay.  
 Quchog‘ingda ishlab-ishlab,  
 Nihollarni parvarishlab,  
 Hurmatimni  
 Ko‘rsatayin,  
 So‘zim tayin, —  
 Desam birdan bahor kului,  
 Javobimdan mamnun bo‘ldi.

## QUYOSH BILAN SUHBAT

Erta bilan bir o‘g‘lon  
 Quyoshga so‘zlar shodon:  
 — Ostob, Ostob, hoy Ostob,  
 Nuring, mehring behisob.

Erta bilan chiqasan,  
 Zulmatlarni yiqasan,  
 Har tong seni kutaman.  
 Nuringga gul tutaman.  
 Minnatdorman har qachon,  
 Omon bo‘lgan, Quyoshjon.  
 Elimda zo‘r izzating,  
 Olam-olam xizmating.  
 Xoh yaqin, xoh yiroqdan,  
 Xabardorsan haryoqdan.  
 Ko‘nglimda bir xayol bor,  
 Xayol emas, savol bor:  
 Vaqting bo‘lsa, jon Ostob,  
 Savolimga ber javob.  
 Sevinib, mehri toshib,  
 Ostob so‘zlar nur sochib:  
 — Qani so‘ra, bolakay,  
 Javob bergum har qalay.  
 — Yerda qancha bola bor,  
 Barchasimi baxtiyor?  
 — Savoling qiyin ancha,  
 Dunyoda bola qancha,  
 Ochig‘i, bilolmayman,  
 Taxmin ham qilolmayman.  
 Dunyoda har xil bola,  
 Qiz bola, o‘g‘il bola.  
 Oq va qora, sariq tan,  
 Ba‘zilari orig‘ tan,  
 Barchasiyu barchasi  
 Ota-ona erkasi.  
 Hammasi menga boqar.  
 Ba‘zi birlarin baxti  
 Beg‘ubor yoshlik vaqt —  
 Yorishmas nur sochsam ham,  
 Yurti, ko‘ngli to‘la g‘am.



Barchasi baxtin izlar,  
Erkin yurishni istar.  
Dunyoda eng baxtiyor,  
Hammadan ko‘p baxti bor —  
Sen o‘zingsan, bilib ol,  
Ulg‘ay va o‘s bemalol.  
Eng birinchi, ey, o‘g‘lon,  
So‘zim esla har qachon,  
Qadriga yet baxtingning,  
Bo‘sh o‘tkazma vaqtingni.  
Bu javobdan bolajon  
Juda ham bo‘ldi shodon.  
Nur ichra o‘ynab ketdi,  
Chamanzor bo‘ylab ketdi.

### **SHAY BO‘LAYLIK YORDAMGA**

Olma shoxi kundan-kun  
Borar edi egilib,  
Talaygina xom olma  
Yotar edi to‘kilib.

Olma bargi shivirlar:  
Yordam qilgin deganday.  
Ko‘tarishga hosilni —  
Bardam qilgin deganday.

Og‘irlashib borardi  
Olmalari yetilib.  
Sinishiga oz qolgan  
Serhosil shox egilib.

Tushunardi hamma ham  
Ko‘rib ahvol-tarzini.

Ko‘mak berdim zudlikda  
Payqaganday arzini.  
Ayri qo‘ydim avaylab,  
Ko‘tarsin deb qaddini.  
(Olganman-da, dadamdan  
Bunday ishning haddini).

Hosilga mo‘l shoxlari  
Turishardi tebranib.  
Go‘yo rahmat deyishar,  
Yuzlari gul-gul yonib.

Og‘aynilar, olmani —  
Qiyoq qilsam odamga,  
Hosil bo‘lar murodlar  
Shay tursangiz yordamga!

### **BESH BOSHOQDAN SUMALAK**

*(Behzodning hayrati)*

Behzod ismli  
Bitta bolakay,  
Oltinchi sinfga  
O‘tgan har qalay.  
U-chi lagerda  
Yozda oldi dam.  
“Ko‘p narsa bilar  
Ko‘p yursa odam”.  
Deyilgan gapda  
Eh, ma’no ko‘p-da.  
Yoz fasli  
Asli  
Ajoyib kitob.  
Bug‘doyzor qirlar

Qiziq-qiziq bob.  
Ajib manzara,  
Der: “Menga qara”.  
Behzod atrofni,  
Jonli kitobni,  
Qirma-qir osha  
Qildi tomosha.  
Bug‘doy g‘arq pishgan  
Quyosh mavjida.  
G‘allakorlarning  
Ishi avjida.  
Tushgan kunida  
Bug‘doya o‘roq,  
Hasharga chiqdi  
Bir guruh o‘rtoq.  
Sho‘ng‘ishdi ishga  
Ular birlashib.  
Hashar qilishdi  
Rosa terlashib.  
Bug‘doyzor — dala  
Liq to‘la bola.  
Ularni ko‘rib  
Bir bobo keldi.  
Bug‘doyzor qirga  
Uzoq tikildi.  
Yupun yoshligi  
Tushdi esiga,  
Xayolda qaytdi  
Ortga — iziga.  
Bu bug‘doyzorni  
Qadimda bobo —  
Qandayin qilib  
Etganin barpo,  
Xayolga cho‘mib  
So‘zladi asta.

Tingladi uni  
Barcha havasda.  
— Ochig‘in aytsam,  
Oltmisht yil oldin  
Sevinib chindan, —  
Topganday oltin,  
O‘nta boshoqni  
Tugib belboqqa,  
Keltirgan edim  
Bir kun qishloqqa.  
O‘sha boshoqlar  
Ko‘payib har yil  
Shu bug‘doyzor — qir  
Bergandi hosil.  
Behzod bu gapdan  
Hayratda qoldi.  
Qo‘liga asta  
Bir boshoq oldi.  
“Har bir boshoqda  
O‘ntadan ko‘p don.  
Bir necha yilda  
Bo‘libdi xirmon”  
Derdil o‘zicha,  
Boshoq qo‘lida.  
Nimanidir u  
O‘ylar ko‘nglida...  
Ko‘p narsalarni  
Bobodan so‘rab,  
Besh boshoq oldi  
Qog‘ozga o‘rab.  
O‘qish boshlandi,  
Tugab ta’til ham.  
Behzod o‘ylardi  
Boshoqni har dam.  
Ekib ko‘rmoqchi



Uni aslida.	Haftalar o'tar,
Yer tayyorladi	Hafta ketidan.
Kuzak faslida.	Bir kun qarasa
Gulzor yonidan	Marza chetidan —
Bir bo'yra eni —	Bir dona urug'
Joyni ajratib,	Nish uribdi sal.
Qo'ygandi, endi,	Rosa sevindi
Kimdir keldi-da,	Behzod shu mahal.
Qildi masxara:	Go'yo ko'nglida
— Bug'doy o'sarmi —	Ochilganday gul,
Hovlida, qara.	O'zidan-o'zi
Behzod qilmadi	Sakrardi nuqul.
Bu gapga parvo.	Shu kuni Behzod
Ishga kirishdi	"Besh" olganday shod.
G'allakornamo.	Bir haftadan so'ng
Necha martalab	Ishi kelib o'ng,
Yerni chopdi, so'ng —	Olganday, qarang,
Dehqonga o'xshab	Topshiriq — buyruq
Soldi o'g'it-go'ng.	Unib chiqibdi
Boshoqlardagi	Yoppasi urug'.
Donlarni qoqdi.	Shu orada deng,
Har bitta donga	Yaqinlashdi qish.
Sinchiklab boqdi.	Bosdi Behzodni
Sepdi donlarni	Bexosdan tashvish.
Asta, avaylab,	Bug'doy niholin
Ustdidan tuproq	O'ylardi holin.
Sochdi ataylab.	O'tib uch-to'rt kun
Zo'r ish qilganday	Ustdidan choyshab —
Bo'ldi ko'nglida.	Yopganga o'xshab,
Bug'doyzor turar	Qor bosdi butun.
Ko'zi o'ngida.	"Sovuq urmasa
Maktabga borib,	Bo'lardi maza"
Qaytganda darsdan,	Degan xayolda
Tikilar edi	Yurar har holda.
Birpas-birpasdan.	"Qishda ham bug'doy



Qirda qolar-ku!"	Go'yo nur sochar
O'ziga o'zi	Quyosh havasda.
Taskin berar u.	To'lishar edi
Qish kuni lekin	Boshoqda donlar.
O'tardi sekin.	Behzod ko'nglida
Qor ostida jim	Kular armonlar.
Uxlar nihollar.	Novvotrang olib
Kor qilmas edi	Pishardi bug'doy.
Sovuq shamollar.	Bug'doy o'rimin
Keldi navbahor,	Kutar Behzodvoy.
Erib ketdi qor.	Oxir oltinday
Kichik bug'doyzor	Bug'doylar pishdi.
Bo'ldi yam-yashil.	Bir kun Behzodvoy
Kutardi shuni	"O'rim"ga tushdi.
Behzod muttasil.	(Unda yo'q biroq
Begona o'tlar	Chalg'i va o'roq).
Uchrasa o'tar.	Yoydi oftobga
Bug'doy qiyog'in	Qurisin debon.
Yuvardi yomg'ir.	Ko'targan bo'ldi
Go'yo silardi	O'zicha xirmon.
Mayin yel g'ir-g'ir.	Ajratdi bir kun
Do'stlari kelib	Donga, somonga.
Ko'rishar goho.	To'rvaga solib
Yosh g'allakorga	Ildi ayvonga.
Berishar baho.	Behzod ko'nglida
Hovli chiroyin	O'ylar nenidir...
Ochgan u yana.	Ko'klamga qadar
Endi Behzodga	Uni tutdi sir.
Qilishmas ta'na.	Erta ko'klamda
Ko'pchilik qoyil	Oyijoniga
Uning ishiga,	Shunday dedi u,
Bug'doya bo'lgan	Kelib yoniga:
Havas — ishqiga.	— Oyijon, menda
Boshoq chiqarar	Bor bitta istak,
Nihollar asta.	Shu bug'doyimdan

Qilsak sumalak.  
Xullas, oyisin  
Behzod ko'ndirdi.  
Bug'doylarini  
Shoshmay undirdi.  
Vannaxonada  
Turdi issiqda.  
Suv sepedi goho.  
Bu ish qiziq-da.  
Bir kun azonda  
Katta qozonda  
Pishdi sumalak,  
Naq ikki chelak.  
Men ham yeb ko'rdim  
Shu sumalakdan.  
Behzodga qoyil  
Qoldim yurakdan.

## BOBOM BOLA BOQARLAR

Bobom borlar,  
Uy ichida eng kattalar,  
Keksalar.  
Ba'zan bola boqadilar  
Oyim ishga ketsalar.  
Bobom erta turadilar,  
Yuradilar kuymanib.  
Men ham erta turaman-da,  
Bobomlardan iymanib.  
Hanuz hassa ushlamaslar,  
Baquvvatmish bellari.  
Hammamizni erkalarlar,  
Juda shirin tillari.  
Eng kichkina chaqalojni

Biram yaxshi ko'rilar.  
Oyimlardan,  
Dadamlardan  
Ahvolini so'rilar.  
Bo'sh bo'lsalar, chaqalojni  
Solib aravachaga,  
Ovutgani,  
O'ynatgani  
Chiqadilar ko'chaga.  
Bobomlarni ko'rsa ukam  
Darrovda jim bo'ladi.  
Nelarnidir gapirsalar,  
Qiqir-qiqir kuladi.  
Yig'lasa-chi, yupatarlar  
Asta-asta tebratib.  
Tepasida o'tiralar  
Chaqalojni uxlatib.  
O'zim qaray qolay desam,  
Darsingni qil, deydilar.  
Hammamizni  
Hamma yerda  
G'amimizni yeydilar.  
Ana shunday bobom borlar,  
Ukajonim boqarlar.  
Oyimlarga,  
Adamlarga,  
Odamlarga yoqarlar.

## IKKI QO'LIM

Ikki qo'lim,  
Ikki qo'lim,  
Sizda bardam o'n barmog'im.  
Siz tufayli,  
Qanday sharaf,



Yurt xizmatin bajarmog‘im.  
 Gul ekaman —  
 Sizlar bilan,  
 O‘stiraman parvarishlab.  
 Himmatinga,  
 Mehnatinga  
 Rahmat aytar el olqishlab.  
 Biringizni  
 Ko‘ksim qo‘yib,  
 Hurmatimni ko‘rsataman.  
 Biringizni  
 Chin yurakdan  
 Do‘stim tomon uzataman.  
 Men bilaman,  
 Qo‘llarim siz —  
 Yomonlikni xushlamaysiz.  
 Yurak so‘zim —  
 Iltimosim  
 Aslo qurol ushlagamangiz!

## DUTOR SEHRI

Nedandir bir kun, qarang,  
 Asabim bo‘ldi tarang.  
 Ko‘nglim xiradan xira,  
 Ta‘bim ochilmas sira.  
 O‘zimni qo‘yay qayga?  
 Qisilardi yuragim.  
 Xonamda radioning  
 Qulog‘ini buradim.  
 Yangradi dutor kuyi.  
 Boshimni solib quyi —  
 Sadolarin tinglardim,  
 Nelarnidir anglardim.  
 Ustimidan og‘ir engil

Tushganday, bo‘ldim yengil.  
 Yasha, dutor ohangi —  
 Ruhimni etding yangi.

## XAYOLNI USHLAGAN BOLA

Xayol nima?  
 Kim bilar?  
 Xayol yoinki otmi?  
 Fikr qushin uchirgan  
 Yo qo‘shaloq qanotmi?  
 Ba‘zilar-chi, xayolni  
 Dengizdan chuqur, derlar.  
 Bilag‘onlar goh uni  
 Nurdan ham uchqur, derlar.  
 Bitta bola xayolni  
 Ushlay deganda xiyol,  
 Ura qochib qolarkan  
 Tutqich bermasdan xayol.  
 Gohida ushlay desa  
 Xayolning etagidan,  
 G‘izza o‘tib ketarmish  
 Oyog‘ining tagidan.  
 Xullas, bola xayolni  
 Ushlamoqchi bo‘libdi.  
 O‘zining foydasiga  
 Ishlatmoqchi bo‘libdi.  
 O‘sha bola bir kuni  
 Uni tutib olibdi.  
 Tutqich bermas xayolni  
 O‘z yo‘liga solibdi.  
 Xayolni ushlaganin, --  
 Oshnalar, demang xayol.  
 Men uni bu o‘rinda



Oldim bo‘lsin deb misol.  
Xayol — maqsad har yerda  
Kuchingizni sinaydi.  
Harakat qilganlarga  
Doimo bo‘ysunadi.

### **YOSHIMGA YET, DEYDILAR**

Salomat buvi,  
Alomat buvi,  
Kichkintoylarning  
Ahil-totuvi.  
Buvining bordir  
O‘n nabirasi.  
Shunga yarasha  
Qirq chevarasi.

Ular ko‘payib  
Borar tobora.  
Ismin eslolmay  
Buvi ovora.  
Salomat buvi  
Alomat buvi,  
Chevaralarin —  
Yoqar qiy-chuvi.

Sevinchlariga  
Sevinch qo‘sadi,  
O‘shalar bilan  
O‘yin tushadi.  
Yaqinda kampir  
Yuzga kiradi.  
Ko‘plar ismini  
Chalkashtiradi.

Ra’no o‘rniga  
Chaqirar Norni,  
Qosim deyman, deb  
Chorlar Qo‘chqorni.  
Kulib qo‘yishsa  
Bolalar goho,  
Bu holdan buvi  
Ranjimas aslo.

O‘z xatosini  
Yoshiga yo‘yar,  
Siz ham yoshimga —  
Yeting, deb qo‘yar.

### **YASHASIN YAKSHANBA**

— Eh, yashasin yakshanba!  
Maktabga tushar “tanba”.  
Hammadan ko‘proq — ortiq  
Akang chiqarar hordiq! —  
Deya bitta o‘g‘ilcha,  
Parvo qilmasdan qilcha,  
Ko‘chada kuni bo‘yi,  
Aniqmas mo‘ljal-o‘yi,  
Nuqlu changga belanib,  
Yurar sanqib-elanib.  
Yakshanba uning uchun  
Faqat bekorchilik kun  
Yakshanbani butunlay  
Tushunmabdi bolakay.  
Asli, yakshanba kuni  
Kunlarning sermazmuni.  
O‘ylasangiz chinakam  
O‘z darsi bor uning ham.



Kerak bo‘lar chiniqish,  
 Miriqib kitob o‘qish,  
 Ruhiyatga dam berish,  
 Sayr etish, gullar terish,  
 Ota-onaga yordam —  
 Eng fayzli hordiq va dam.  
 Hafta rejasin tuzib,  
 Kim yursa doim o‘zib,  
 Biz o‘shanga yarasha  
 Deymiz:—Yakshanba, yasha!

### AHIL DO‘STLAR

Bir mактабдан yaxshi dovrug‘  
 Tarqab ketdi yaqinda.  
 Barcha quvnab gapirardi  
 Ikki o‘rtoq haqida.

Bir partada o‘tirardi  
 Ikki oshna darsida.  
 Juda-juda ahil ular  
 Aka-uka tarzida.

Bir-biriga xo‘p mehribon,  
 Ko‘ngli tushgan ko‘ngliga.  
 Shu sababdan ikkovining  
 Ishi yurar o‘ngiga.

O‘qituvchi gaplarini  
 Bir qulqoqday tinglashar.  
 Zehn qo‘yib, hushyor turib  
 Dars mag‘zini anglashar.

Gap-so‘zлari biram shirin,  
 O‘zлari ham yoqimtoy.  
 Otalari,

Onalari —  
 Bulardan shod hoynahoy.

Baholansa bunday do‘stlik,  
 “Besh” baho ham oz bo‘lar.  
 Yoshlikdagi qalin do‘stlik  
 Bir umrga soz bo‘lar.

Boshqalar ham sezishsaydi  
 Ahil do‘stlik nafini.  
 Ko‘payishin istar edim  
 Bunday do‘stlar safini.

### TOLIB BOBONING TOLI

Tolib bobo qishloqda  
 Ishqibozdir tollarga.  
 O‘siradi avaylab  
 Yedirmasdan mollarga.  
 So‘zlaydilar olimday  
 Tolning xosiyatini.  
 Har bir tolda ko‘rasiz  
 Maqsadu niyatini.  
 Ishkomlarda xizmatda  
 Bobo ekkan tolpoya.  
 Barcha bilar boboning —  
 Sharafi benihoya.  
 Qishloq, ariq bo‘ylari  
 Tolzorlarga aylangan.  
 Har kun bobo ularni  
 Aylangani-aylangan.  
 Ba‘zi tolning tanasi  
 O‘xshab ketar boboga.  
 Salom berar nihollar





Tebranib shabbodada.  
 Bir kun ko'rsa, bolalar —  
 Tol novdadon uzishib —  
 "Qilichbozlik" qilishar...  
 Bobo qalbi uvushib,  
 Achindi-ki shunchalar,  
 Singan novda-niholga.  
 Joni tutash novdalar  
 Tushgan endi ne holga!  
 "Qilichbozlar" ham birdan  
 Yengilganday to'xtashdi.  
 Tol xivichin "yemay" deb  
 Kimlar qochishga shoshdi.  
 Bobo esa guvranib  
 Novdalarni sanardi.  
 Bolalarni xivichmas,  
 Ko'zi bilan savardi...

### **INTILAMIZ QUYOSHGA**

Tog'dan oftob ko'rinsa,  
 Yayrab kutib olamiz.  
 Nurlarini qo'l bilan  
 Go'yo tutib olamiz.

Intilamiz quyoshga,  
 Qaddimizni tiklaymiz.  
 Aziz mehmon kelganday  
 Kel, deya tabriklaymiz.

Kutib oлganimizdan  
 Chiroyi ochiladi.  
 Sevinchlari atrofga  
 Nur bo'lib sochiladi.

Intilamiz quyoshga,  
 Qo'r oladi bag'rimiz.  
 Harorati tufayli  
 Ochiladi bahrimiz.

Quyosh — borliq onasi,  
 Barchaga barobar —teng.  
 Taratar nur, issiqlik,  
 Saxovati, mehri keng.

Biz istaymiz doimo  
 Boshimizda bo'lishin.  
 Bir kun agar ko'rmasak  
 Sog'inamiz kulishin.

### **TOG' ZAVQLARI**

Sira-sira chiqmagandim,  
 Chiqdim toqqa.  
 Yuksaklikdan qarab ko'rdim  
 Hammayoqqa.  
 Keng ekranda ko'ringanday  
 Butun atrof,  
 Yaqinlashib qolgan go'yo  
 Osmon, oftob.  
 Rosa yengil sezar edim  
 Men o'zimni.  
 Go'zallikdan uzolmasdim  
 Hech ko'zimni.  
 Tog' havosi toza ekan,  
 To'ydim rosa.  
 Xayollarim jilovini  
 Qo'ydim rosa.  
 Qishlog'imni izlab ko'rdim  
 Balandlikdan,



Tanib qolib,  
chapak chaldim  
Xursandlikdan.  
Yuragimga sig‘mas edi  
Zavq-shukuhim.  
Tog‘lar kabi ko‘tarildi  
Yana ruhim.

### **MEVA SHIRIN — FARZAND SHIRIN**

Bilsangizlar, daraxtlarning  
Farzandlari mevasidir.  
Bahor chog‘i shig‘il guli  
Ona daraxt jilvasidir.

Har bir daraxt mevasiga  
O‘z naslidan beradi rang.  
Allaqanday mo‘jiza bor,  
Aql hayron qolar, qarang.

Tanasidan — tomiridan  
Talay oziq yetkizadi.  
Bir mehribon ona bo‘lib  
Go‘dagini “emizadi”.

Kuz chog‘ida mevalarin  
Yerga to‘kmoq bo‘lsa shamol,  
Farzandlarin o‘z bag‘riga  
Daraxt bosar ona misol.

Ey, bolalar, ey, farzandlar,  
O‘qing, o‘qing hayot sirin.  
Ota-onasi mevasi — siz,  
Shuning uchun siz ham shirin.

### **BIR-BIRIN KUZATAR FASLLAR**

Bir-birini qay usulda  
Kuzatishar fasllar?  
Bir-biriga nimalarni  
Uzatishar fasllar?

Fasllar bu, Yilboboning  
O‘g‘illari, qizlari.  
Har qadamda seziladi  
O‘ziga xos izlari.

Go‘yo ular bir-birining  
Qo‘llaridan ushlarlar.  
Gir aylanib, davra qurib  
To‘rtov o‘yin tusharlar.

Qir-adirni dam oldirib,  
Dalalarni uxlatib,  
Bahoroyni Qishpolvon ham  
Kutar ekan o‘xhatib —

Oppoq qordan ko‘rpa yopib  
Oq bo‘yoqqa bo‘yarkan.  
Va zararli mikroblarni  
Yo‘qotarkan — quvarkan.

“Issig‘ingni ko‘paytir”, deb  
Aytar hatto oftobga.  
O‘z xizmatin o‘tar ekan  
Yozilganday kitobga.

Qishpolvon o‘z vazifasin  
Uch oy ichra o‘tarkan,



Xizmat qilish navbat bilan  
Bahoroya o'tarkan.

Bahoroy ham yomg'ir bilan  
Yuvar ekan yerlarni.  
Yashillikka burkar ekan  
Dalalarni, qirlarni.

Daraxtlarga taqar ekan  
Turfa-turfa chechaklar.  
Shamol mayin-mayin esib,  
Aytar qo'shiq — ertaklar.

Dehqon esa yer bag'riga  
Chigit, urug' qadarkan.  
Shu tufayli Quyosh Yerni  
Nurin sochib, sevarkan.

Bahoroyning mehnatidan  
Yashararkan keng olam.  
Belni bog'lab,  
terlar to'kib  
Yayrar ekan el, odam.

Ko'p narsani tayyor qilib  
Bog'lardan gul terarkan.  
Go'zal Yozga bahoroyim  
"Keling",  
deb gul berarkan.

Vazifasin bajarishga  
Kirishganda go'zal Yoz,  
Eng avvalo Quyoshbobo  
To'sharkan nur —  
poyandoz.

Mehnat rosa qizir ekan  
Go'zal Yozning davrida.  
Meva-cheva pishar ekan  
Saratonning hovrida.

Paxtalar ham yetilarkan  
Yulduz-yulduz chanoqda.  
Gul fasning fazilatin  
Ko'rish mumkin  
har yoqda.

Har narsani tayyor qilib  
Topshirar Kuz o'g'longa.  
Mo'l hosilni yig'ish uchun  
Kuz tusharkan  
maydonga.

Eng avvalo  
"oq oltin"ni  
Qilar ekan tog'— xirmon.  
Mevalarni joylar ekan,  
Mo'l bo'lsin,  
deb dasturxon.

Kuzdan qabul qilish uchun  
Qishpolvon ham  
shaylanar.  
Har bir fasl oy,  
kun bilan  
Bir-biriga bog'lanar.

Har biriga gal kelarkan  
Bir martadan bir yilda.  
Yilboboninhg farzandlari  
Xizmatda shu zaylda.

## **YAM-YASHIL BUG'DOYZOR**

Qarayman qir tomonga —  
Uzoqlarga, tog‘likka.  
Nur yoyilar jahonga,  
Bug‘doyzorga, qo‘riqqa,  
Qarayman qir tomonga...

Shivalab o‘tgan yomg‘ir  
Dalalarni yuvgan sof.  
Qirda yel o‘ynar g‘ir-g‘ir,  
Jilmayar haryon oftob.  
Shivalab o‘tgan yomg‘ir...

Bug‘doyzor, qir yam-yashil.  
To‘yib-to‘yib nur emar.  
Ertangi bo‘liq hosil  
Ko‘z oldimda ko‘rinar.  
Bug‘doyzor, qir yam-yashil...

## **JIYDA JILVASI**

Ariq bo‘yi — uvatda  
Gulladi jiyda.  
Jimir-jimir tovlanar  
Quyosh mavjida.  
Taralardi jiyaning  
Isi — ufori,  
Yoqar edi misoli  
Shifobaxsh dori.  
Ko‘hlik edi judayam  
Kumush bargchasi.  
Yaltirardi gullarin  
Oltin parchasi.  
Eh, shunchalar zavq bersa

Gulin jilvasi,  
Maza bo‘lar undan ham  
Pishsa jiydasi.

## **YOMG‘IR OHANGLARI**

*(Manzara)*

Uyg‘otgandi uyqumdan  
Yomg‘ir yog‘ishi tongda.  
Qulqoq solsam shu zumda  
Yog‘ar turli ohangda.  
Tunukani royalday  
Bir maromda chalardi.  
Daraxtlarga shivirlab,  
Barglarini yalardi.  
Kiyindim-da ohista  
Chiqdirm ko‘lning bo‘yiga.  
Qarab qoldim havasda  
Ko‘lga yog‘ish kuyiga.  
Bug‘doyzordan keluvchi  
Ohanglar-chi, xo‘p mayin,  
Yo‘llar bo‘ylab yog‘ishin  
Eshitardim shoshmayin.  
Chalinganday go‘yoki  
Bir ajoyib cholg‘ular.  
Yomg‘irning ohanglari  
Dilda qo‘zg‘ar tuyg‘ular...

## **YO‘LDAGI SADA**

Jazirama issiqda  
Ketardim yo‘lda.  
Qimir etgan daraxt yo‘q  
Na o‘ngda — so‘lda.



Quyoshning nuri go'yo  
Sanchardi igna.  
Qani endi joy bo'lsa,  
Eh, salqingina.

Olar edim miriqib  
Bir ozgina dam.  
Shu umidda, shu o'yda  
Tashlardim qadam.

Ko'z o'ngimda — olisda  
Bir daraxt ko'rdim.  
U daraxtga yetay deb  
Yeldim — yugurdim.

Bahaybat sada ekan  
Ko'ringan boyta,  
Chor atrofga tashlagan  
Salqinu soya.

Bu sadaning bo'y-basti  
Kelardi tog'day.  
Yashilligi — yashnashi  
Tuyuldi bog'day.

Cho'l issig'in yengolgan  
Go'yo u haykal,  
Ko'rinaldi hali u  
Bardam — mukammal.

Yo'lovchiga rohat,  
dam  
Berib bu sada,  
Qozongandi e'tibor  
Cho'lda bo'lsa-da.

Sada kabi bir daraxt  
O'stiray men ham.  
Yo'lovchilar eslashsin  
Olgan chog'da dam.

## MAQTANISHDI GULLAR

Hovlimizga ekkanman  
Gullar sarxilin,  
Bora-bora o'rgandim  
Ularning tilin.

Bir kun ular so'zlashdi,  
O'zim tingladim.  
So'zlarining ma'nosin  
Tezda angladim.  
— Sizni ekkan kim?  
— deya

So'rardi biri.  
(Menga rosa ayondir  
So'zlarin siri).

Gullarim o'z rangidan  
Maqtanishdi xo'p.  
Tebranishib kimnidir  
Axtarishdi ko'p.

Biri meni ko'rsatdi:  
“Usta ekan”,  
deb.  
Boshqalari yayradi:  
“Bizni ekkan”,  
deb.

## **OLIM OTANING OLMALARI**

Olim otam qariganlar,  
Yuradilar hassada.  
Ba'zi bir xil bolalar der:  
Ularga xo'p mazza-da!  
Avtobusga chiqsalar-chi,  
Turmaydilar suyanib,  
Ko'rgan odam joy beradi  
Bobomlardan uyalib.  
Qarib qolgan bo'lsalar ham  
Ishlari zo'r hozirda.  
Qishloq bo'ylab birinchidir  
Olmalari hosilda.  
Keng olmazor yaratganlar,  
Qoyil qolgan olimlar.  
Olmachilik sohasida  
O'zları ham olimlar.  
Olmazorda o'sar hatto  
Olmaota olmasi.  
Hammayoqda mashhur rosa  
Olim ota olmasi.  
Olmalarning shoxlari-chi,  
Mo'l hosildan engashgan.  
Ko'rinishda go'yo ular  
Otamlarga tenglashgan.  
Har bir shoxda olmalari  
Pishib yotar shig'il, zich.  
Shoxlariga qo'yibdilar  
Qator-qator tirkovuch.  
Qarimagan bo'lsalar-da,  
Ular Olim otamday,  
Har bir tupi ko'rinaridi  
Hassa tutgan odamday.

Ba'zi chollar hazillashar  
Astagina jilmayib:  
— O'zingizday olma shoxlar  
Qolishibdi bukchayib.  
Olim ota olmalari  
O'zlariday hassali.  
Olmalardan yeganmisiz?  
So'zlariday mazali.

## **SUV SEPAMAN HOVLIGA**

Tongda turib hovliga  
Har kuni suv sepaman.  
Bu yumushni o'zim-chi,  
Juda-juda sevaman.  
Gullarimning bargidan  
Yuviladi chang-g'ubor.  
Shundan keyin ularga  
Eh, bersangiz e'tibor —  
Biram yashnab ketadi  
Turfa gullar yaprog'i.  
Tovlanadi oftobda  
Bargchalarin yonog'i.  
Ariqlarga suv ochsam  
Ketishadi pildirab.  
Go'yo qo'shiq kuylaydi  
Suvlar mayin shildirab.  
Sut emganday bo'ladi  
Gulzordagi har nihol,  
Shitirlaydi gul, yaproq,  
So'zlashadi ehtimol.  
Hovlimizning keng sahni  
Yana kulgan bo'ladi.  
Go'yo qalbim gullarning

Chiroyiga to‘ladi.  
Gullar menga rahmat deb  
Mayin yelda tebranar.  
Yashnagandan yashnaydi  
Chor atrofu tegralar.  
Tongdan boshlab hovlimiz  
Oromgohday tuyular.  
Kimki ko‘rsa diliga  
Mehru havas quyilar.

## TOPSHIRIG‘IM, BUYRUG‘IM

Vazifalar topshirdim  
Har bitta a‘zoyimga.  
Dedim: “Qarab ish tuting  
Rayimga-avzoyimga.  
Huzurimda doimo  
Hushyor turingiz juda.  
Harakatlar qilmangiz –  
Aslo huda-behuda.  
“Faqat yaxshi gap eshit!”  
Undadim qulog‘imga.  
“To‘g‘ri qadam bosgin”, deb  
Eslatdim oyog‘imga.  
“Go‘zallikdan bahra ol”,  
Deb ko‘zga yo‘l ko‘rsatdim.  
“Yaxshiga duch kelganda –  
Kulgın”, deya o‘rgatdim.  
Burnimga tayinladim:  
“Ko‘tarılma osmonga,  
O‘zingni uraverma –  
Har tuynuk, har tomonga”.  
Aytib qo‘ydim ohista  
Yuragimga — dilimga:

“Bo‘lar-bo‘lmas yolg‘onni  
Chiqarmagil tilimga”.  
Dedim:  
“Qochma mehnatdan!”  
Bilagimga — qo‘limga.  
“Sen bilan nur sochilar  
Kelajagim — yo‘limga”.  
“Bilimlardan xazina  
To‘pla — dedim boshimga. —  
Fikrlardan sochgil nur,  
O‘xshagil quyoshimga”.  
“Elga doim kulib boq” —  
Deb yuzlandim yuzimga.  
“Xalqqa xizmat qil dildan”  
Buyruq berdim o‘zimga.  
Tasdiqlashdi gapimni  
A‘zolarim butunlay.  
So‘z berishdi birma-bir,  
Bo‘laylik deb ishga shay.

## YER CHOPILDI – JAVOB TOPILDI

— Bezovta qilmang, —  
Deya onamga,  
Dars tayyorlashga  
Kirdim xonamga.

Boshimni qashib  
Rosa o‘tirdim.  
Ko‘p misollarni  
Yozdim, o‘chirdim.

Xayol otlari  
Chopishib chaqqon,



Tutqich bermayin  
Qochdilar haryon.

Masala qurg'ur  
Yechilmaydi hech.  
Bunday qarasam,  
Bo'lib borar kech.

Bekor o'tirmay  
Hovliga chiqdim.  
So'ng yerni chopib,  
Rosa chiniqdim.

Bir ozdan keyin  
Yorishdi ko'nglim.  
Go'yo ochildi  
Fikrimga yo'lim.

Barcha savolga  
Javob topildi.  
Shu bahonada  
Yer ham chopildi.

## SAXIY BOLA VA OLMA

Odiljonning olmasi  
Qildi nishona.  
Pishganidan tushibdi  
Yerga bir dona.  
Uni yemoqchi bo'ldi  
Odiljon ola...  
Ko'rgan ko'zni o'ynatar,  
Ajoyib olma.  
Taram-taram husniga

Qarasa uzoq,  
Usta rassom rosayam  
Berganday bo'yoq...  
Lekin uni yeishga  
Qiymadi ko'zi.  
"Kimga bersam ekan?" — deb  
O'yladi o'zi.  
"Oyijonim yesalar  
Qoladi qoyil",  
Deb eltdi oyisiga  
Odil astoydil.  
Olmani qo'lga olib,  
Kuldi oyisi,  
Dedi: — Buncha yoqimli  
Bo'lmasa isi.  
Oyijoni uqtirdi:  
— Buvingga ber, — deb  
— Sendan xursand bo'ladi  
Buvijoning yeb.  
— Rahmat,  
o'zing yeyqol, — der  
Buvijoni ham.  
Bobosiga eltdi u  
Olmani shu dam.  
Olmani olib qo'lga  
Qarar bobosi:  
— Olmalarning ichida  
Asil, a'losi.  
Qani uni yeysamsam,  
Sust ketar ko'nglim.  
Buni yemoqlik uchun  
Tish kerak, o'g'lim.  
Hidlab ko'rdi uch-to'rt bor  
Xo'p yoqdi hidi.  
Bobosi ham oxiri:



— O'zing ye, — dedi.  
 Bu olmani hammaga  
 Bir-bir ilindi.  
 Odilning saxiyligi  
 Shunda bilindi.

## OLTIN KUZIM

Oltin kuzim,  
 Oltin kuzim, oltin kuz,  
 Ta'rizingga,  
 Maqtovingga izlab so'z,  
 Vodiyarni,  
 Vohalarni kezaman.  
 Paxtazoru,  
 Bog'u rog'lar bezangan.  
 Olam chiroy  
 Baxsh etding bo'z-qo'riqqa,  
 Yasan-tusan  
 Haryon — chiqqan ko'rikka.  
 Bahor, yozgi  
 Mehnatimga yakunsan,  
 Oltin kuzim,  
 Ham saxiysan, to'kinsan.  
 Yoqimtoysan,  
 Iliqqina bahorsan.  
 Bahordan ham  
 Aslida bebahosan.  
 Arzir seni  
 Faxrlanib maqtasam,  
 Keng quchog'ing  
 Saroylarday muhtasham.  
 Ishkomlarda  
 Uzumlarning chamani,  
 Quvontirar

"Oq oltin"zor hammani.  
 Jami narsa  
 Muhayyo bu saroyda.  
 Hammadan ham  
 Beqiyosdir chiroyda.  
 Bu saroyning  
 Go'zalligi san'atdir;  
 Bu san'atning  
 Asosida mehnatdir.  
 Bu mehnatning  
 Asosida g'ayrat bor.  
 Bu g'ayratning  
 Asosida himmat bor.  
 Bunday himmat  
 Elimdag'i insonda.  
 Bunday chiroy  
 Biz yashagan bo'stonda.  
 Oltin kuzim,  
 Oltin kuzim, mo'l kuzim,  
 Tayyordirman  
 Xizmatingga men o'zim.

## DADAMLARDAN O'RGANDIM

Gul ko'chatim  
 Qilar edim parvarish,  
 Tez orada  
 Bo'yi bo'ldi bir qarich.  
 Gul ekishni  
 Dadamlardan o'rgandim.  
 (Gulga mehr  
 Qo'yanlarin ko'rgandim).  
 Ishim ko'rib  
 Dadajonim sevindi.



Menga bergen  
O'gitlari sezildi.  
Ko'chatlarim  
Barq urmoqda, o'smoqda.  
Dadamlar der:  
— O'g'ilim mendan o'zmoqda.  
Borajakman  
Dadamlarning yo'lidan.  
Olajakman  
Ishlarini qo'lidan.

## **BAHOR SABOG'I**

Bahor menga  
Har kelganda  
Ilhom berar,  
Yana zavqim  
Toshiraru  
Orom berar.  
Bahor menga  
Ko'p narsalar  
O'rgatadi.  
Yuragimda  
Elga mehr  
O'rnatadi.  
Qulog'imga:  
“Gullaringa  
Qara, deydi,  
Hammasi soz,  
Bir-biridan  
Sara, deydi.  
Tongda turib  
Yugur haryon,  
Chiniq, deydi.  
Sof havomdan

Shimirib qol,  
Tiniq", deydi.  
Bog'larimda,  
Tog'larimda  
Kezar bahor.  
Dalalarim  
Yashil rang-la  
Bezar, bahor.  
Men bahorning  
So'zin o'tab,  
Bo'lmadim kam.  
Bahor ila  
Yana ko'rkam  
Ona o'lkam.

## **O'LKAMIZNI O'RGANAYLIK**

O'lkamizni  
O'rganaylik,  
Undan ming bor  
O'rgilaylik.  
Onadayin  
Yurtimiz ul.  
Obro'yimiz —  
Burdimiz ul.  
  
Mehr qo'ysak  
Arzir unga,  
Ulg'aytirgay  
Kundan-kunga.  
Borgan sayin  
Ko'rkamlashgan,  
Qaddin tiklab  
O'ktamlashgan.



Kulaversin  
Obodligi,  
Oshavergay  
Dil shodligi.  
Hosilga boy  
Dala-bo‘zlar,  
Chiroyiga,  
To‘ymas ko‘zlar.

Ikki daryo  
Oralig‘i,  
Turonzamin  
Saralig‘i.  
O‘lkamizni  
O‘rganaylik,  
Ming bor-ming bor  
O‘rgilaylik.  
O‘rganaylik —  
O‘rganaylik.

## YAXSHILARI KO‘PAYSА

Bolalar ichida  
Shalpayganlar bor.  
Taltaygan tantiqlar,  
Yalpayganlar bor.  
Chakagi tinmagan  
Shaqillagan bor.  
Ko‘cha-ko‘yda sanqib  
Laqillagan bor.  
Nuqul uyqumijoz  
Esnaganlar bor,  
Juda odamovi,  
Sezmaganlar bor.

O‘qiganu lekin  
Uqmaganlar bor.  
Birorta yaxshilik  
Yuqaganlar bor.  
Og‘zidan oshini  
Oldirganlar bor.  
Yaxshilar ixlosin  
Qoldirganlar bor.  
Onani holidan  
Toldirganlar bor.  
Ochig‘i, undaylor  
Onda-sonda bor.  
Ular na sifatda,  
Va na sonda bor.  
Shunday bolalardan  
Qolgandir ko‘nglim.  
Nuqsonin yozishga  
Bormaydi qo‘lim.  
Bolalar ichida  
Yetuk ko‘paysin.  
Bilimdon, azamat,  
Tetik ko‘paysin.

## DOVYURAKLAR

Bolalar doim  
Topqir bo‘lsalar,  
Chaqqonu epchil  
Chopqir bo‘lsalar.  
Ko‘zları o‘tkir  
Merganlar kerak.  
Mardonka ko‘krak —  
Kerganlar kerak.  
O‘shanday avlod  
Bizning o‘zimiz.



Aytib turadir  
 So‘zu ko‘zimiz.  
 Temur avlodi  
 Bizning o‘zimiz.  
 Sog‘lom, barkamol  
 Avlod bo‘lsalar,  
 Ilmu hunarda  
 Kuchga to‘lsalar,  
 Ular Vatanga  
 Tan — jon, yurakdir.  
 Dovyurak, odil  
 Farzand kerakdir.  
 O‘shanday avlod  
 Bizning o‘zimiz.  
 Aytib turadir  
 So‘zu ko‘zimiz.  
 Temur avlodi  
 Bizning o‘zimiz.

### **YAXSHILARNI MAQTASH KERAK**

Assalom deb  
 O‘tib ketdi  
 Bir bolakay.  
 Alik olib,  
 Tilak qildim  
 Unga atay:  
 Otasiga  
 Rahmat, dedim  
 Eng avvalo,  
 Baholari  
 Bo‘lsin dedim  
 Nuqul a‘lo.  
 Bobolarin

Bilar edim  
 Ko‘pdan buyon,  
 Yaxshiligin  
 Qilgim keldi  
 Bir-bir bayon.  
 Sira tinib,  
 Tinchimas u  
 Harakatda.  
 O‘z nasliga  
 Tortibdi-da  
 Haqiqatda.  
 Xulq-atvorin  
 Maqtasam gar  
 Taltaymasmi?  
 Dangasalik  
 Yuqib darrov  
 Yalpaymasmi?  
 Yaxshilarni  
 Bilsa bo‘lar  
 Yurishidan,  
 Nur yog‘ilar  
 Qarashidan,  
 Turishidan.  
 Bundaylarni  
 O‘z nomi-la  
 Atash kerak.  
 Ibrat uchun  
 Maqtash kerak,  
 Maqtash kerak.

### **OBRO‘ QAYDAN KELADI?**

Obro‘ qachon ketaru,  
 Obro‘ qachon keladi?



Kutilmagan paytda  
Ba'zan oson keladi.

Obro'yini yo'qotgan  
Qaydan topib oladi?  
Kimda bo'lar vaqtinchcha,  
Kimda mangu qoladi.

Obro' yoki oltinmi?  
Ehtimol o'z koni bor?  
Kimki obro' topmoqqa —  
Urinsa imkoni bor.

Nohaq ko'nglin og'ritsang  
Biror yaxshi kimsani...  
Ana shunday holatda  
Obro'li der kim sani?

Darhol tutday to'kilgay  
El ichida obro'ying.  
Ta'nalardan, dashnomdan  
Topolmaysan o'z uying.

Ketayotib ko'chada  
Yiqilsa bir nogiron,  
Unga mehring ko'rsatib  
Yordam bersang sen chaqqon,

Ko'rganlarning oldida  
Zumda oshar obro'ying.  
Maqtovlardan ko'k sari  
Yuksaladi qad-bo'ying.

Saxiylikdan, poklikdan  
Obro' kelar behisob.

Qachon obro' topibdi  
Beandisha, beodob?

Obro' topish yo'llari  
Bog'liq erur o'zingga.  
Ko'zday saqla obro'ying,  
Quvonch to'lgay  
ko'zingga.

Biror narsa yo'qotsang  
Topilgay goh op-oson.  
Obro'yingni yo'qotsang,  
Topolmaysan  
hech qachon!

## DARAXTLAR MASHQ QILAR

Daraxtlar shamolda  
Tebranib mashq qilar.  
Harakat chog'ida  
O'zicha gasht qilar.  
Qo'shiqday taralar  
Yaproqlar shiviri,  
Nimadir deyishar  
Go'yoki har biri.  
Yaproqlar o'zicha  
Chalishar chapaklar,  
Ularga qo'shilar  
Maysalar, chechaklar.  
Ehtimol chiniqar  
Daraxtlar novdasi,  
Osmonga bo'y cho'zar  
Bahaybat gavdasi.  
Barglarning yonidan

Mo‘ralar mevalar.  
Ular ham o‘zicha  
Qilurlar jilvalar.  
Yerdanmi suv tashir  
Bildirmay ildizlar,  
Hamisha xizmatda  
Kecha-yu kunduzlar.  
Quyosh ham osmondan  
Sochadir nurini,  
Nainki nurini,  
Harorat — qo‘rini.  
Daraxtlar shu bois  
Mashq qilar tebranib,  
Mo‘l hosil berajak  
Chiniqib, toblanib.

### **YOMG‘IR YUVAR YAPROQLARNI**

Yomg‘ir yuvar  
Yaproqlarning changini,  
Yana ochar  
Chiroyini — rangini.  
Yaproqchalar  
Go‘yo dushda yuz yuvar.  
Bir bor emas,  
O‘n bor yuvar, yuz yuvar.  
Yomg‘irdan so‘ng  
Nihollar tez ko‘kargay.  
Balki shundan  
Hosillari ko‘paygay.  
Ey, ko‘klamning  
Iliqqina yomg‘iri,  
Kimga yoqmas  
Mayin yellar g‘ir-g‘iri.

Yuragimdan  
G‘uborlarim quvaman.  
Yomg‘irlarda  
Men ham yuzim yuvaman.

### **QIZG‘ALDOQJON**

Qizg‘aldoqjon,  
Hay, o‘rtoqjon,  
Qizaribsan,  
Tozaribsan,  
Ko‘zim yonib,  
Dilim qonib,  
Ko‘rgan sarim  
Oshar mehrim.  
Qizg‘aldoqjon,  
Serbaldoqjon,  
Husning yal-yal,  
Go‘yo mash’al  
Yoqilganday  
Hech to‘ymayman.  
Ming o‘ylayman  
Go‘zalliging  
Afzalliging.  
Ona Yerim,  
Ona mehrim.  
Eng ardog‘im  
Qizg‘aldog‘im.  
Gulyonog‘im,  
Do‘s t bo‘layin,  
O‘rgilayin  
O‘zginangdan,  
Yuzginangdan,  
Qizg‘aldog‘im,  
O‘rtoqjonim.

## KITOB O'QIGAN BOLA

O'rganar avval odob  
Kitob o'qigan bola.  
Yuzi bo'ladi oftob  
Kitob o'qigan bola.

Hurmat qilar kattani,  
Kichiklar jonu tani,  
Bajaradi va'dani —  
Kitob o'qigan bola.

Suhbati xo'p serma'no,  
Yurish-turishi a'lo.  
Olar faqat "besh" baho  
Kitob o'qigan bola.

Har fursati o'lchog'liq,  
Unda bor vaqtı chog'liq.  
Qilmas aslo chatoqlik —  
Kitob o'qigan bola.

## EH, ROSA SHIRIN EKAN!

Tongda dadam uyg'otib,  
Dedi: — Uxlama qotib.  
Qovun sotib olgani  
Bormoqchiyidik, yur, qani!  
Sevinch chaqnab ko'zimda,  
Tayyor bo'ldim bir zumda.  
Atrofimizda shu dam —  
Aylanib qoldi ukam.  
Ergashdi boraman, deb

(Borishin ko'rmasdim ep).  
U yalindi o'tinib,  
So'ng yig'ladi o'tirib...  
Ayyor-da ukam qurg'ur,  
Dadam dedi: — Mayli, yur.  
Jo'nadik uchchalamiz.  
Yo'lda g'iz-g'iz uchamiz.  
Dadam haydashga usta,  
Mashinamiz ko'k tusda.  
Yetib keldik bozorga,  
Go'yoki qovunzorga.  
Olaylik deb saralab,  
Yurdik bozor oralab.  
Bosvoldi taram-taram,  
Kiyganday to'n-beqasam.  
Quyosh nusxali cho'gir,  
Asal solganday og'ir.  
Qovunu tarvuzlar tog',  
Ko'rib ko'ngil bo'lar chog'.  
"Diding bo'lsa meni ol,  
Ichim to'la lim-lim bol.  
Rosa meni to'yib ye,  
Dehqonimga rahmat, de!"  
Deganday ko'k ananas,  
Qo'zg'ar ishtaha — havas.  
Chekkaroqda bir dehqon  
Qovunin maqtar chunon:  
— Kelib qol, ey, xaridor,  
Vaqting o'tmasin bekor!  
Bu Mirzacho'l qovuni,  
Kimki olmasa buni —  
Tushib qoladi puli...  
Eh, yeganlar darmonda,  
Yemaganlar armonda.  
Olib qol, shinavanda,

Uzdim shudring tushganda.  
Olmasangiz ham, inim,  
Yeb ko'ring-a bir tilim,  
Totib ko'rdilar dadam,  
— Shirin ekan judayam,  
Mehnat qilibsiz rosa,  
Narxin ayting bo'lmasa! —  
Dedilar keyin asta,  
Biz qarardik havasda.  
Mayda-mayda to'ri bor.  
Bir metrcha bo'yi bor.  
Rosayam katta, ko'rsam,  
Dilimdan bo'ldim xursand.  
Tortib ko'rsak qiziqib,  
O'n besh kilodan oshdi.  
Yerdan uzolmay uni,  
Rosayam aqlim shoshdi...  
Dadam dedilar: — Bay-bay,  
Shunga kuching yetmasa —  
Buyog'i bo'ldi qanday?  
Duv terga botib birdan  
Ko'zni olmasdim yerdan,  
Dehqon-chi shu zahoti  
O'g'liga der:  
— Alisher,  
O'rtog'ingga  
yordam ber!  
Men zimdan kuzatardim.  
U bola kela solib,  
Qovunni yerdan olib,  
Meni qilganday izza  
Ko'tarib ketdi g'izza...  
U mendan ancha kichik,  
Nega bunchalik kuchlik?  
Maqtanib qoldi dehqon:

— Bizning o'g'ilcha polvon,  
Ota o'g'li chinakam,  
Menga beradi yordam.  
Mehnat bilan pishigan,  
Barcha xursand ishidan.  
Jo'nadik hovli tomon,  
G'ash edi ko'nglim hamon...  
Mashina ichida ham  
O'tirardim indamay,  
Meni mazax qilganday —  
Kulib qo'yardi ukam.  
Bilamanki, yurmas jim  
Ko'ziga ko'rinsa kim,  
Rosa chaladi karnay.  
Gapga qoldim-da talay.  
Keldik-da hovlimizga  
Qovunimizni atay —  
Tashlab qo'ydik hovuzga.  
Bo'lzin dedik-da muzday.  
Buvim, oyim va dadam  
Supada bo'lishdi jam.  
Kechga yaqin, shu kuni  
Buvim katta qovunni —  
So'yib berdilar asta.  
Qildilar tilim, kosa.  
Eh, shirin ekan rosa!  
Gap ochib qoldi ukam,  
— Ey, buvijon, buvijon,  
Manov qovunni akam —  
Ko'tarolmadi!  
— Qachon?  
Barcha gap-so'zni shu dam  
Aytib berdilar dadam...  
Badantarbiya har tong.  
Har kimning ham og'zida

Qoldi qovun mazasi...  
Ammo ba'zi-ba'zida —  
Shu qovun voqeasi  
(Mirzacho'l qovunini  
Yerdan uzolmaganim)  
Tushib qolsa yodimga  
Rosa g'alati bo'lib  
Qarar edim yonimga...

### DADAM ISHDAN KELSALAR

Dadam ishdan kelsalar  
To'lib ketar uyimiz.  
Ko'kka yetguday bo'lar  
Xursandlikdan bo'yimiz.  
Uyimizda, aytaymi,  
Biz beshta aka-uka.  
Dadam sal kechiksalar  
Kenjamiz taka-puka.  
Derazaning yoniga  
Turib olar-da, tikka:  
— Tezroq keling, dadajon! —  
Deya qarar eshikka.  
Kelsalar peshvoz chiqib  
Beramiz bir-bir salom.  
Eng avval ukam bilan  
Qilarlar achom-achom.  
Kiyimlarin yechsalar  
Cho'tkalaymiz bittamiz.  
Qo'llariga suv quyib,  
Oppoq sochiq tutamiz.  
O'zining dadasini  
Maqtarkan demang tag'in,  
Orden, medallari bor

Aytib qo'yay bu yog'in.  
Dadam katta zavodda,  
Eng mohir muhandislar  
Terim mashinasiga,  
Har xil detallar yasar.  
Biz hammamiz sezamiz,  
Ishlari ancha og'ir —  
Dastgoh uzra kun bo'yи  
Charchaydilar-da, axir.  
Charchoqlari bosilar  
Biz bilan o'ynab-kulib,  
Boshimizni silarlar  
Hammamizdan o'rgilib.  
Dadamlarning mehrliga  
Har kech rosa to'yamiz.  
Dadam, oyimlar uchun  
Biz konsertlar qo'yamiz.  
Dadam, oyim o'ltirib  
Tomoshabin bo'lishar.  
O'yin, ashulamizdan  
Xursand bo'lib kulishar.  
Dadam o'tgan darslardan  
Ba'zan bir-bir so'rарlar,  
Kundalik, daftarlarni  
Tekshirib ham ko'rарlar.  
"Uch"imizni ko'rsalar:  
— Ish chakki-ku  
— deb qo'yar.  
“Besh” bahoga indamay  
Mayin jilmayib qo'yar.  
Dadam ishdan kelsalar  
To'lib ketar uyimiz.  
Ko'kka yetguday bo'lar  
Xursandlikdan bo'yimiz.

## **AYASINI AYASIN**

Nima yesa Hanifa,  
Ayasiga ilinar.  
Hanifaning bu bilan  
Muhabbati bilinar.  
Ayajoni charchasa  
O'tiradi yoniga.  
Shirin so'zlab, kuldirib  
Orom berar joniga.  
Achom-achom qiladi,  
Yuzlarini silaydi.  
Maqtab, ayajoniga  
Yaxshiliklar tilaydi.  
Hammadan ham Hanifa  
Yaxshi ko'rар ayasin.  
Hanifadek hamma ham  
Ayasini ayasin.  
Hanifalar yashasin.

## **KO'ZIM VA O'ZIM**

Yashasin, kelsa mehmon,  
To'lib ketar dasturxon.  
Shokolad, marmeladi,  
Hammasi soz, g'alati.  
Konfetga qo'l uzatish,  
Deyishadi uyat ish.  
Mendayam bor iroda,  
O'tiraman yiroqda.  
Konfetlar yilt-yilt etar,  
Tutsam hamki o'zimni,  
Epolmayman ko'zimni.  
Qaray desam bir chetga,  
Ko'zim og'ar konfetga...

## **KITOBIM QO'LIMDA**

Kitobim qo'limda,  
Qaranglar, qaranglar.  
O'qisam, so'zлari  
Jaranglar, jaranglar.  
Kitobim qo'limda,  
Ma'nosi ko'nglimda.

Kitobim ajoyib,  
Bir talay siri bor,  
Eng yaxshi odoblar —  
Yozilgan yeri bor.  
Kitobim qo'limda,  
Ma'nosi ko'nglimda.

## **YIG'LAR EKAN DARAXTLAR**

Daraxtlar ham  
Yig'lar ekan,  
Buni qarang,  
Uni ko'rib  
Men o'zimni  
Tutdim arang.  
Tabiatda  
Hodisalar  
Bo'lar gohi,  
Bo'ron kelib  
Sindi birdan  
Daraxt shoxi...  
Singan ko'zdan  
Go'yoki yosh  
Tomchilardi.



Yovuz bir kuch	Vataning dahlsiz,
Bechorani	Muqaddas,
Qamchilardi.	Jonlarga tutashday
Ko‘rganim bor	Chambarchas.
Bir kinoda	Sen uni ardoqla
Yig‘lardi ot,	Va yoqla,
O‘simlikning	Nur to‘lsin
Yig‘lashin ham	Xonayu ostona,
Ko‘rdim, hayhot!	Hamisha saqlagil
O‘ylab ko‘rsam,	Mardona — mardona.
Daraxtlar ham	Elimning tinchligi
Jonli ekan.	Baxtidir,
Yuragi bor,	Eng totli serunum
Tomirlari	Vaqtidir.
Qonli ekan.	O‘lkamning tuprog‘i
Zarur ekan	Durdona
Daraxtlarni	Hamisha saqlagil
Avaylamoq.	Mardona — mardona.
Zarur ekan	Turoniy elimning
Dildan mehr	O‘g‘loni,
Sarf aylamoq.	Ishongan, suyangan

### **SAQLAGIL MARDONA**

Bu Vatan eng aziz,  
Yagona,  
Istiqlol baxsh etgan  
Zamona,  
Sen uni ardoqla  
Va yoqla,  
Bag‘rida bar urar  
Gulxona.  
Hamisha saqlagil  
Mardona — mardona.

Vatanning dahlsiz,
Muqaddas,
Jonlarga tutashday
Chambarchas.
Sen uni ardoqla
Va yoqla,
Nur to‘lsin
Xonayu ostona,
Hamisha saqlagil
Mardona — mardona.
Elimning tinchligi
Baxtidir,
Eng totli serunum
Vaqtidir.
O‘lkamning tuprog‘i
Durdona
Hamisha saqlagil
Mardona — mardona.
Turoniy elimning
O‘g‘loni,
Ishongan, suyangan
Qo‘rg‘oni,
Sen uni ardoqla
Va yoqla
Sarhadni buzmasin
Begona.
Hamisha saqlagil
Mardona — mardona.

### **ONA TILIM**

O‘rgilayin,  
ona tilim,  
o‘zginangdan.  
Tillarimga

## **GULLARGA QARAYMAN**

bol keladir	Ertalab turib
so‘zginangdan.	Qarayman gulga.
Tilim, yana	Meni kutishar,
bo‘lavergin	Ko‘z tutib yo‘lga.
burro-burro.	
Oh, naqadar	
ohangdorsan,	
yana a’lo.	
Ona tilim,	Gullar ko‘ziga
mening uchun	Boqsam doimo,
yagonasan.	Qilishar asta
Aslida sen	Ishora, imo.
sharqonasan,	
turkonasan.	
So‘zlaganda	Keldingmi, deya
namoyondir	Shivirlashadi.
o‘zbekligim.	Gulbargchalar
Namoyondir	Shitirlashadi.
yaxshilarga	
ko‘zdekligim.	
Uzoq-uzoq	Omonmisiz, deb
tarixlarga	Silab qo‘yaman.
asosimsan.	Xushbo‘y isiga
Ulug‘-ulug‘	Rosa to‘yaman.
allomalar —	
Navoiyimsan.	Deyman, men borman
Merosimdan,	Shamol egmaydi,
ilmu fandan	Gul yuzingizga
to‘l mazmunga.	G‘ubor tegmaydi.
Dunyolarga	Quvonchim bo‘lib
tanilaver	Ochilishganday,
kundan-kunga.	Go‘yo bo‘ynimga
	Osilishganday...
	O‘lchab bo‘yimga
	Gullarim bo‘yin,

Atroflarida  
Tushaman o‘yin.

Go‘yo salom, deb  
Engashar gullar.  
Maktabga ketsam  
Ergashar gullar.

### OFTOB VA KOPTOK

O‘g‘lon tepdi koptokni,  
Mo‘ljal olib oftobni.  
Koptok uchdi osmonga,  
To‘g‘ri quyosh tomonga.

Yo‘lda maqtandi koptok:  
— Ko‘rdingmi, do‘stim oftob,  
Men ham uchishni ko‘kda —  
Orzu qilaman ko‘pdan.

Uchayapman sen sari —  
Yer yo‘ldoshi singari.  
Kulib oftob  
Der shu tob:

— Sen qaydayu men qayda,  
Bunday maqtanma qayta.  
Intilsa-da, koptok — to‘p  
Uchib borolmadi ko‘p.

Kuchi tugadi asta —  
Tusha boshladi pastga.  
Yerda yotardi koptok,  
Kulardi ko‘kda oftob.

### CHUMOLI BILAN MIRSOLI

Dars tayyorlab o‘tirardi Mirsoli,  
Izn bermay qiynar edi misoli.  
Har xil yo‘lda ishlar edi, bo‘lmasdi,  
Xunob edi, ko‘ngli aslo to‘lmasdi.  
“Endi sira ishlolmasman, ehtimol”,  
Deya umid uzib, surar ming xayol.  
Qarasaki, tokcha tomon chumoli  
Chiqardi sal, tushar yana yiqilib,  
O‘ylardi u:

“Chiqvolsin-da, ishqilib”.  
Yiqilsa ham intilardi yuqori,  
Oxirida kelmay qoldi madori.  
Dam oldiyu yana qildi harakat,  
Degandayin harakatdan barakat.  
Oxir chiqdi yuqoriga chumoli,  
Uni ko‘rib chapak chaldi Mirsoli.  
Mirsoli der: “Odamman-ku,  
men axir!”

Yana ishga kirishdi u birma-bir.  
O‘ljasini olib tushdi chumoli  
Yechilgan chog‘ Mirsolining misoli.

### OFTOB CHIQDI OLAMGA

Oftob chiqdi olamga,  
Chopib bordim dadamga.  
Dadam ko‘chat ekardi,  
Salom berdim dadamga.  
Shunday dedim to‘satdan:  
— Keldim sizga yordamga,  
Uzatvoring ko‘chatdan.

Dadam qarab ko‘nglimga,  
Tutqazdilar qo‘limga  
Bir tup luchchak shaftoli  
Va dedilar shunday so‘z:  
— Sen ham bog‘bon misoli,  
Parvarishlab, uzma ko‘z.  
Ariq bo‘yini o‘ydim,  
Bir chelakcha suv quydim.  
Ko‘chatni ekib qo‘ydim,  
Menga topildi soz ish,  
Doim qildim parvarish.  
Ekkан yilim yoz chog‘i,  
Chiqdi ancha yaprog‘i.  
Suv boyladim ariqqa,  
Shimidi miqqa-miqqa.  
Qo‘y yemasin deb darrov  
Atrofiga tutdim g‘ov.  
Oftob chiqdi olamga,  
Chiqdim tag‘in ko‘klamga.  
Shaftoli ham shox otdi,  
Dilda havas uyg‘otdi,  
Bo‘y ko‘rsatdi yaprog‘i  
Go‘yo toycha qulog‘i.  
O‘sdi tana — poyasi.  
Qalin tushdi soyasi.  
Oftob chiqdi olamga,  
Bahor keldi dalamga.  
Borib dedim dadamga:  
— Eh, gulladi ko‘chatim —  
Aytib keldim, ko‘rsatdim.  
— O‘g‘lim, yasha, — dedilar.  
Dildan quvnar edilar.  
Yoz kezardi dalamda.  
Ko‘chatim yetti dona  
Qilgan edi nishona.

Bir-birini qilmay farq,  
Xo‘p to‘lishib pishgan g‘arq.  
Oftob chiqdi olamga,  
Chopib bordim dalamga.  
— Pishdi, — dedim dadamga,  
Dadam darrov keldilar,  
Asta terib berdilar.  
Men ulashdim hammaga:  
(Olib qo‘ydim ammamga),  
Dadamga,  
Ayamga,  
Ukamga,  
Akamga  
Va yumshog‘in buvimga,  
Hatto qoldi o‘zimga.  
Buvim der:  
— Rahmat, o‘g‘lim,  
Zab shirin ekan qo‘ling.  
— Rahmatni deng, dalamga, —  
Dedim sig‘may tanamga.  
Ayam, akam, ukam ham,  
— Rahmat, — dedilar xurram.  
Oftob chiqdi olamga,  
Chopib bordim dadamga.  
Dadam bog‘da ishlardi  
— Rahmat,— dedim dadamga.

## QISH QORI BILAN

Qish uchun viqor  
Oppoqqina qor.  
Havo top-toza,  
Oh, qanday soz-a.  
Qor uchqunlari —



Osmon unlari,  
Sochilar asta,  
Boqdim havasda.  
Kengliklar ko'rkam,  
Go'yo oq ko'klam.  
Qarang husniga:  
Yerning ustiga —  
Choyshab yoyilgan,  
Rosa, qoyilman.  
Qishning oqligi,  
Qor yumshoqligi —  
Bolakaylarning  
Sho'x-quvnoqligi  
Yoqqandan yoqar,  
Dilga o't yoqar.  
Bolalar g'ujg'on  
O'ynar qorbo'ron.  
Bo'sh yotgan chana  
G'izillar yana.  
Qayda sirpanchiq  
Bolajonlar liq.  
Qish nomi asli  
Oppoqlik fasli.  
Badan chiniqar,  
Fikr tiniqar.  
Ey, yoqimtoy qish,  
Qoringga olqish.  
Sog'intirgan qor  
Keltirgay bahor.

## ONA TILIM — ONA TILIM

Tilim chiqqan  
So'zing bilan,

Dilim ravshan  
O'zing bilan.  
Faxr etadir  
Xalqim — elim,  
Ona tilim — ona tilim.  
Oq-qorani  
Taniganim,  
Senga bog'liq  
Jonim-tanim.  
Kitoblarim  
Bergay bilim,  
Ona tilim — ona tilim.  
Onam aytgan  
Allalarni,  
To'y, bayramda  
Yallalarni,  
Eshitganim  
Ertak-naqlim —  
Ona tilim — ona tilim.  
Otajonim  
O'gitidan,  
Volidamning  
Oq sutidan,  
Oldim bahra,  
Yayrar ko'nglim —  
Ona tilim — ona tilim.  
Yagonasan  
Vatan misol,  
Sendan topdim  
Baxtu iqbol,  
Xazinamsan  
Qalbim-dilim --  
Ona tilim — ona tilim.  
Har so'zimda  
Olam ma'no,

Bo'lavergin	Qodiriylar
Ravon — burro,	Kitobisan,
Bamisolি	Ey, o'zimning
Tilda bolim —	Mustaqilim,
Ona tilim — ona tilim.	Ona tilim — ona tilim.
Navoiydan	Jonimda yur,
Merosimsan,	Qonimda yur.
Taronayu	Tinglab, so'zlab
Ovozimsan,	Qilay huzur.
Ustozlardan	Sen bilan shod
Oldim ta'lim,	Kun, oy, yilim,
Ona tilim — ona tilim.	Ona tilim — ona tilim.
Qo'shiqlarim	Sendan ayon
Yangrayversin,	O'zbekligim.
Chin do'stlarim	Yaxshilarga
Anglayversin.	Ko'zbekligim.
Boyitadir	Kulgan yana
Seni naslim —	Istiqlolim —
Ona tilim — ona tilim.	Ona tilim — ona tilim.
O'stirgaysan	<b>YOZGANLARIM</b>
Tafakkurim,	<b>SIZGA YOQSA...</b>
Senga ming bor	
Tashakkurim.	
Yuragimda	Uchrashuvga
Zavqim lim-lim,	Borganimda
Ona tilim — ona tilim.	Atrofimni
Pastlar seni	O'ragan ko'p.
Yerga urdi,	Nega doim
O'zlarining	Bolalarga
Ketdi burdi.	Yozasiz, deb
Bo'lmaiding hech	So'ragan ko'p.
Tilim-tilim,	Jon-jonimga
Ona tilim — ona tilim.	Yoqadi-ey
Yassaviyning	She'r o'qishim
Xitobisan,	So'rashgani,

Dastxat yozib  
Bering, deya  
Ketkazmasdan  
O'rashgani.  
Gulday kulgan  
Jajilarga  
She'rlar yozmoq  
Savobmasmi?  
Biyron tilda  
Qo'shiq qilib,  
Aytishgani  
Javobmasmi?  
Ana shunday  
Bolalarga  
Yozmay turish  
Gunohmasmi?  
Yayrashgani,  
Sayrashgani  
Rostin ayting,  
Guvohmasmi?  
Ona xalqim  
Tuz ichirgan,

Menga mehru  
Karam bergan.  
Yuragimga  
Ilhom quyib  
Qo'llarimga  
Qalam bergan.  
Bolakaylar,  
Yozganlarim  
Birortasi  
Sizga yoqsa,  
Eng pokiza  
Dilingizga  
Yaxshilikdan  
Chiroq yoqsa, —  
Aslida shu  
Umrim bo'yi  
Erishganim  
Orzularga,  
Yuragimning  
To'lganidir  
Quvonchlaru  
Yog'dularga...



# **CHALAKAM- CHATTILAR**

**(HAJV VA HAZILLAR)**





## DO‘STIM NEGA XAFA?

Do‘stim mendan  
Aynib qoldi  
Birdaniga.  
Bilolmadim  
Sababini  
Nedan, nega?  
Oldinlari  
Oramizdan  
Qil o‘tmasdi.  
Do‘stligimiz  
Mahkam edi,  
Qilt etmasdi.  
Birdan nifoq  
Soldimikan  
Yomon o‘zga?  
Gunoh qilgan  
Bo‘lsam agar  
Aytsin yuzga.  
Holimizdan

Xabardoru  
G‘amxo‘r edik.  
Inoqlikda  
Maktab ichra  
Mashhur edik.  
Meni ko‘rgan —  
Zahoti u  
O‘zgaradi.  
Boshqa yoqqa  
Ketishga tez  
Qo‘zg‘aladi.  
Ikkalamiz  
Sababi yo‘q  
Chiqqanmiz po‘m.  
Ochilmaydi,  
Yorilmaydi,  
Tishlagan mo‘m.  
Ko‘rib turib  
Tanimasga  
Olar go‘yo...  
Oramizda  
Bormi biror



Chaqimchi yo?  
Og'aynilar,  
Bering axir  
Bir maslahat,  
Neligin  
Bilish uchun  
Yozaymi xat?

QO'RS

Sinfingizda, bolalar,  
Naq bitta qo'rs bola bor.  
Siz ham yaxshi bilasiz,  
So'zi cho'rs-cho'rs bola bor.  
Doim yurar gerdaiyib,  
Hech yaxshilik yoqmaydi.  
Bachkanalik bo'lar deb  
Sira kulib boqmaydi.  
O'ng savolga siz darhol  
Ters javobni olasiz.  
Holu ahvol so'rashib  
Goh baloga qolasiz.  
— Yaxshi yuribsanmi? — deng,  
— Nima ishing bor? — deydi.  
Yaqin kelsa kichiklar,  
— Bor, bor, nari bor! — deydi.  
Unga hech kim yoqmaydi,  
Yoqmas hech kimga o'zi.  
Qorlar yog'ib turadi  
Qovog'idan yoz kezi.  
Gapin eshitmaganlar  
Balki der:  
“Durust bola”.  
Hech qayda uchramagan,  
Bunaqangi qo'rs bola.

ZIKIR ZERIKAR

Zikirvoj zerikar,  
Do'stlardan bekinar.  
Nega u zerikar?  
Nega u bekinar?

Uyiga kiradi,  
Chiqadi hovliga.  
Betobga o'xshaydi,  
Qaranglar holiga.

O'zicha  
U picha  
Goh kezar ko'chani,  
O'ylagan mo'ljali  
Yo tezda o'chadi...

— Zikirvoy, yur,  
— desa,  
Bolalar kelishib.  
— Boringlar,  
hammang,  
— deb  
To'rsayar, kerishib.

Yurakdan aytishga  
Bir issiq so'zi yo'q.  
Ko'nglini yozishgga  
Nega hech do'sti yo'q?

Zikirvoy qo‘rqaqdir,  
Uyiga bekinar.  
Shu sabab Zikirvoy  
Zerikar, zerikar...

## MIRHAMID VA ARXIMED

Mirhamid kim?  
Arximed kim?  
Talay bola bilar balkim.  
Mirhamid, bu  
O'quvchi-ku.  
Arximed-chi — ulug' olim,  
Fizikada mashhur doim.  
Imtihonda tunov kuni  
Naq ko'rsangiz edi uni —  
Mirhamidni,  
Eslomadi Arximedni.  
Eshitinglar,  
gapning rostin,  
Aytolmabdi ixtirosin.  
Bilmasligin qilibdi fosh,  
Otlari ham qofiyadosh.  
O'shangam ham qiziqmabdi,  
Qizarmapti —  
Hatto afti.  
Xo'sh, bolalar,  
Arximed kim?  
Uni bilar butun olam.  
Bilib olsa soz bo'lardi  
Arximedni Mirhamid ham.

## KASALLIK QO'RQAR KIMDAN?

Kasallik qo'rkar kimdan?  
So'rang tabib-hakimdan:  
— Kasallik yillab, oylab  
Josusday yurar poylab.

Kasal-chi, gapning rosti,  
Suqatoyning chin do'sti.  
Yalqovlarni og'dirar,  
Ifloslikni yoqtirar.  
Mikroblar yordamchisi —  
Qo'lidagi qamchisi.  
Nojo'ya gap, jaholat  
Unga qiladi xizmat.  
Qo'rqadi u yoshlikdan,  
Chidamli — bardoshlidan,  
Mehnatda chiniqqandan,  
O'ziga kuch yiqqandan,  
Oftob, havo va suvdan,  
Qochaverar qo'rquvdan.  
Dorilardan qo'rqadi  
Bel, tomirin qirqadi.  
Ozodani ko'rganda  
Bo'ladi tez sharmanda.  
Bokschi, futbolchidan  
Qo'rkar muskul, kuchidan.  
Qo'rkar erta turgandan,  
Ko'p piyoda yurgandan.  
Xullas, kimki polvon, mard,  
Qo'rqadi kasallik — dard!

## SOG'LIG'IN YONDIRAR

To'rt bola tanaffus chog'ida,  
Sanqishib maktabning bog'ida,  
Ohista chetroqqa chiqishar,  
Galma-gal papiros chekishar.  
  
Og'izdan qop-qora "halqalar"  
Haryonga zaharday tarqalar.



Hisoblab bu ishni to‘g‘riday,  
Atrofga alanglar o‘g‘riday...

Ularning otini bilmasdum,  
Bilsam-da, og‘zimga olmasdim.  
Axloqi o‘xshamas butunga,  
O‘pkasin to‘ldirar tutunga.

Chekishar, chekishar to‘rtovi,  
Burqsiydi tutuni — olovi,  
O‘zidan o‘zligin tondirar,  
Olovda sog‘lig‘in yondirar.

### **KESATAR — KESAK OTAR**

Bir bola bor u haqda  
She’r yozmasam bo‘lmaydi.  
Labi tirjaygan choqda  
Ko‘zi sira kulmaydi.

So‘rashda holu ahvol  
Tili sayrar — tezotar.  
Ahvolingizni darhol  
Zimdan boqib kuzatar.

Maqtab turar-da, lekin  
Kulib-kulib kesatar.  
Ko‘ngil bog‘iga sekin  
So‘zdan tosh-kesak otar.

Kesatar —  
Kesak otar.  
Avval hayron qiladi.  
Har so‘zida bor xatar,  
Dilni vayron qiladi.

### **XOLMAT NEGA SO‘KINAR?**

Nima uchun Xolmatvoy  
Ko‘cha-ko‘yda so‘kinar?  
Nahot bema’ni odat —  
So‘kinishdan naf unar?

Eshitganning dilida  
So‘zi qolar dog‘ bo‘lib.  
Bopladimmi rosayam —  
Deydi kayfi “chog“ bo‘lib.

So‘kingani so‘kingan  
So‘z tagini o‘ylamay.  
Qo‘ni-qo‘shni bolalar  
Qochar undan, o‘ynamay.

Xolmatvoyning til, og‘zi  
Eh, shunchalar bemaza.  
Odamlarning ixlosi —  
Nega qaytar bo‘lmasa?

Aytib qo‘ying, Xolmatga,  
So‘kinishni tashlasin.  
Eng avvali, yaxshilab —  
Tilni mahkam tishlasin.

Qachongacha so‘kinar?  
Tezda o‘zi o‘kinar.

### **PALAPARTISH**

Bor ekan bir  
Palapartish.



Yurish-turish,  
Yeyishida,  
Biror nima  
Deyishida,  
Na tartib bor  
Na halovat,  
Na bor rohat.  
Go'yo hali  
Quyilmagan,  
Yaxshi ishda  
Suyilmagan,  
Manfaat yo'q  
Oilaga,  
Bo'ysunmasmi  
Qoidaga?  
Goho o'xshar  
Yengiltakka,  
Muhtojmikan  
Yo kaltakka?  
Yo'g'-ey, unday  
Demay turing,  
Tezda yaxshi  
Tomon buring.  
U ehtimol,  
Hali nihol.  
Bo'lsa hamki  
Palapartish,  
Unga kerak  
Zo'r parvarish.  
Aytayin chin,  
Bo'lmanq faqat  
Tomoshabin.  
Yelkasini  
Silash kerak,  
O'rni kelsa

Siylash kerak.  
Uchrab qolsa  
Palapartish  
Uni yaxshi  
Yo'lga tortish  
Eng ulug' ish,  
Eng qutlug' ish!

## DOSKAGA CHIQSA AGAR...

Bitta bola doskaga —  
Chiqsa o'zin yo'qotar.  
Nazarida har bola  
Ko'zi bilan o'q otar.

Rangi o'chib bir zumda  
Yuragi "shuv" etadi.  
Xayolinining kaptari  
Uchib g'uv-g'uv etadi.

Bilganlari esiga  
Kelmaydi biror marta.  
Bari edi yodida  
O'tirganda partada.

O'qituvchi yangimas,  
Mehribon va muloyim.  
Tushuntirar yaxshilab  
O'z darsini har doim.

Qarolmaydi, ayniqsa,  
Bolalarning ko'ziga.  
Biroq o'sha bolaning  
O'zi hayron o'ziga.

Yurib-yurib oxiri  
Bitta tadbir o'yladi.  
Dars tugagach, doskada —  
O'z-o'ziga so'yladi.

Takrorladi bu holni,  
Hamma bor deb his etdi.  
Bo'shanglikni,  
Qo'rquvni  
Oxiri u yiqitdi.

Endi chiqsa doskaga  
Bulbulni lol qoldirar.  
Uni na ter bosadi,  
Na biror bor qaltiar.

O'zi xursand o'zidan  
Bo'shalganday tutqundan.  
O'qituvchisi mamnun,  
Do'stlari ham shod undan.

## HARFLARI CHARCHAGANMISH

Bir bolaning harflari  
Chizma-chiziq.  
Nega bunday chizma-chiziq?  
Juda qiziq...  
Qoidalı yozilmagan  
Biror harf.  
So'zdan chiqar turli ma'no,  
Turli ta'rif.  
Bormi ayb yo ruchkada,  
Yo qog'ozda?  
Qanday qilib bilim olar

Shu alpozda.  
Nuqson bormi u bolaning  
Ko'z, qo'lida?  
Bu ahvoli chakkimasmish  
O'z ko'nglida.  
Harflarichi, go'yo ishlab  
Charchasharmish...  
Shu sababdan  
chaplasharmish,  
Chalkasharmish...  
Yo'q, boshqadir uning asos,  
Masalasi.  
Charchab qolgan u bolaning  
Hafsalasi.

## ALDAYDI KIMNI?

Aytayinmi bir savolimni,  
Darsdan qochgan aldaydi kimni?  
To'rtta bola kecha dars payti  
G'oyib bo'ldi misoli daydi.  
"Ko'rmadimi hech kim basharti",  
Deb pastqamda alanglashardi.  
O'qituvchi yangi dars o'tar,  
Keb qolar, deb ularni kutar.  
Ota-onas esa uyida  
Darsda, degan xayol-o'yida...  
Bolalar-chi, sanqishar bo'm-bo'sh,  
Ular kimni aldashadi, xo'sh?  
Ayta qolay gapning uchini,  
Aldashadi o'qituvchini.  
Topishar-da vaj-bahonasin,  
Aldashadi ota-onasin...  
Bular juda qattiq adashar  
Asli ular o'zni aldashar!

## CHIZILMAGAN QULOQ

Ahad ishlab ukasin rasmin,  
Yozib qo'ydi tagiga ismin.  
Ishlagandi qo'ldan kelgancha,  
Yuz-ko'zini o'xhatgan ancha.  
Ko'rgan odam shu zahotyoq —  
So'rар edi: — Nega bequloq?  
Oyijoni quloqsizsan, deb  
Ukasini koyirdi hadeb.  
Ahad o'ylab yuribdi shundoq:  
Gapga kirsa chizarmish quloq.

## KIMGA MAZA, KIMGA QIYIN?

Bir bola der akasiga:  
— Rosa maza, aka, sizga.  
Menga esa juda qiyin,  
Tug'ilganman sizdan keyin.  
Aka so'rар:  
— Ayt-chi, menga,  
Nega qiyin ekan senga?  
Ukajoni o'ylab shu tob,  
Bilganicha to'qir javob:  
— Deyishadi, kichkinasan,  
Qilishmaydi nazar-pisand.  
Siz o'qiysiz o'ninchida,  
Men-chi, to'rtga o'tdim endi.  
Xo'rliklarim kelar juda,  
Birdan katta bo'lsam edi...  
Aka esa undan kular,  
Uka gapni gapga ular:  
— O'sib ketgan bo'yingiz ham,

Ishlar aqlu o'yingiz ham.  
Tushib qolsa qorong'i — kech  
Yurolasiz qo'rqmasdan hech.  
Akasi ham asta o'ylar,  
Bilganicha unga so'ylar:  
— Ey, ukajon, hali shoshma,  
O'z haddingdan darrov oshma.  
Yoningdadir yoshlik — baxting,  
Hozir sening shirin vaqting.  
Tushunasan keyin-keyin,  
Senga emas, menga qiyin.

## BILAG'ONLAR YETISHMAS

Bilasizmi, bir sinfda  
Bilag'onlar yetishmas.  
Ilg'orlarni qoloqvoylar  
Sira quvib yetishmas.  
Qoloqlarni ilg'orlarga  
Bir kun taqsim qilishdi.  
Sinfdoshlar o'z ahvolin  
Yana chuqur bilishdi.  
Eng yomoni, qoloqlar hech —  
Yurishmasmish yetakka.  
Yoki bog'lash zarurmikan  
Etaklarin etakka?  
Og'zidagi o'z ovqatin  
Kim ham deydi: "Chaynab ber".  
Har bir kimsa o'z ovqatin  
O'zi chaynab, o'zi yer.  
Eng yaxshisi, qoloqlarning  
O'zi qilsin harakat.  
Xalqimizda shunday gap bor:  
"Harakatdan barakat".

## BIR YARIM KARIM

Bir sinfda o‘qiydi  
    ikkita Karim.  
Bittasin to‘la, derlar,  
    bittasin yarim.  
Hayron qoldim rosayam  
    bunday laqabga,  
Bilish uchun bir kuni  
    bordim maktabga.  
Yarim Karim kimdir, deb  
    so‘radim asta.  
Yarim Karim degani  
    juda barvasta.  
Selitra yeganday  
    rosa g‘ovlagan,  
Yarim deyish noo‘rin  
    shunday gavdaga.  
Yarim deyishlariga  
    bor boshqa asos.  
Gavdasimas, ishiga  
    qilishgan qiyos.  
Kitob, daftar yirtilib  
    bo‘libdi yarim,  
Bunga parvo qilmaskan  
    g‘ovlagan Karim.  
To‘la Karim degan-chi,  
    kichkina, ushoq,  
O‘qish, ishi joyida,  
    juda tirishqoq.  
Demak, o‘qir u yerda  
    bir yarim Karim,  
Chaqing gapning mag‘zini  
    endi,  
                do‘stilarim.

## OYIM OLAR YONIMNI

Turgim kelmas ertalab,  
Bilmayman ne sababdan?  
Uyg‘onaman amallab,  
Kech qolmay deb maktabdani.  
  
Turgim kelmas sirayam  
Yotaversam o‘ralib.  
Boshqalarga qarayman, —  
Ko‘rpadan sal mo‘ralab...  
  
Yumshoqqina yostiqdan  
Ko‘tarmasam kallamni,  
Bilishmasmi boshqalar  
Shunday shirin pallani?!

Birov turgin deyishin  
Doim poylab yotaman.  
Goh ko‘zimni yumvolib,  
Yolg‘on xurrak otaman.

Dadamlar-chi, ba’zida  
Qaraydilar xo‘mrayib...  
Akam piching otadi:  
“Bo‘lganmisan, — deb,  
    — mayib?”

Kimdir kelib bildirmay,  
Oyog‘imni chimchilar.  
Gapirishar oyimga  
Ba‘zi bir “chaqimchilar”.

Bittagina oyimlar  
Oladilar yonimni.



Orom olsin, deydilar  
 Oyijonim, jonio...  
 Faqtgina ertalab  
 Turganimga doim kech,  
 Ko'pchilik uy ichida  
 Yoqtirishmas meni hech!

### XOLIQ — “OSHIQ”

Bir qarang-a, anov Xoliq  
 Yurar doim qovoq solib...  
 O'qyidi u yettinchida,  
 O'ylagani o'z ichida...  
 Quruq qolgan nimadan u?  
 Arazmikan barchadan u?  
 O'zin jiddiy tutar go'yo,  
 Biror nima bo'lganmi yo?  
 Urishganmi yo oyisi?  
 Bo'lsa kerak bir boisi.

Yuragiga tushganday cho'g',  
 Goho-goho tortadi "uh".  
 Gapirmaydi yo ochilib,  
 Qovoqlari naq osilib,  
 Yerga tushay-tushay debdi.  
 Bu hol unga qaydan kepti?  
 O'qishlari ancha durust,  
 Sezilmaydi hech kamu ko'st.

Men ham bir oz o'ylab yurdim,  
 Bolalardan so'rab ko'rdim.  
 Bitta bola kelib sekin, —  
 Aytdi-ko'ydi uning sirin:  
 — Chalg'itmoqda sizni, bizni,  
 Sevib qolgan bitta qizni...

### MAYLI BERISHSIN JAZO

Bir kun jahl ustida  
 Bir bolani so'kkandim...  
 Shundan beri, rosti-da  
 Yemoqdaman xo'p pandim.  
 Yomonlar haqida gap  
 Ketib qolsa ba'zida, —  
 Mening ismim bo'ladi  
 Odamlarning og'zida.  
 Qancha yaxshi ishlarim  
 Ko'zga sira ko'rinnmas.  
 Dog'ni olib tashlashga  
 Nega hech kim urinmas?!

Mayli bersinlar jazo,  
 Bo'laman jon deb rizo.  
 Lekin o'sha "gapimni"  
 Yuzga solmangiz boshqa.  
 ...Bir og'iz yomon so'zim  
 Eh,

balo bo'ldi boshga.

### UCH BOLANING JANJALI

Bitta ota-onaning  
 Bordir uchta bolasi.  
 Ammo uchalasining  
 Xulqida bor olasi.  
 Aka-uka va singil  
 Bir zum o'tmay jiqqamusht.  
 Janjalini ko'riboq  
 Deysiz o'ngmi bu yo tush.  
 Zo'r janjalga bosh bo'lar

Arzimagan bahona.  
Qarabsizki uy ichi  
Bo‘lib ketar “jang”xona.  
Ko‘rpa-to‘sak otilar,  
Yostiq o‘xshar koptokka,  
Uchovi ham o‘quvchi,  
Uchovi ham kap-katta.  
Bir-birining mehrini  
Yoki yeb qo‘yishganmi?  
Axir, ular jigar-ku,  
Shunchalik to‘yishganmi?  
Kichiklarga, ayniqsa,  
Kattakoni bermas kun.  
Xo‘jayinlik qilarmi –  
Xizmat qil deb, men uchun?  
Aka bo‘lsa ukani  
Birdan quvib chiqadi.  
Singlisi ham zum o‘tmay  
Oyisiga chaqadi.  
Akalar ni qarang-ki,  
Singlisini siylamas.  
Qizcha ham o‘z o‘rnida  
Akalarin sizlamas.  
Goho hayron qolasiz  
Uchovi apoq-chapoq.  
Yana bir ozdan keyin  
Ahvol bo‘ladi chatoq.  
Maktabga jo‘nashguncha  
Shu tariqa “jang” bo‘lar.  
Ularning “dod-voy”idan  
Qul oqlar garang bo‘lar.  
Har qanaqa urushga  
Bizlar doim qarshimiz.  
Uyda, elda, jahonda  
Totuvlik bo‘lsin hargiz.

## UZR SO‘RAYMAN

Ancha yoshga borsam-da hatto  
Yoshligimda qilganman xato –  
Qarzim borday go‘yo birovda,  
Vijdonimni etar bezovta.  
Hammagini eslab bahuzur  
Ta’zim bilan so‘rayman uzr.

O‘sha kezlar aqlim ekan xom,  
Keksalarga bermasdan salom –  
O‘tar edim doim gerdayib.  
Eh, bu holat juda ham ayb...  
Hamon dilda xijolat kezur,  
Tinchirmanmi so‘rasam uzr?

Bir odamni so‘kib qochgandim,  
Qo‘rqib bog‘dan boqqa oshgandim.  
O‘tolmasdim keyin bog‘ tomon,  
Nomim bo‘lgan edi ko‘p yomon.  
Qilmishimga yegayman ta‘zir,  
Kechirarmi so‘rasam uzr?

Bir kun menga buyurishdi ish,  
“Voy-voy jonim, og‘riyapti tish”,  
Deya ko‘zni qilgan edim lo‘q.  
O‘sha tishim tushgan, hozir yo‘q.  
Yolg‘onimdan ko‘nglim behuzur,  
Bo‘ynim egib, so‘rayman uzr.

Jismoniy tarbiya darslarin  
Kerakmas deb o‘ylaganim chin.  
Chiniqmadni muskulim, tanim,  
Esimda bor qatnashmaganim.  
Hozir jonim og‘riydi zir-zir,  
Kelisharmi so‘rasam uzr.

Uy ishini oldim ko‘chirib,  
O‘qituvchim “5” qo‘ydi ko‘rib.  
Ustozimni, demak, aldadim.  
Bu ish bo‘lib o‘tsa ham qadim,  
Yo‘lga chiqib har kun muntazir —  
Tayyordirman so‘rashga uzr.

Gunohlarim barini o‘zim,  
Aytish uchun chidamas yuzim.  
Ey, bolalar, iltimosim bor:  
Xatolarim qilmanglar takror,  
Sizlar uchun imkon bor hozir,  
Keyin ketmas pushaymon — uzr.

### IKKI XIRA

O‘tirardim she‘r yodlab,  
O‘ylab xonamda.  
Xira pashsha uchardi  
Mana shu damda.  
Chap tarafdan quvlasam,  
Kelardi o‘ngdan.  
Mushkul edi judayam  
Qutulmoq undan!  
Rosayam chaqqon ekan  
Bo‘Imadi tutib.  
O‘tiraymi pashshaning  
Ketishin kutib?  
Kitobimni olib, so‘ng  
Ko‘chaga chiqdim.  
Shu on bitta oshnamga  
Nogoh yo‘liqdim.  
Qayga borsam ergashib,  
Tutadi gapga,  
Bidir-bidir gaplari

Tegar asabga.  
Qutulgandim pashshadan  
Eson va omon,  
Bilolmayman, oshnamdan  
Ketay qay tomon?  
Qilolmayman darsimni  
Sirayam — sira!  
Uchraganmi sizga ham  
Shundayin XIRA?

### SALOMIGA ZOR EMASDIM...

Salom bermay o‘tib ketdi  
To‘rt qizaloq...  
Hayratdaman, tush ko‘rganday  
Aloq-chaloq.  
O‘ylagandim berishar deb  
To‘rtov salom,  
To‘rtovidan bittasi ham  
Demadi lom!  
Ko‘rmaganday, bezraygancha  
O‘tib ketdi...  
Yuragimdan ming xijillik  
Tutib ketdi!  
Shu xijillik bo‘limganda  
Gap ochmasdim,  
Men ularning salomiga  
Muhtojmasdim.  
Bunday holni ko‘rmagandim  
Sira-sira.  
Yo ko‘zlarin bosdimikan  
G‘urur — shira?  
Qaytishardi maktabdani-a,  
Qo‘lda papka.

Zimdan boqdim,  
Chalg‘ishmagan  
Boshqa gapga.  
Bari tanish,  
Yashar bizning mahallada.  
Xayollari qayda edi  
Shu pallada?  
Salomiga olar edim  
Men ham alik.  
Bo‘larmikan odobsizlik,  
Eh, shunchalik?..  
Qayga ketdi ulardan or,  
Madaniyat?  
Salom bersa tilar edim  
Yaxshi niyat.  
Qizaloqlar holatiga  
Men achindim.  
Odobiga, odatiga  
Ming achindim.

### KITOBI KO‘TARIB...

Bordir bitta bolakay,  
(Ismin yozmay har qalay,  
Tag‘in xafa bo‘lmasin,  
Yaqinlari kulmasin).  
Doim kitob qo‘lida  
Hatto yurgan yo‘lida.  
Qarasangiz ba’zida,  
O‘qiyotgan tarzda –  
Varaqlar kitobini,  
Izlaganday bobini.  
Aytaymi gapning rostin?  
Sirayam o‘qimasdi,

Kitobxon deb bilsin, deb  
Ko‘rgan havas qilsin, deb  
Yurar edi maqtanib,  
Soxta obro‘ axtarib.  
Shunday bola uchrasa,  
Gapim bor edi rosa:  
Kitob ko‘targan bilan  
Obro‘ bo‘lmaydi baland.  
Bilib qo‘ysin bolakay,  
Hadeb kitob ko‘tarmay,  
Birma-bir o‘qib chiqsin,  
Mag‘zi-mag‘zini chaqsin.  
Ilmi yana ko‘payar,  
Kitob uni ko‘tarar.

### BURUN BILAN QULOQ MASALI

*(Abdulla To‘qayga nazira)*

Ming‘ir-ming‘ir gapirib bir kun  
Maqtanibdi Qulooqqa Burun.  
Har gapida qilibdi dimog‘:  
— Bilasanmi, og‘ayni Qulooq,  
Sen va Ko‘zdan obro‘yim katta,  
Atrofimda Yuz ham xizmatda.

Hatto mendan keyin turar Ko‘z.  
Baring meni etasan ko‘z-ko‘z.  
Ko‘rinaman hammangdan burun  
Shu sababdan nomim ham Burun.

Ko‘tarilib Burun osmonga,  
Qaramabdi uyon-buyonga.  
Qo‘rganidan o‘zin yuqori  
Do‘sclarining kelibdi ori.

## O'QITUVCHI BAHO QO'YGANDA

Shivirlashib Quloq bilan Ko'z,  
Bitta yerga qo'yishibdi so'z:  
— Nega bizni qilmaydi izzat,  
Burunga hech etmaymiz xizmat!

Ko'z yumilib ko'rmabdi atay,  
Quloq qolmish taqqa eshitmay.  
Ko'z, Quloqsiz Burun maqtanchoq  
Bir devorga urilmish shu choq.

Qarang, Burun bo'l mish dabdala...  
Burundan bor shunday masala.

### CHIN VA YOLG'ON

Bir og'izdan chiqsa ham ikkov,  
Chinga Yolg'on bo'lar edi g'ov.  
Yolg'on goho og'iz to'ldirib  
Va'da berar rosa ko'pirib.  
Sirim aslo ochilmasin deb  
Yurar Yolg'on ich-etini yeb.  
Shu sababdan egri yo'l chizar,  
Anqov bilan laqmani izlar.  
Yomonlarning ko'nglin chog' etar,  
Yaxshilarni yo'ldan chalg'itar.

Hurmat-izzat topganidan Chin,  
Yurar edi misoli lochin.  
Chin — quyoshning nuriga o'xshar,  
Uning bilan hammayoq yashnar.  
Chin insonga suv va havodir.  
Har narsaga doimo qodir.  
Kimki bo'lqa Chinga hamroh, do'st,  
Unda bo'lmas sira kamu ko'st.  
Dushmanidan ham battardir Yolg'on,  
Unga dildan bermangiz makon.

Dars paytida olganingda "besh"  
Hammayoqdan yog'adi olqish.  
Kim sevinar, qani, bilgin-chi,  
Barchadan ham bo'lib birinchi?  
O'qituvching birinchi bo'lib —  
Miyig'ida qo'yadi kulib.  
Qo'yayotib "a'lo" bahoni  
Qo'yayotgan bo'lar o'ziga.  
Yayrab ketar ko'ngli, vijdoni,  
Eh, qarasang shunda ko'ziga...  
Dars chog'ida olsang-chi "ikki"  
O'qituvching holi sezilar:  
Eshitganday kimdandir dakki  
Yurak-bag'ri rosa ezilar.  
Javobingga "ikki" bahoni  
Hech qo'ygisi kelmay turadi.  
Xira bo'lib ko'ngli — vijdoni  
Achinadi, xayol suradi...  
Go'yo yurak daftariga dog'  
Tomgandayin bo'ladi shu chog'.  
Sinfga ham g'ashlik cho'kkanday.  
Shodlik guli bargain to'kkanday.  
Hammaning ham tushar qovog'i,  
Senga ayon gapning uyog'i...  
Xizmat qilib, berib shuncha dars  
Ezilishi sira yaxshimas —  
O'z mehnati ketganda bekor  
Kim bo'lmasin, chekadi ozor.  
Eh, "besh" olib chamanga kirsang,  
Guldan ko'char yuzlaringga rang.  
Oshib borar hurmat, obro'ying,  
Sevinadi mahallang, uying.



Kirganingda hatto eshikdan,  
Qiyqiradi ukang beshikdan.  
“Ikki” olsang, ne derkin otang?  
Onajoning deydi: “Eh, attang...”  
Shu sababdan olsang doim “besh”  
Hammayoqdan yog‘adi olqish.

## ILMDAN ODOB KUCHLI

“Ilmdan ham kuchlidir odob,  
Bu bir naql, mag‘zi-tagin top”,  
Deb gapirgan edilar oyim,  
O‘ylar edim topishni doim.  
O‘qib chiqdim talay ertaklar,  
Naql meni hamon yetaklar.  
Izlar edim birorta misol,  
Hamroh edi har yerda xayol.  
Uchrab qoldi menga bir odam,  
Olim sifat edi chinakam.  
Balki uyi to‘la kitobga,  
Yo yetolmas o‘zi hisobga.  
Ko‘rgan odam uni hoynahoy,  
O‘ylanmay der, zap ilmga boy.  
Sochlari ham savat, jingalak,  
Ilmligidan beradi darak.  
Balki bilar juda ko‘p narsa,  
Biror fandan agar bahs borsa –  
Darrov unga qo‘shar luqma – gap.  
Bilolmasa berar edi chap.  
Tosh qo‘ymasdan u taroziga,  
Ko‘char edi boshqa mavzuga.  
Na gapining ilig‘i bordir,  
Na yoqimli qilig‘i bordir.  
O‘z ko‘nglida go‘yo shunday der:

“Avval o‘zing menga salom ber!”  
Ilmim bor deb rosa to‘rsayar,  
Qochadilar uni ko‘rsalar.  
Go‘yo undan to‘yishgan edi,  
Gaplashmasdan qo‘yishgan edi.  
Shunday odam,

ayting, yaxshimi

Chiqib qolsa chetga-chiqitga?  
Bilimga boy shunday yigitga  
Birdaniga hamma qarshimi?!  
Uchrab qoldi yana bir odam,  
Odobga boy edi chinakam.  
Hamma yerda topolgan e’zoz,  
Ilmi kabi odobi ham soz.  
Soxta obro‘ axtarmas edi,  
Ilmim bor deb maqtanmas edi.  
Biror odam so‘rasa savol,  
Qulqoq tutar jilmayib xiyol.  
So‘zlarining borday asali  
Suhbati ko‘p edi mazali.  
Keksa-yoshta edi bir xilda,  
Bir xildagi eng shirin tilda –  
Ochar edi yurak-qalbini,  
Bildirardi odob qadrini.  
Ikkovini, qarang, yaqinda  
Uchratgandim bir to‘y – yig‘inda,  
Ho‘, oldingi, “ilm”li yigit  
Kirib keldi amaldor taxlit.  
Ko‘rinishda dimog‘ osmonda,  
Bosh silkitar ahyon-ahyonda,  
Ammo hech kim bermas e’tibor,  
Degan kabi go‘yo nari bor.  
Hatto “keling” deya aytishmas,  
Ko‘rib turib yo‘ldan qaytishmas...  
Kelgan edi odobli yigit,

Birdan barcha dilida “yilt-yilt”  
Go‘yo chiroq yonganday bo‘ldi,  
Yon-veriga odamlar to‘ldi.  
Darrov “keling-keling”,  
deyishdi,  
Hurmat bilan to‘rga eltishdi.  
Mana, ko‘ring ikki xil holat,  
Ikki odob, ikki xil odat.  
“Odob kuchli erur bilimdan”,  
Degan naql o‘tdi dilimdan.  
Har bir odam olgan bilimin,  
Bilim to‘la aqliyu dilin —  
Odob-ta’lim bilan bezasa  
Bo‘lar edi rosayam maza...  
Bilimining nafi tegardi,  
Xalqi doim rahmat deyardi.

Tinglashar axir.  
O‘g‘il bolalar ishi  
O‘xshar qiyinda.  
Yoppasiga berilgan  
Ular o‘yinga.  
Yetkazishib sinfnai  
Talay maqsadga,  
Qizlar keltirar obro‘  
Ona maktabga.  
O‘g‘il bolalarda-chi  
Yo‘qday hafsalan,  
Buyurilsa biror ish  
Qilishar chala.  
O‘zlarini o‘zlarini  
Ololmay qo‘lga,  
Dars tugasa, chopishar  
G‘izza futbolga.  
Barcha yaxshi biladi  
O‘qish — birinchi,  
O‘g‘il bolalar, menga —  
Qulqoq bering-chi!  
Yurakdan aytadigan  
So‘zim bor sizga,  
So‘zlarimga tushunib,  
Tushsangiz izga.  
Sizga nima bo‘ldi, hey,  
O‘g‘il bolalar?  
Qomatlari shertaxlit,  
Norg‘ul bolalar.  
Begonaday kelasiz.  
Shunday maktabga,  
Qachongacha chidaysiz  
Tanqidga — gapga?  
Kamchililingizingiz bormi  
Yoki qizlardan?

## SIZGA NIMA BO‘LDI, O‘G‘IL BOLALAR?

Qizlar yaxshi o‘qishar  
Anov mактабда.  
Boshqa bir ma’no bordir,  
Balki bu gapda.  
O’sha maktabga bordim  
Bir kun ataylab.  
Gapning tagin o‘rgандим  
Asta, avaylab.  
O‘g‘il bolalar, nega  
O‘qisharkan bo‘sҳ?  
Qoloq bo‘lishlariga  
Sabab bormi, xo‘sҳ?!

O‘qituvchi ham o‘sha,  
Sinflari bir.  
Bir xil darsni hamisha

Hammanning umidi zo'r  
Doim sizlardan.  
Qiz bolalar oldida  
Uyatmasmi hech?  
Bilim olish faslidan  
Qolmoqdasiz kech!

## XOM TARVUZ

Uchta sherik qovun bozordan  
Keltirishib kecha bir tarvuz,  
Galma-galdan maqtashib obdan  
Bir-biriga berishmasdi so'z.  
Xarid qilgan taruzlari-chi,  
Teng kelardi kattakon sharga.  
Qaraganda qilardi yalt-yalt,  
Po'sti o'xshar edi marmarga.  
Uchovida ishtaha karnay,  
Keltirishdi pichoq va lagan.  
Maqtanardi Asadvoy shunday:  
— Akangiz-da, uni tanlagan!  
Nurmat uni so'ymasdan burun  
Ko'rgan edi uch-to'rt bor chertib...  
Tarovuz po'k-po'k etardi nechun?  
— Tez so'ysang-chi,  
— der Asad jerkib.  
Tarovuz bo'ldi qoq ikki palla,  
Biroq chiqdi paxtaday oppoq,  
Qay ko'z bilan ko'ring shu palla.  
Xomush tortib shunda uch o'rtoq  
Bir-biriga qarab qo'yishdi.  
Xip bo'g'ildi ishtaha, tomoq,  
Yemasdanoq go'yo to'yishdi.  
Uch og'ayni qotirdi miya,  
Bilolmasdan taruz sirini.

— Sen tanlading.  
— Sen so'yding, — deya  
Ayplashdi biri-birini.  
Agar tarvuz chiqsa g'o'r, oppoq,  
Ey, bolalar, bo'shashmang tamom.  
Har ish ilmin o'rganining tezroq,  
Ayting-ayting, bosh bo'lmasin xom.

**TO'NKAGA  
TO'NKADI  
TO'LANVOY**

To'lanvoy bir kun  
Ketmay yo'lkadan,  
Oshib o'tmoqchi  
Bo'ldi to'nkadan.  
Sakragan edi  
Chaqqonlik qilib,  
To'nka chetiga  
Ketdi qoqilib.  
Chalpakday bo'lib  
Yerda yotardi.  
Bir do'sti kelib  
Asta ko'tardi.  
Hamma gunohni  
To'nkaza to'nkab,  
Turolmas To'lan  
O'zini o'nglab...

# TUYA KO'RJDINGMI?

“Tuya ko’rdingmi, yo‘q de!”  
Ba’zilar yalinishar,  
Yoinki biror sirni

Kim dandir yashirishar.  
Bobomlardan so'radim  
Bu gapning tag-mag'zini.  
Diqqat bilan tingladim  
Ularning so'z-darsini.  
Bobom derlar:  
— Hali ham,  
Bu voqea yodimda,  
Kambag'alning tuyasin  
O'g'ri urgan qadimda.  
O'g'ri kimni uchratsa:  
— Tuyani ko'rganim yo'q,  
Aytasan egasiga! —  
Deya qilavergan do'q.  
Tuya, axir ignamas,  
O'rakchi tog'day esa.  
Kim "yo'q" deya bo'zrayar  
Tuya ko'rdingmi desa?  
Qo'rqoqlarni mo'ljallab  
Aytildi bu naql.  
Shuning uchun har joyda  
Ishlat tadbir va aql.  
Ko'rib turgan narsasin  
Ko'rmadim, deb tonish bu.  
O'zi-o'z vijdonini  
Aldash bu,  
Aldanish bu!

## USHLAMOQCHI UYQUNI

Ahmad yotar o'mida  
Baqraytirib ko'zini.  
Poyloqchiga o'xshatdim  
Shu top uning o'zini.

— Nega uxlamaysan? — deb  
So'ragandim hol-ahvol, —  
Uyquni ushiamoqchi —  
Bo'lganin aytdi darhol.  
Yana tutdim savolga:  
— Ushlab nima qilasan?  
Shivirlab der ohista:  
— Shoshma, keyin bilasan.  
Agarda ushlab olsam  
Sim qafasga solaman.  
Kerak bo'lgan mahali  
Darrov ishga solaman.  
Shunday deya bechora  
Ko'zin yummas ataylab.  
Hamon uyg'oq yotardi  
Uyqu kelishin poylab...

Ey, bolalar, bolalar,  
Uni qaranglar, uni,  
Ahmadjon xurraq otar  
Ushlolmasdan uyquni.

## BARCHA MENI TERGAYDI...

Hamma meni  
Tergaydi, qarang,  
Ammo yordam  
Bermaydi, qarang.  
Eshitganim  
Nuqul nasihat,  
Asablarim  
Bo'ldi-ku tarang!  
Kechagi gap  
Aytilar bugun,





Quloqlarim  
 Emas-ku garang!  
 Ular mendan  
 Katta, albatta,  
 O'zni tutib  
 Yuribman arang.  
 Uyqumda ham  
 O'sha so'zlar-chi,  
 Qilishadi  
 Jarang va jarang.  
 Axir men ham  
 Bo'lay mustaqil!  
 Boshim emas  
 Unchalik zarang!  
 Hamma meni  
 Tergaydi, qarang...

### **SULAYTIRDI O'ZINI**

Bitta bola qo'zichog'in  
 O'tlatardi.  
 O'tloqlarda chopqillatib  
 O'ynatardi.  
 Ushlab olib kallasiga  
 Kalla qilar.  
 Gohida zo'r chiqqan bo'lib,  
 "Alla" qilar.  
 Qo'zisini o'z holiga  
 Qo'ymas edi.  
 "Gij-gij" lashga sira-sira  
 To'ymas edi.  
 Zo'r suzong'ich bo'lib chiqdi  
 Qo'zichog'i.  
 Qochib qolar kichkintoylar

Ko'rgan chog'i.  
 O'rgatgani uchun, qarang,  
 Qo'zini u,  
 Eng birinchi sulaytirdi  
 O'zini u...

### **QO'RQOQ EKAN ZO'R BOLA...**

Bitta murg'ak bolani  
 Devday bola do'pposlar.  
 Qilgan qanday yomonlik,  
 Bormi unda asoslar?  
 U shunchalik zo'r ekan,  
 Nega endi halloslar?  
 Yo boshqalar oldida  
 Ko'rsatmoqchi kuchini.  
 O'sha murg'ak boladan  
 Olmoqchimi o'chini?  
 Yo masxara qilganmi  
 Olgan "ikki", "uch"ini?  
 Bolakayning aybini  
 Aytib bersin zo'r bola.  
 "Hech qanaqa aybi yo'q",  
 Dedi chetdan bir bola.  
 Bir nochorni qaqshatgan  
 Nomard ekan g'o'r bola.  
 Men ismini so'rasam,  
 Aytmadiya, muttaham.  
 Qo'rqoq ekan "zo'r" bola,  
 Qochib ketdi bir zumda.  
 U bolaga nafratim  
 Qo'zg'aldi dil, ko'zimda.  
 Qo'rqoq ekan "zo'r" bola,  
 U chalavoy, g'o'r bola.

## KIMDAN KIM BEZOR?

Kimni kim ezar?  
Kimdán kim bezor?  
Bo'lganga bezor —  
Talay misol bor:  
Yomondan yaxshi —  
Chekadi ozor.

Quyon, qo'zichoq  
Bo'ridan bezor.  
Mushukdan sichqon  
Bezillar chunon.  
Qochar tulkidan  
Xo'roz, o'rdak, g'oz.

Bezorilar ko'p,  
Ozorilar ko'p.  
Ishchan — bekordan,  
Yaxshi — beordan —  
Bezoru bezor,  
Misollar qator.

Hamma o'zicha  
Haq kunduz-kecha.  
Biri qilar ov,  
Biri qo'yar g'ov.  
Yashamoq uchun  
Sarflashar kuchin.

O'zimcha sekin  
Aytaman lekin:  
Beruvchi ko'mak  
Uchraydi siyrak...

## BO'RI TUSH KO'RSA

Bo'ri qay bir kun  
Chiqarmasdan un,  
Boribdi ovga,  
Kepti o'tovga.  
So'lak oqizib,  
Yotibdi pisib.  
Charchab tolibdi,  
Uxlab qolibdi.  
Ko'rsa bo'ri tush,  
Ko'ngil emish xush.  
Yam-yashil o'tloq,  
Talay qo'zichoq.  
Bo'pti xushchaqchaq.  
Uyg'onib, biroq  
Cho'pon bobodan —  
Yeganmish tayoq.  
Bo'rilar shundan  
Uxlamas tunda...

## SUZMOQCHI-YOV...

Sichqon izlab,  
Mushuk deydi:  
— Miyov-miyov.  
Shoxga qo'nib  
Zarg'aldoq der:  
— Biyo-biyov.  
Don izlagan  
Jo'jalar-chi:  
— Chiyov-chiyov.  
Ovga chiqqan  
Qirg'iy esa:

## G'ANI QANI?

(Bo'lgan voqeа)

— Qiyov-qiyov.  
Ko'kda uchgan  
Turnalar-chi:  
— Qirov-qirov.  
Kelayotir  
Buqa botir:  
Yomonlarni  
Suzmoqchi-yov...

## MAKTABDAN QAYTAYOTIB

Ko'ring, bitta bolakay  
Maktabdan qaytayotib,  
Qolibdi loyga botib.

Yana bitta bolakay  
Maktabdan qaytayotib,  
Toydi sirpanchiq otib.

O'shanday bir bolakay  
Maktabdan qaytayotib,  
Diydirar sovuq qotib.

Tag'in bo'lak bolakay  
Maktabdan qaytayotib,  
Kelar qushga tosh otib.

Bir landavur bolakay  
Maktabdan qaytayotib,  
Yurar papka yo'qotib.

Yashasin bir bolakay  
Maktabdan qaytayotib,  
Kelmoqda zavq uyg'otib.

— G'ani qani?  
— G'ani qani?  
Deb so'raydi uni hamma.  
Uyda ham yo'q,  
Hovlida ham.  
Ko'cha eshik yopiq — tamba.  
— Kiruvdi u darsxonaga  
Darslarini o'qigani...  
Deyisharu topisholmas,  
— G'ani qani?  
— G'ani qani?  
Darsxonada — stolida  
Uy vazifa chala yotar.  
Kitob-daftar ochiq-sochiq,  
Ko'rgan odam boshi qotar.  
— Maktabidan kelganmidi?  
— Voy, choyini ichmabdi-ku, —  
Onajoni izlar uni,  
Bechorani bosar qayg'u.  
Ko'chani ham qarashadi.  
Ko'chada yo'q.  
— G'ani qani?  
Qo'ni-ko'shni yordamlashar,  
Izlashadi mahallani.  
— G'anijonu, huvv... G'anijon!  
Ona ko'ngli taka-puka.  
Xullas kalom,  
— G'ani qani?  
Zir Yugur Opa-uka.  
G'anisini eng birinchi —  
Onajoni o'zi topdi.  
Bog'chadagi shaftolida  
Shaftoli yeb uxbab qopti...

## QOCHIB KETDI

Bir o‘quvchi cho‘chib ketdi,  
Tanaffusda qochib ketdi.  
Yo qochdimi tobi uning?  
Birdan rangi o‘chib ketdi.  
Xayollari — g‘uv-g‘uv ari  
Har tomonga uchib ketdi.  
Olib papka, paltosini,  
Go‘yo tezda ko‘chib ketdi.  
Bajarmabdi uy ishini,  
O‘z sirini ochib ketdi.  
O‘qituvchi so‘raydi deb,  
Darsdan ura qochib ketdi.

## YOMONLAR KELAR QAYDAN?

Yaxshilardan so‘rayman:  
— Yomonlar kelar qaydan?  
Ba’zilar o‘ylab qolar,  
Ba’zi birlar der:  
— Qaydam...  
Yana o‘yga tolaman,  
Tug‘ilarmi yo yomon?  
Tug‘ilmasa kerag-ov,  
Yana qilaman gumon.  
Borlar dono bobomlar  
Qoyil javob berdilar.  
Sabab va asosiga  
Misollarni terdilar:  
— Yomon hech tug‘ilmaydi,  
Shuni bilib qo‘y, o‘g‘lim,  
(Birinchi javobdanoq  
Yorishgan bo‘ldi ko‘nglim...)

— Yomonlikning asosi  
Eng avval bekorchilik.  
Bekorchining qilmishi,  
Turgan gap, bekorchilik.

Bekorchining bo‘lganmas  
Aslo yaxshi tilagi.  
Zerikadi doimo,  
Uvishadi yuragi.  
Ko‘lmak suvday sarg‘ayib  
Rangi-ro‘yi o‘chadi.  
Xayollari buzilib  
Yomonlikka ko‘chadi.  
Bu holdagi kasallik  
Juda ham tez yuqadi.  
Mikroblari ko‘paysa,  
Polvonni ham yiqadi.

Bekorni ko‘rgan zamon  
Tortinmay olgin qo‘lga.  
Boshla mehnat deyilgan  
Ajoyib — oydin yo‘lga.  
U mehnat maktabida  
Yaxshilikka yo‘l olar.  
Bekorchilik — yomonlar  
Shu yo‘sinda yo‘qolar.

## U XURSAND, MEN XAFAMAN

Maktabidan bir o‘quvchi  
Juda erta qaytib keldi.  
Ming sevinib,  
Yallo qilib,  
Yo‘lda qo‘shiq aytib keldi.


O‘ta qiyin masalani  
Birdan bilib qolgandayin,  
Naq ko‘zları kulib turar,  
Oltin topib olgandayin.  
“Besh” olgandir ehtimol u?  
Haddan ziyod shodon edi.  
Bu tariqa quvonganin  
Birinchi bor ko‘rdim endi.  
Sevinchiga sherik bo‘lay,  
Deya unga berdim savol.  
Ishonmassiz so‘zlarimga,  
Javobidan bo‘ldim behol...  
So‘ramasam bo‘lar ekan,  
Rosa xira bo‘ldi ta’bim.  
Anchagacha men o‘zimga

Kelolmadim,  
Qochdi tobim...  
Sirmi ochsam...  
Bir dars bo‘lib,  
Qolganlari bo‘lmagan mish.  
Kelolmabdi o‘qituvchi,  
Yana shunday  
“mish-mish”.  
Ana shunga,  
Ana shunga  
Quvonibdi dil-dildan!  
Uni qarang,  
U bir xursand,  
Men xafaman...  
Ushbu she’rni yozdim arang.



# **ERTAKLARIM, ERTAKLARIM- KITOBIMGA YETAKLARIM**





## ERTAKLARIM

Ertaklarim, ertaklarim,  
Berdim mehrim, yuraklarim.  
Siz tufayli kulib turar  
Shirin-shirin istaklarim.  
Ertaklarim...  
El qalbiga qulqoq soldim,  
Ta'lim oldim, zavqlar oldim.  
O'qiganda bo'lgan ibrat,  
Ey, mazmuni o'rnaklarim,  
Ertaklarim...  
Eshitganda darsimdaysiz,  
Yozayotgan qarzimdaysiz.  
Alpomishday urgan javlon  
Niyatlari yuksaklarim —  
Ertaklarim...  
Kecha-kunduz dilimdasiz,  
O'zbek — ona tilimdasiz.  
Yuragimdan unib chiqqan  
G'unchalaru chechaklarim—  
Ertaklarim...

Sizni menga onam aytgan,  
Do'stim aytgan — olam aytgan.  
Barcha-barcha o'qisin deb  
Kitoblarga yetakladim --  
Ertaklarim...

## XALOSKOR LAYLAK

To'qayzor yaqinida,  
Bitta qushning inida,  
Yashardi uch polapon  
Chiyllashar uchovlon.  
Ayniqsa-chi, ovqatga  
Og'zin ochishar katta.  
Bular tomon  
Nogahon  
Pisib keldi bir ilon.  
Bolachalar jish edi  
Yovuzga yemish edi.  
Ilon tutib birini  
Turar xushlab ko'nglini.

Bola ochgan qushchalar  
Chiyillashar shunchalar.  
Uchishardi chirqillab,  
Bo'lmas edi hech chidab.  
Ona chumchuq bir zamon  
G'oyib bo'ldi nogahon.  
To'qayzorda bir laylak  
Kezar parvoyifalak.  
O'zicha qilardi ov  
(Ilonga o'ch edi-yov).  
Laylak yoniga borib,  
Chug'ur-chug'ur yolvorib,  
Ona bo'lib so'zladı,  
Ona bo'lib bo'zladı.  
— Ko'mak bergen,  
                              laylakjon,  
Bolamni tutdi ilon.  
Qushmiz, yordamga borgin,  
Bu balodan qutqargin.  
Qushchani yupatib sal,  
Laylakvoy dedi dangal:  
— Polaponing tufayli  
Tezda boraman, mayli.  
Qush ham uchdi sevinib,  
Mamnunligi sezilib.  
Laylak-chi, qarang hozir  
Topgandi bir  
Zo'r tadbir.  
Lapanglab haryon chopdi,  
Ilon bolasin topdi.  
Belidan tutib oldi,  
Qushlar tomon yo'l soldi.  
Uchib borib yelday tez  
Ilonning yaqiniga  
Keldi qushning iniga.

## UCH HAQIQAT

Bo‘ri to‘yib xo‘p,  
O‘lja olib ko‘p,  
Chiqib armondan  
Kelar o‘rmondan.  
Yo‘lda yo‘q hech kim...  
Shu payt bir echki —  
Chiqdi chap yoqdan,  
Bo‘rini ko‘rib,  
Naq sho‘ri qurib —  
Qotdi tayoqday.  
Bo‘ri sevindi,  
Ne qilsin endi?  
Uni yey desa —  
Qorni to‘q rosa.  
Ammo ko‘zi och,  
Qidirar iloj.  
Echki ham hayron,  
Qochsaykin qayon?..  
Tishlarin qayrab,  
O‘zicha yayrab,  
Olaytirib ko‘z,  
Bo‘ri boshlar so‘z:  
— Echkini dono  
Derlar doimo.  
Uchta haqiqat  
Aytasan faqat.  
Shunda yemayman,  
G‘iring demayman.  
Yetmasdan ajal,  
Shartimni bajar!  
Echkivoy cho‘chib,  
Ranglari o‘chib,  
Boshi bo‘ldi gang,

So‘zladi arang;  
— Aytayin avval,  
Esim bo‘lsa sal  
Solar edim yo‘l  
Teskari tomon,  
Zulmingdan butkul  
Qolardim omon.  
Bo‘ri astoydil  
Der qolib qoyil:  
— Bu gapga chindan  
Berajakman tan.  
Yana o‘ylab ko‘r,  
Undan bo‘lsin zo‘r.  
Echki shu palla  
Qotirdi kalla,  
Bir so‘z esiga —  
Kelmas aksiga,  
Fikri chalkashib,  
Qoldi bosh qashib.  
Ko‘zyoshi to‘kdi,  
Ichida so‘kdi.  
Yetsayu kuchi —  
Ketsaydi uchib...  
Xayoli qochdi,  
Ko‘nglini ochdi.  
Qildi tavakkal,  
So‘zladi dangal:  
— Bo‘ri xo‘p to‘qsan,  
O‘zingda yo‘qsan.  
Niyating hamon  
Men uchun yomon.  
Bo‘lganingda och.  
Toparding-da, vaj.  
Qurmasdan suhbat,  
O‘tkazmay fursat,

Qidirmay asos,  
Yer eding paqqos.  
Bo'ri der kulib,  
Go'yo mot bo'lib:  
— Donosan chindan,  
O'rganding kimdan?  
Haqdir mazmuni,  
Tan oldim buni.  
Uchinchisin ham  
Aystsang chekmay g'am,  
Bo'lasan ozod,  
Men demayman dod.  
Echki o'yldari,  
Bo'ri so'yldari:  
— Bo'lmarysanmi tez,  
Ishlarim tig'iz! —  
Go'yo shoshardi,  
Og'zin ochardi.  
Ma'qul so'z topmay, —  
Omadi chopmay,  
Echkivoy tag'in  
Aytdi ochig'in:  
— Qolsam-chi tirik,  
Ish bo'lib yirik —  
Keldi-da, o'rni,  
Qo'yvordi bo'ri,  
Deya aytardim.  
Uyga qaytardim,  
Bu gapga balkim,  
Ishonmas hech kim...  
  
Bo'ri albatta  
Edi hayratda.  
Bu uchta haq gap,  
Ishin qildi chap.

Bo'lsa-da og'ir  
Bo'ri der oxir:  
— Qolding o'limdan,  
Qolma yo'lingdan.  
Bu uchta haq gap  
Senga berdi naf.  
Echki kech payti  
Uyiga qaytib,  
Rosa kerildi  
Bor gapni aytib.  
Gaplaring yolg'on,  
Deyishdi shu on.

## QANOTI BOR UCHMASA

Bor ekan bir chumchuqcha,  
Qiliqlari ortiqcha.  
Ya'ni o'ta dangasa:  
Inda yotib don yesa,  
Istaganda ichsa suv.  
Shunday talab qilar u:  
Ona chumchuq har kuni,  
Boqishi shartmish uni...  
Bajarmasa onasi,  
Chiqar-da esxonasi,  
Go'yo bo'lganday jinni,  
Boshga ko'tarar inni.

Ona chumchuq bechora  
Tinchiy qolsa, deb zora,  
Tashir topgan-tutganin,  
Ko'zi qiymas yutgani...  
Shu alfozda boyaqish,  
Qiynaladi yozu qish.



Ko'rmadik bunday qushni,  
Deyishar qo'ni-qo'shni.  
Rosa hayron bo'lishar,  
Tekinxo'r, deb kulishar.  
Yoki qushcha nimjonmi,  
Mayibmi, nogironmi?

Yo'q,  
unaqa emas hech,  
"Kasalim bor", demas hech.  
Tugal barcha a'zoyi,  
Lekin fe'li avzoyi,  
Lekin fe'li-avzoyi...  
U tengi talay qushlar  
Uchar, hasharot ushlar.  
Sayrashar mayin-mayin,  
Bir-biridan qolmayin.  
Onasiga ko'zu qosh,  
Har ishiga ko'makdosh.

Nasihatni olmas u,  
Bilganidan qolmas u.  
Chaqirishsa qo'shnilar  
Na ularga qo'shilar.  
Ba'zida-chi, qilar do'q,  
Inda yotar, ko'zi lo'q.  
Inda o'tsa yoshligi,  
Qani uning qushligi?  
Qush degan zab oti bor,  
Hamda qo'sh qanoti bor.  
Ega bo'lib qanotga  
Qanday bo'ldi uchmasa?..  
  
Agarda-chi, hayotda  
Shunday bola uchrasa.

Nima derdim adashib,  
Qolar edim bosh qashib...  
Chumchuqni unutardim,  
She'rni unga atardim.

## OLTIN TOSH

O'tgan ekan bir dehqon,  
O'g'lin ismi Toshpolvon.  
Tug'ilganida bola —  
Ekan u ancha bo'la.  
Kundan-kun yetilibdi,  
Ko'plar havas qilibdi.  
Yoqimtoyu muloyim,  
Oyog'i olti doim.  
Zehni o'tkiru hushyor,  
Ota yonida dastyor.  
Baquvvat muskullari,  
Chayir ekan qo'llari.  
Qarasangiz jussasi —  
Polvonsifat, qisqasi.  
Bor ekan tengqurlari  
O'ziday polvon bari.  
Kurash tushib, mashq qilib,  
Yurisharkan gasht qilib.

Boy yeriga yonma-yon  
Bo'lar ekan tor sayhon,  
Kelar ekan bir tanob.  
Ekan kungay — seroftob.  
Ota-bola shu yerga  
Tushishib rosa terga —  
Qishin-yozin unnarkan,  
Nima eksa unarkan.  
Otasi xo'p bilimdon.

Har ishga yetib ko'zi,  
Bajarar ekan o'zi.  
Ota-bola bir yili  
Qovun ekishgan ekan.  
Rosa bo'pti hosili  
To'lib ketibdi haryon,  
Ko'rganlar qopti hayron.  
Pushtalarga qarasang,  
Yotganday ekan xarsang.  
Oqurug', bosvoldilar,  
Eng og'ir-muzvoltilar —  
Ko'tarsa yetmas quchoq,  
Etiga yetmas pichoq.  
Yegan havas qilarkan,  
Shirasi til tilarkan.  
Ota-bola sotibdi,  
Sotsalar ham ortibdi,  
Ulashmishlar tanishga,  
Qoqi qi ptilar qishga.  
Shu polizga yonma-yon  
Boyning yeri bor ekan.  
Yeri ekan bepoyon,  
Lekin ko'ngli tor ekan.  
O'g'li bilan boy bir kun  
Kelib yebdilar qovun,  
Ichidan kuyishibdi,  
Va yanib qo'yishibdi.  
Boyning yeri butunlay  
Hosil bermaskan bunday.  
Kelib boyning hasadi,  
O'zgaribdi maqsadi.  
Yerni tortib olmoqqa,  
Yuguribdi haryoqqa.  
So'ng qoziga arz qipti.  
Yeng ichida "qarz" qipti.

Kulganday unda armon,  
Yozdiribdi bir farmon.  
.....  
Bu otamdan qolgan joy,  
Deya da'vo qi pti boy.  
Ofat kelganga o'xshab,  
Talay yasovul, mirshab  
Farmonni bajarmoqqa  
Kelishibdi qishloqqa.  
  
O'tmasdanoq hafta, oy,  
Tantana qilibdi boy:  
Qovuni bilan birga —  
Ega bo'libdi yerga.  
  
Tinchisin deb hoynahoy,  
Saxiylik qilibdi boy.  
Ma'lum qilib qoziga  
Polizning evaziga,  
Hech nima bitmas toshloq  
Joydan beribdi, ozroq —  
U yer ekan tosh, shag'al,  
Tuproq ko'rinxmas sag'al.  
Dehqon kuyibdi rosa,  
Og'ir tashvish qurshabdi.  
O'g'li bunday qarasa,  
Foyda yo'qqa o'xshabdi.  
Qaygaki yetar qo'li,  
Hammayoqda berk yo'li.  
Ota ko'nglin chog'labdi.  
Belni mahkam bog'labdi.  
Toshpolvon —  
Tanti o'g'lon  
O'tkazmabdi fursatni,  
Ko'rsatibdi g'ayratni.



Polvonligi ish berib,  
Ishlabdi ko'krak kerib.  
Bilar ekan ish ko'zin.  
Qarabsizki, bir boshdan  
Yerini shag'al, toshdan  
Tozalabdi bir o'zi.  
Tayyorlabdi ekishga,  
Hatto qoldirmay qishga.  
Otasi kelib bir kun  
Ishidan bo'pti mamnun.  
O'g'lon chekibdi zahmat,  
Ko'rganlar depti rahmat.  
O'rtalikda katta tosh  
Unga hech egmabdi bosh.  
Urinsa ham har kuni  
Qo'zg'atolmabdi uni.  
Polvon bo'sh kelmay, lekin —  
Qazibdi sekin-sekin.

Bu toshni ko'klamgacha  
Yonin ochibdi ancha.  
Ota esa: — Bu toshga  
O'g'lim, urinma boshqa, —  
Deb achinib o'g'liga,  
Dalda bermish ko'ngliga.  
O'g'li odob bo'yicha,  
Ishni to'xtatib picha,  
Sira tura olmay jim,  
Yana boshlabdi hujum.  
Bo'sh qolganda kavlabdi,  
Charchabdi, kalovlabdi,  
Gohida olibdi dam,  
Chekinmabdi sirayam.  
Toshpolvonning-chi, uchta,  
Bo'larkan yaqin do'sti.

Qolishmas ular kuchda,  
Yo'qdayin kami-ko'sti.  
Beraylik deya yordam,  
Kelishibdi ular ham.  
To'rtovlon,  
To'rtta polvon,  
Rosayam urinibdi,  
Eng oxiri xarsangtosh,  
Ko'pchilikka egib bosh —  
O'rnidan surilibdi.  
To'rtovlon,  
To'rtta polvon  
Xarsangtoshni yiqibdi.  
Toshning tagidan esa  
Ro'y berganday mo'jiza  
Bir katta xum chiqibdi.  
Ichida liq-liq oltin.

.....

Toshpolvon-chi,  
eng oldin  
Otasin aytib kepti.  
Ko'rib hang-mang qolibdi,  
O'zin qo'lga olibdi.  
O'g'liga shunday depti:  
— Qani, tezroq bo'linglar,  
Sanab,  
to'rtga bo'linglar.  
Saxiy ekan-da o'zi,  
To'q ekan ota ko'zi.  
Oltinni ulashibdi,  
Do'stlari quvnashibdi.  
To'rtovlon,  
To'rtta polvon  
Oltinga boy bo'lishib,  
Chaqchaqlashib, kulishib,

Jo'nashibdi uy tomon.  
Bu xushxabar bir onda  
Taqabdi to'rt tomonga.  
Xabarni boy eshitib  
Esi chiqib, entikib,  
Qaramay hech qayoqqa  
Yuguribdi toshloqqa.  
Bo'sh xum yotar qarasa —  
Xarsangtoshning yonida.  
Jon qolmabdi jonida.  
Kuyib ketibdi rosa.  
Uxlamay o'sha kecha,  
Yana tuzibdi reja,  
So'ng qoziga boribdi,  
O'tinib yolboribdi, —  
Voqeani aytibdi.  
Qozi debdi o'ylanib,  
Shum boyni pitcha yanib:  
— O'yla, uyoq-buyoqni,  
Yelga uchirma so'zing.  
Axir o'sha toshloqni  
Hadya etding-ku o'zing.  
Kechasanmi lafzingdan?  
Boyliging qayda qolar?  
Bor obro'ying yo'qolar.  
Yurtga mazax bo'lasan,  
Tiriklayin o'lasan.  
Boy qaytibdi qup-quruq,  
Topolmasdan yo'l-yo'riq.  
U hasaddan yonibdi,  
Tunlari uyg'onibdi.  
Sira chiday olmabdi,  
Hech udda qilolmabdi.  
Hasadga berolmay tob,  
Bo'lib qolibdi betob...

Toshpolvon yangi yerga  
Do'stlari bilan birga,  
Yana qovun ekishib,  
Maqsadiga yetishib,  
Davr surib yurmishlar.  
O'zgaribdi turmushlar.  
Yo'qolibdi baxillik,  
Yo'qolibdi yomonlik.  
Yo'qolibdi johillik,  
Barq uribdi omonlik.  
Xum chiqqan o'sha toshloq  
"Oltin tosh" degan qishloq —  
Nomini olgan ekan,  
Ertakda qolgan ekan.

## HISOB BOBO VA RAQAMILAR

Bor ekanlar Hisob bobo,  
Juda olim, juda dono.  
Hamma joyda yashaydilar,  
Charchamayin ishlaydilar.  
Xizmatlari juda aniq.  
Ko'zları ham ko'rар tiniq.  
O'nta o'g'il-qizlari bor,  
Yumushiga doim tayyor.  
Saf-saf bo'lib turishadi,  
Na bir-birin turtishadi,  
Na bir-birin urishadi,  
Ko'pdan yashab yurishadi.

Ular ahil bir oila,  
Oilada bor qoida:  
Ishga navbat kutishadi,  
O't deyishsa o'tishadi.

Shunday qilib barcha raqam  
Bir-biriga berar yordam.

Sizga tanish u hoynahoy.  
Birinchisi ana, Birvoy.  
O'ngu chapga hech og'ishmay —  
Askarlarday turadi shay.  
“Bir”ning ishi juda ko‘pdir,  
Ta‘rif etsam agar bir-bir,  
Xizmatiga hamma qoyil,  
Hisob bobo sevgan o‘g‘il.  
Siz bilasiz, “Ikki” raqam  
Ajoyibdir ha, juda ham.  
Boshi uning go‘yo ilmoq,  
Yalqovlarga berar qiyinoq.  
“Ikki” bir kun ranjib go‘yo  
Bir so‘z debdi: — Hisob bobo,  
Dars chog‘ida meni nuqul  
Yalqovlarga qo‘yishadi,  
Masxaralab kulishadi,  
Menga sira emas ma‘qul.

Hisob bobo debdi shunday:  
— Yanglishibsan sen butunlay,  
Xom ekansan, ey omon bo‘l.  
Sen u yerda o‘ynaysan rol.  
Seni ko‘rib qizarishar,  
Keyin asta tuzalishar.

Bu gaplarga demasdan “voy”,  
Gijing bo‘lib so‘ng “Ikkitoy”,  
Chopib ketdi “kishnab-kishnab”,  
Yurar hozir rosa ishlab.

Bu so‘zlarni eshitgach “Uch”  
Bobosiga kelmadi duch.

“To‘rt”dan madad so‘rab nuqul  
O‘z ishiga bo‘ldi mashg‘ul.  
Hammaidan mashhurdir “Besh”.  
“To‘rt” bo‘libdi “Besh”ga do‘st-esh.  
Ikkalasi ishda inoq,  
Qo‘sinq aytib shodu quvnoq.  
Do‘ndirganlar dars — o‘qishni,  
Olishadi “To‘rt”u “Besh”ni.  
Yaxshi ko‘rar Hisob bobo,  
Taltaymang deb qo‘yar goho.  
Mana qarang, polvon “Olti”  
Bunday nomni qaydan oldi?  
“Besh”dan ortiq aqlu kuchda  
Bo‘linadi ikki, uchgaga.  
Qatorida turar “Yetti”.  
Ta‘riflashga navbat yetdi.  
Unga doim vaqtি chog‘liq,  
Ishga abjis, beli bog‘liq.

Hisob bobo qizi — “Sakkiz”,  
Unga qo‘shni turar “To‘qqiz”.  
Ikkalasi Fotma-Zuhra  
Urishmaslar sira-sira.  
Dum-dumaloq anavi “Nol”.  
Na oyog‘u na bordir qo‘l.  
Seppa-semiz, lekin ixcham,  
Boshqalarday ishda ildam.  
O‘n o‘g‘il-qiz shunday qilib,  
Hisob bobo farmonida,  
Ishlaydilar bilib-bilib,  
Keng ilmu fan maydonida,  
Qo‘suv, oluv, karrajadval,  
Taqsimlash ham shulardan hal.  
Hisobchilar ishin boshi,  
Rejachilar nonu oshi.

Zarurdirlar hamma joyda,  
Keltirishar elga foyda.  
Raqamlardan olib o'mak,  
Do'stga, elga bering ko'mak.

## UNUTGAN O'G'IL

Qadim suribdi umr —  
Bir chol ila bir kampir.  
Ularning bisotida,  
Kechirgan hayotida  
Bor ekan yolg'iz o'g'li,  
Cholu kampirning ko'ngli  
O'g'lida ekan doim.  
So'zlasharkan muloyim,  
Yetmasin deya ozor,  
Otayu onaizor.  
Ikkovining es-hushi,  
Tunlari ko'rgan tushi,  
Boshqaga so'zlar so'zi  
Chirog'iyu yulduzi —  
Shu o'g'li ekan, o'g'li.  
Sezilmaskan bor-yo'qlik,  
Yemay yediribdilar,  
Ichmay ichiribdilar.  
O'g'li esa kundan-kun  
Voyaga yetib durkun —  
Bo'libdi ancha tiyrak,  
Ishiga pishiq, ziyrak.  
Xizmat etguday yurtga  
To'libdi deng o'n to'rtga.  
O'shalarga yonma-yon  
O'zin tutgan qadrdon  
Bir savdogar bor ekan.

Topib ular ko'nglini,  
Chol-kampirning o'g'lini  
(Ishlatgan-da hunarin)  
So'ziga ko'ndiribdi,  
Puch yong'oqqa ularning  
Qo'ynini to'ldiribdi.  
Savdogar ertasi kun  
Bo'lib judayam mamnun,  
Ul-bulni olib qo'lga,  
Otlanibdi tez yo'lga.  
Ota debdi o'g'liga:  
"Ota-onaning pulga  
Topilmasligin esla,  
Mayli bor, baxting izla".  
Ona ham debdi shundoq:  
"O'zing kelib tur tezroq".  
O'g'il kelishga tez-tez  
So'z beribdi o'sha kez.  
Dastmoya bog'lab belga,  
Ketmishlar olis elga.  
Buni qarangki, ular  
Ishlatib nayrang-hunar  
Ikkovi borgan joyda  
Foyda ustiga foyda —  
Kelaveribdi oqib...  
Yig'ibdilar yutoqib.  
Qolmayin olti oyga  
Aylanibdilar boyga.  
So'ylagani foydamish,  
O'ylagani foydamish,  
Shunaqangi ish bo'lib,  
O'sha yolg'iz o'g'il ham  
Pul yo'liga chinakam  
Mukkasidan ketibdi,  
Aziz ota-onasin,

Unutib bor va'dasin,  
Na biror xat bitibdi.  
Paydo bo'libdi g'urur,  
Yengibdi foyda qurg'ur.  
Chol va kampir o'g'lini,  
Poylayverib yo'lini  
Har kun, har tun kutibdi,  
O'g'li-chi, unutibdi...  
Sog'inishib shu qadar:  
“O'g'lim, biz intizormiz,  
Muhtojmiz, juda zormiz”,  
Deb yozmishlar xat-xabar.  
Olib bunday xabarni,  
Eslab qariyalarni  
Muhtoj bo'lmishlar deya  
Chol-kampirga bir tuya  
Yubormish sovg'a-salom.  
Farzandlik burchim tamom —  
Deb, foydaga chopibdi,  
Go'yo taskin topibdi.  
Ular tuyani ko'rib,  
O'g'lim keldi deb darhol  
Chiqsalar-ki yugurib,  
Bo'shashibdi kampir-chol.  
Kampir yig'labdi yum-yum,  
Shuncha dunyo, mol-buyum  
Sira ham tatimabdi,  
Bular nima demabdi.  
Foydadan uzmay umid,  
Eh, esiz shunday yigit,  
Diydor ko'ray demabdi,  
Ulardan g'am yemabdi.  
Eshitinglar buyog'in,  
Xabar kelibdi tag'in.  
O'g'li o'qigach darhol,

Yubormish bir talay mol.  
Xat kelibdi oyma-oy,  
O'g'li esa: “Hoynahoy  
Yuklarim bormagan”, deb  
Buyumlar uchun g'am yeb,  
Foydadan kechib zo'rg'a —  
Ravona bo'lmish yo'lga.  
Yetib kelib qarasa,  
U yuborgan bor narsa  
Hammasi turgan emish.  
Chol-kampir shunday dermish:  
“Narsalaring yetmadi,  
Hech o'rningga o'tmadi.  
Bizga keraksan o'zing,  
Bizga diydoring kerak,  
Shudir bizdag'i tilak!”  
O'g'li aytolmay so'zin  
Bo'libdi rosayam lol.  
Turmushda bunga misol  
Uchrab turadi goho,  
El beradi chin baho.

## DONO BOLA

(*Koreys ertagi asosida*)

Eshitgandim bir ertak,  
Qolgan yodimda.  
O'n bir yashar bir bola  
Bo'lmish qadimda.

Idrokiga qolgan mish  
Donolar ham lol.  
Bola ekan chinakam  
Odil va halol.



Bor ekan bir dehqonning  
Biyasi, toyi.  
Onasiga o'xsharkan  
Toyning chiroyi.

Farq etmabdi hech kimsa  
Toydan biyani,  
Qotirsalar ham ular  
Rosa miyani:

O'xshar ekan quyganday  
Biya ham toyga.  
Bu ovoza tarqalib  
Ketmish har joyga.

Sinchilar kelishibdi  
Farq etish uchun.  
Donolar sinab ko'rmish  
Aqlining kuchin.

So'ng uning ovozasi  
Shohgacha yetmish.  
Vazirlarga bu haqda  
Bir farmon bitmish:

"Keltirilsin zudlikda  
Otlar saroyga.  
Eng qulay joy yasalsin  
Biyaga, toyga".

Bajarmishlar farmonni  
Bir kun ichida.  
Shoh ham hayron qolibdi  
Otlarga juda.

Amaldorlar dehqonni  
Haydabdi shu on.

Ot-ulovsiz qolibdi  
Bechora dehqon...  
Shoh bir kuni zerikib  
Chiqarmish farmon:  
"Yurtdagi donolarni  
Yig'inglar chaqqon.

Kim yetolsa agarda  
Otlar farqiga,  
Beriladi zo'r unvon  
Uning haqiga".

Keng maydonga to'planmish  
Shunda xaloyiq,  
O'ylasharmish "Unvonga  
Kim bo'lar loyiq?"

Talay-talay donolar  
Etolmabdi farq.  
Jimjitlikning tubiga  
Bo'libdilar g'arq.

Bir bola kelib shohga  
So'zlabdi shart-shart:  
— Topamanu qo'yaman,  
Lekin bitta shart.

Topganimdan keyin-chi,  
Toy va biyasin,  
Qaytib olib ketadi  
Otlar egasi.

Bunday shartga noiloj  
Ko'nmish podishoh,  
Xaloyiq va donolar  
Bo'lmishlar guvoh.



Ne bo'lar deb kutmishlar  
Ajib holatni,  
Bir kun och qo'y mish bola —  
Ikkala otni.

Hech kim tushunmas ekan  
O'ylangan sirga,  
Ikkovini bog'labdi  
Ikki oxurga.

Ikkovi ham teng ekan  
Ochlik bobida,  
Ikkoviga solibdi  
Bir bog'dan beda.

Toycha yerkan bedani  
Ko'tarmay kalla,  
Bir yeb, bir qarar ekan  
Biya shu palla.

Bola debdi: — Endi sir  
Aniq, hoynahoy.  
Qaysi biri biyasi,  
Qaysi biri toy.

Qarab-qarab yegani  
Toyning onasi.  
Qaramasdan yegani  
Toyning bolasi.

Boladadir, deyilgan  
Onaning ko'ngli...  
Hamma bundan shod emish,  
Faqt shoh mungli...

Shoh noiloj ko'nibdi  
Va'daga — shartga.

Dehqonga jo'natmishlar  
Otlarni shartta.

Dono bola ta'rifin  
Men yozdim jindak.  
Ona mehri haqida  
To'qildi ertak.

## **YAXSHILIK NONI**

Bor ekan bir kambag'al —  
O'ylar ekan har mahal —  
Yaxshilik qilsam, deya,  
Bersam kimgadir hadya.  
O'yabdi shu alfovza,  
Ayni saraton — yozda,  
Bir donoga boribdi.  
Dilidagin yoribdi.  
Dono undan albatta,  
Qolibdi-da hayratda:  
— O'zing-ku bo'lsang nochor,  
Bu ish senga ne darkor? —  
Deb uni yupatibdi.  
Umidsiz jo'natibdi.  
Lekin o'sha kambag'al,  
O'yab qarasa sag'al,  
Kamsitilgan sezibdi.  
Bir oz dilin ezibdi.  
"Axir men ham odamman.  
Kuch-quvvatda bardamman.  
Yaxshilik qilsam biror! —  
Deya o'yabdi takror.  
Yaxshiligim-chi faqat  
Boshqaga bo'lsa ibrat.  
Tanib qo'ysa meni el,



Taskin topar edi dil".  
Bir momoga bormish so'ng,  
Mo'ljali kelibdi o'ng.  
— Ortdirsang-chi, har zamon—  
Suvga tashla uch-to'rt non.  
Yaxshilicing suv bilar.  
Balki baliq topib yer.  
Sen bilmassan, rahmat der.  
Ko'ribsanki shu bilan —  
Taskin topasan bir oz.  
Bu gap unga kelib mos,  
O'zini saxiy bilib,  
Daryoga sal egilib,  
Topganda uch-to'rtta non  
Tashlab yuribdi shodon.  
Shunday derkan daryoga:  
— Men ham keldim dunyoga, —  
Nonlarimni qabul et.  
Muhtojlarga uni elt.—  
Daryo ham tilga kirib,  
So'zlabdi to'lqin urib:  
— Baliqlarim yeb yursin,  
Laqqa bo'lsin, semirsin.  
Bu yaxshilik — bu odat  
Keltirsin baxt-saodat.  
Hali o'zing ko'rarsan,  
Uning zavqin surarsan —  
Qarang, o'sha kambag'al,  
Bir mo'ljalda — tong mahal —  
Tashlab yuribdi nonin,  
Topganida imkonin.  
Suv betida to'rtta non  
Oqaveribdi hamon.  
Uning haqida mish-mish  
“Dovdir” deb tarqalganmish.

Zo'r ish qilganga o'xshab,  
Yuribdi ko'ngli bo'shab.  
O'tibdi fursat — onlar,  
Oqaveribdi nonlar.  
Baliqlar yutibdimi?  
Miroblar tutibdimi?  
Bu bilan hech ishi yo'q,  
Lekin ekan ko'ngli to'q.  
Elni so'rар ekan shoh  
Yolg'iz o'g'li banogoh —  
Daryoda yo'qolibdi,  
Deb xabar tarqalibdi.  
Kunlar o'tibdi ancha,  
Yasovullar har qancha —  
Urinsa-da paydar-pay  
Topilmabdi har qalay...  
Qarib qolgan podishoh,  
Rosa chekibdi oh-voh.  
Chiqarmish — farmon-nizom:  
“Topganga katta in'om!”  
Hatto topganga xabar  
Va'da qipti oltin-zar.  
O'sha daryo quyida  
Sohilida — bo'yida  
Yashar ekan bir dehqon.  
Bir kun ko'rsa nogahon  
Zo'rg'a-zo'rg'a bilinib,  
Yotar edi ilinib,  
To'ngakka bitta o'g'lon,  
Holdan ketgan, chalajon.  
O'zicha urinarkan,  
To'lqinga urilarkan.  
Dehqon tezda boribdi,  
O'g'lon-chi yolvoribdi.  
“Yordam”, debdi zo'rg'atdan,



Qolganmish kuch-qudratdan.  
 Dehqon hushi uchibdi,  
 Darrov suvga tushibdi.  
 Qarasa shu on dehqon  
 Yonida bir necha non.  
 Bolani qutqaribdi.  
 Uyiga oboribdi.  
 Ko'rpachalarga o'rav,  
 Holu ahvolin so'rav,  
 Parvarishlabdi uni,  
 Yeb-ichirib har kuni.  
 O'g'lon hafta ichida  
 O'ziga kepti juda.  
 — Qayerliksan,  
     ey o'g'lon? —  
 Deya so'rabdi dehqon.  
 — Suzishni sal bilardim,  
 Daryo oqizib ketdi,  
 Oxir to'ngakka eltdi.  
 Bilmayman qanday qilib  
 Qolganimni ilinib. —  
 To'ngakdan chiqolmadim,  
 Oxiri chidolmadim,  
 Tiklolmadim  
 Qomatim.  
 Sira topolmay iloj  
 Bir necha kun yotdim och.  
 Qarang uni,  
 Har kuni  
 Oqib keldi uch-to'rt non,  
 U bilan saqladim jon.  
 Sizzdan minnatdorman ko'p,  
 Faqat qilmang taajjub,  
 Shoh o'g'liman,  
 Qo'ying-chi,

Tezlikda bering xabar,  
 Otam eshitsa agar, —  
 Sizga berar suyunchi. —  
 Bundan bechora dehqon  
 Rosa bo'libdi hayron.  
 Bir oz shoshib qolibdi.  
 Bo'shashibdi — tolibdi.  
 O'g'lon haqida xabar  
 Yetibdi shohga qadar.  
 Shoh uni eshitibdi,  
 Avvali entikibdi.  
 Ko'rib o'g'lin omon  
     — sog',  
 Dimog'i bo'libdi chog'.  
 Bajaribdi farmonni,  
 Xabar bergan dehqonni —  
 Ziyofat qilib oldin, —  
 Hadya etibdi oltin.  
 Olayotganda dehqon  
 Yana bo'libdi hayron.  
 Tortinibroq olibdi,  
 Shoh hayratda qolibdi.  
 "Bergan oltinim go'yo  
 Ozlik qilganmikan yo"  
 Chaqirib vazirini  
 So'ratibdi sirini.  
 Dehqon ekan zab odil,  
 Ohista ochibdi dil:  
 — To'g'ri, qutqardim uni,  
 Bordir boshqa mazmuni,  
 Kim u nonni tashlagan?  
 Nondir uni asragan.  
 O'shani topping hozir  
 Tagida bor axir sir.  
 O'g'li ham depti shunday:

— Non bo'lmasa butunlay,  
Omon qolmasdim,  
rost gap,  
Non meni turdi asrab.  
Bo'lqanimcha bo'lardim,  
Nonsiz ochdan o'lardim.  
Shoh yana bermish farmon,  
Jarchi ketibdi haryon.  
“Kim har kuni suvga non —  
Tashlagan,  
toping chaqqon!”  
Uni qidirib juda,  
Naq bir hafta ichida —  
Ho‘v, o‘scha kambag‘alni,  
Topib oqshom mahali,  
Saroya keltirmishlar,  
Tarqalganmish  
mish-mishlar.  
Kambag‘al sal cho‘chibdi,  
So‘ng rostiga ko‘chibdi...  
Barcha uni maqtabdi,  
Saxiy deya atabdi.  
Shoh beribdi ziyofat  
Bermish zaru mukofot.  
Har kimning yaxshiligi —  
Asl mazmuni — tagi —  
Ko‘rsatarkan o‘zini,  
Ocharkan baxt ko‘zini.

## ORZU QUSHI

Dunyoda orzu  
Emish bir qushday.  
Har kimsa uni  
Der emish ushlay.

Kim tutsa qushni  
Ushlagan asno,  
Bitta orzusi  
Bo‘larkan bajo.  
Bir bola yig‘ib  
Esu hushini,  
Ushlamoq bo‘pti  
Orzu qushini.  
Ketaveribdi  
Izlab har tomon,  
Kuch baxsh etarmish  
Qalbida armon.  
Daryodan o‘tib,  
Chiqmish qoyaga,  
Dam olibdi goh  
Yotib soyada.  
Naq ko‘zi tushmish  
Tushdag'i qushga,  
Sevinganidan  
O‘xhabdi tushga.  
Ishonmas emish  
Aslo ko‘ziga,  
Qushga so‘z qotmish  
Kelgach o‘ziga:  
— Ey, sevimli qush,  
Senga don beray,  
Xiyol pastga tush.  
Qushcha shu mahal  
Tilga kiribdi:  
Yetsang ushlay qol,  
Deb shart qo‘yibdi.  
Bolakay, xullas,  
Ushlabdi uni.  
Bitta orzuga  
Yetmish shu kuni.



Berib donu suv  
Silabdi patin,  
Bolakay boqsa,  
Tog‘ tomon tag‘in  
Yana boshqa qush  
Bo‘libdi paydo,  
Meni ham ushla  
Deganday go‘yo.  
U qush o‘xsharmish  
Axir oltinga,  
Bola intilmish  
Yana oldinga.  
O‘sha qushchaga  
Kel, deb yalinmish,  
Qulooqqa qushning —  
So‘zi chalinmish:  
— Bilib qo‘y,  
                  bola,  
Men oltinqushman,  
Op-osonlikcha  
Qo‘lingga tushmam.  
Bolakay dermish:  
— Axir ushlayman,  
Ushlayman seni —  
Pastga tushmayman.  
Oldingidan ham  
Uchqur ekan qush,  
Bolakay hamon  
Kelmas sira bo‘sh.  
Oltinqushni ham  
Ushlab bolakay,  
O‘z orzusiga —  
Yetmish har qalay.  
Biling, orzular —  
Misoli qushlar,

Bo‘shang ushholmas,  
Intilgan ushlar.  
El orasida  
Shunday hikmat bor:  
Kimki intilsa,  
To‘le bo‘lur yor.

## **BU — MULTFILM BULUT FILM**

Bu — multfilm,  
Bulut film:  
Osmon degan  
Katta ekran.  
Bulut o‘ynab  
Osmon bo‘ylab,  
Rosa kezar,  
Shamol esar.  
Shamol esar —  
Rejissyordir,  
Boshlar bir-bir  
Multfilmni:  
O‘z ilmini  
Ko‘rsatar tez  
Qarang shu kez:  
Bo‘lar paydo  
Quyon bobo,  
Echki misol  
Bordir soqol...  
Bulut ko‘char,  
Undan chiqar  
Katta bo‘ri,  
Qo‘lda to‘ri.  
Quyon quvar,  
Goho uvlar.



G‘oyib bo‘lar	“Ikki” o‘chdi.
Shu on ular.	Bulut film
Birdan ho‘kiz	Qiziq bilim.
Yugurar tez.	Ko‘rganday tush
Ho‘kiz xo‘roz	Og‘ar es-hush.
Tusin olar.	Ko‘rinar sher,
Ko‘rgan bir oz	Nimadir yer.
Hayron qolar.	Sherni shu on
Yana qarang,	Tishlab laycha,
Atrof yalang	Uni sarson
To‘rga to‘lar,	Etar ancha.
Paydo bo‘lar	Bitta ayiq
Bahaybat g‘oz,	Minib qayiq
Bo‘yi daroz.	Ketar edi,
G‘oz cho‘zilib	Qarang endi,
Bo‘lar xo‘roz.	Birdan o‘chdi,
Ishlar qiziq:	Qayga ko‘chdi?
Baliqdan shox	Qarab turib
Chiqar nogoh.	Xayol surib,
Bu — multfilm	“Nega bunday?”
Bulut film.	Deysiz shoshmay.
Boqsang darhol	Shamol essa,
Esib shamol	Bulut kezsa
Parcha bulut	Bulut film —
Bo‘lar burgut,	Buyuk film,
Qarang yana,	Xullas kalom,
Kiyik chana	Etar davom.
Tortib kelar	Shamol kelib,
Ortib nelar?	Bulut yelib
O‘chdi u ham.	Chiqsa quyosh
“Ikki” baho —	Bo‘lar odosh,
Bo‘lar paydo.	Bu — multfilm
Bulut ko‘chdi,	Bulut film.

# QOVOQVOYNING SARGUZASHTI

(2 pardali, 7 ko 'rinishli ertak)

## 1-PARDA

### MUQADDIMA

(*Parda ochilganda sahna oldida chetan devor tutilgan bo 'ladi. O'rtada yo'l bor. Qatnashuvchilar chetan orqasidan sahna oldiga navbat bilan chiqishadi-da, bir-birini tanishitiradi. Eng oldin Dehqon bobo chiqib bolalarga salom beradi.*)

#### Dehqon bobo:

(*zalga*)

— Eng avvalo, assalom!

#### Chanoqvoy:

(*yugurib chiqib*)

— Bu kishi — Dehqon bobom.

#### Dehqon bobo:

— O'zimizga yarasha —

Biz boshlaymiz tomosha.

#### Chanoqvoy:

— Kimgarga deysiz — Voy-voy!

#### Dehqon bobo:

— Kimgarga deysiz: — Yasha!

#### G'ujumoy:

— Buning ismi — Chanoqvoy.

#### Chanoqvoy:

— O'zлari-chi, G'ujumoy.

#### Dehqon bobo:

— Qaydasan, Lavlagijon?

#### Lavlagijon:

— Buyoqdaman, bobojon, Umbalaqidon-umbalaqidon.  
(*O'yinga tushadi.*)

#### Handalak:

— Kaminangiz, Handalak,  
Ketdi demang bedarak.

#### G'ujumoy:

— Qayda eding, Handalak?

#### Handalak:

— Tutolmadim kapalak,  
Etdi meni ko'p halak.

#### Chanoqvoy:

— Qovunjon qarindoshi.

#### G'ujumoy:

— Ammo yumaloq boshi.

#### Handalak:

— Handalakman, Handalak,  
Yurishlarim pildirak.

#### Chanoqvoy:

— Ustidagi beqasam,

Taram-taram, qarasam.

(*O'yinga tushadi.*)

#### Tarvuz:

(*chiqb*)

— Menga ham beringlar so'z  
Ismim — qo'zivoy Tarvuz.

O'zimni qilay ko'z-ko'z  
Ammo menda yo'q tormoz.

Yumalayman bir zumda,  
Hayrondirman o'zinga.





Ey, kelaver, Qovunjon.

**Qovunjon:**

— Qo‘ysang-chi, og‘aynijon.

**Dehqon bobo:**

— Buyoqqa chiq, Oysholg‘om.

**Oysholg‘om:**

(*yugurib*)

— Hammangizga assalom!

Meni yeganlar sog‘lom.

**Chanoqvoy:**

— Tomoshamizda uchrar,

Ba‘zi bir qora kuchlar:

(*O‘rgimchakkana, Chigirtka, Ko‘sak qurti o‘z bolalari bilan astasekin chiqib kelishadi.*)

**Tarvuz:**

— Qaranglar, bu pakana —

Ismi — O‘rgimchakkana.

Zaharli erur yana.

**O‘rgimchakkana:**

— Hadeb qochmagin chetga,  
Dadil bo‘lgan, Chigirtka.

**Chigirtka:**

— Bolalarim ichida —  
O‘g‘lim ochofat juda.

**G‘ujumoy:**

— Ko‘saklarni quritdi,  
Anavi Ko‘sak qurti.

(*Ikkala Ko‘sak qurti indamay turishadi. Bir oz pauzadan keyin Qovoqxola o‘g‘li Qovoqvoyni yetaklab keladi.*)

**Qovoqxola:**

— Ko‘raman deb tomosha,  
Keldik tomma-tom osha.

**Chanoqvoy:**

— O‘zлari Qovoqxolam,  
Doim deydilar, bolam.

**Qovunjon:**

— Ahvoli og‘ir, voy-voy,  
O‘sha mashhur Qovoqvoy!

**Qovoqvoy:**

— Eplolmayman o‘zimni,  
Xira bosgan ko‘zimni.

**Qovoqxola:**

— O‘zimning erkatoym,  
Yonimda bo‘lsa doim.

(*Qovoqvoy polvonlar sirkda o‘zini namoyish qilgan tarzda atrofga salom beradi. Hamma qatnashuvchilar ketishadi. Chetan devor ham olinadi.*)

## BIRINCHI KO‘RINISH

(*Sahna orqasida bolalar ishlagan allaqanday rasmlar. Uvat yonida Qovoqvoy bir chetda yumalab yotgan bo‘ladi.*)

**Qovoqvoy:**

— O‘qishu ish bo‘lmasa,  
Oftobda yotish mazza.

Rosa xurrakni otsam,  
Mayli uyquda qotsam.

(*Qovunjon, Handalak, Tarvuz paydo bo‘ladi. Qovoqvoyga parvo qilishmaydi.*)

**Qovunjon:**

— Do‘stim, Tarvuz,  
Senga bir so‘z:



Qanday qilib  
Bo‘lding semiz?

**Tarvuz:**

— Oshnam, Qovun,  
Kechirasan,  
Nima uchun  
Bo‘ying uzun?

**Qovunjon:**

— Menga qara,  
Sira-sira  
Yeganmisan  
Selitra?

**Tarvuz:**

— Selitra yesang-chi,  
Qorin bo‘lar daranggoz.

**Qovunjon:**

— Boshqa gapni desang-chi,  
Yemaganing juda soz.

**Tarvuz:**

— Sen shirinmi,  
Men shirin?

**Qovunjon:**

— Kim biladi  
O‘z sirin?

**Tarvuz:**

— Bo‘lmasa-chi, qani, yur,  
Bolalardan so‘rab ko‘r!

**Handalak:**

— Avval menga qaranglar,  
Bolalardan so‘ranglar.

**Tarvuz:**

— Ketgan eding bedarak,  
Qaydan kelding, Handalak?

**Handalak:**

— Handalakman, eng mashhur,

Bolalardan so‘rab ko‘r,  
Shirinlikda o‘zim zo‘r.

(*Tarvuz bilan Qovunjon  
tomoshabinlarga salom berishadi.  
Sahna oldiga kelishadi.*)

**Qovunjon:**

— Salom, yaxshi bolalar,  
Sog‘lom — yaxshi bolalar.  
Rostini aytib bering —  
Mayli, demaymiz g‘iring,  
Tarpuzning polvonligin,  
Gapining yolg‘onligin —  
Ko‘rishga kelgansiz-a?

**Tarvuz:**

— Bu savoling bemaza.  
O‘zing bo‘lasan izza.  
Qovunning naynovligin,  
Burnining tarnovligin  
Ko‘rishga kelgansiz-a?

**Qovunjon:**

— Maqtanishni qarang, fu...  
Qorni to‘la shundoq suv.  
Rosayam ko‘r urug‘i,  
So‘zining-chi qurug‘i.

**Handalak:**

— Bering menga suyunchi,  
Pishaman eng birinchi.  
Gaplaringga qarshiman,  
Eng shirinman, yaxshiman.

**Tarvuz:**

— Sen-chi,  
shundayin Qovun,  
Ko‘pirmaydigan sovun.  
Agarda bo‘lmasa suv,  
Hamma chanqab qolar-ku.



### Ikkalasi:

— Xo‘p kelishdik bo‘lmasa,  
Qovoqvoy eng bemaza.

(*Uni ko ‘rsatishadi.*)

### Qovoqvoy:

— Kim bemaza, ey, Tarvuz?  
So‘zingga sal solgin tuz.

(*O‘midan turmoqchi bo‘ladi, eri-nadi. Qovunjon, Handalak, Tarvuz uni masxara qilib ketishadi. Qovoqvoy ular haqida qo‘shiq aytadi.*)

### Qovoqvoy:

— Xo‘ppa semiz,  
Tolvuz, Tolvuz.  
Handalak, Handalak —  
G‘ildirak, g‘ildirak.  
Qovun, Qovun —  
Sovun, sovun.  
Hech kim menga tegmasa,  
Oftobda yotish — maza.

### G‘ujumoy:

(*kirib*)

— Holi doim bo‘lar voy,  
Kimki bo‘lsa dangasa.

(*Qaytaradi.*)

### Qovoqvoy:

— Ey, bijildoq G‘ujumoy,  
Bezovta qilmagin, hoy.  
Dam olayin ozgina,  
Menden qilmagin gina.

### G‘ujumoy:

— Bundoq sen ham tursang-chi,  
Chiniqsang-chi, yursang-chi.

### Qovoqvoy:

— Men oftobda pishaman.

### G‘ujumoy:

— Bu ahvolda xishasan.

### Qovoqvoy:

— Ariq bo‘yi juda soz,  
Mizg‘ib olayin bir oz.

(*Xurraq ota boshlaydi, G‘ujumoy qo‘lini siltab chiqib ketadi. Sahnaning boshqa burchida sharpa paydo bo‘ladi. Avval Chigirtka yugurib-sakrab o‘tadi-da, sheriklarini imlaydi. Ko‘sak qurti asia o‘malab kelib, atrofga alanglaydi.*)

### Ko‘sak qurti:

— Atrof jimjitmi, qalay?

### Chigirtka:

— Yomonmas, ancha qulay.

(*Ikkovi sahnaning uyoq-buyog‘ini aylanib chiqishadi-da, uvatda yotgan Qovoqvoyni ko‘rib qolishadi.*)

### Ko‘sak qurti:

— U to‘nkami, qarab ko‘r?

### Chigirtka:

— Xurraq otmoqda “xur-xur”  
Qovoqvoy bo‘lsa kerak.

### Ko‘sak qurti:

— Rosa otmoqda xurraq.

### Qovoqvoy:

(*uyqu aralash*)

— Qayoqdasiz, oyijon?

Ovqat pishadi qachon?

Ishtaham chalar karnay,  
Burnim-chi chalar surnay.

(*Burnini ushlab surnay chaladi.*)

G‘ata-g‘ut, g‘at-g‘at-g‘at,

Oyi, keltiring ovqat.



G‘ata-g‘ut, g‘at-g‘at-g‘at.

(*Yana o‘rniga borib yotadi. Yana pishillab xurrak otadi. Ko‘sak qurti va Chigirtka chetroqqa borishib, yana qaytib kelishadi.*)

**Chigirtka:**

— Xomkallasin pishitar.

**Ko‘sak qurti:**

— Sekin so‘zla, eshitar.

**Chigirtka:**

— Shunday yoshlik pallasi —

Ishlatmaydi kallasin.

**Ko‘sak qurti:**

— Bilmas tashvish,

qayg‘uni,

Oyisi boqar uni.

Oyisiga daxmaza,

O‘ziga rosa maza.

**Chigirtka:**

(*Tepasiga kelib uni turtadi.*)

— Tur, Qovoqvoy yigitcha,

Men do‘stingman Chigirtka.

**Qovoqvoy:**

(*Ko‘zini ochib qo‘rqadi.*)

— Voydod, oyi, oyijon,

Meni qutqaring chaqqon!

**Ko‘sak qurti:**

— Mana hozir ko‘rasan,

— Seni qilamiz xursand.

**Chigirtka:**

— Yur, hammamiz o‘ynaymiz,

Seni yolg‘iz qo‘ymaymiz!

(*Halloslab Qovunjon, Handalak, Taruzlar kirib kelishadi. Chigirtka va Ko‘sak qurti qochib qoladi.*)

**Tarvuz:**

— Ushla, ana Chigirtka!

O‘zini urdi chetga.

(*Yana quvib ketishadi, ular o‘rniga Chigirtka bilan Ko‘sak qurtining bolalari chopib o‘tishadi-da, halloslab to‘xtashadi.*)

**Ko‘sak qurti bolasi:**

— Qovun yetvolay dedi.

**Chigirtka bolasi:**

— Qayga qoqhamiz endi?

**Ko‘sak qurti bolasi:**

— Rosa quvladi Tarvuz,

Quvishdan tinmas hanuz.

Qochib qolinglar, chaqqon,

Kelishmoqda shu tomon.

(*Ikki yoqqa qochishadi-da, yana bir-birlari bilan qaytib uchrashishadi. Keyin zaldagi tomoshabin bolalarga murojaat qilishadi.*)

**Chigirtka bolasi:**

— Ey, bolalar, o‘ylangiz,

Bizni aytib qo‘ymangiz.

**Ko‘sak qurti bolasi:**

— Aytmaysiz-a, albatta,

**Chigirtka bolasi:**

— Aytishmaydi, gap bitta.

(*Zalga quloq solishadi.*)

**Ko‘sak qurti bolasi:**

— Aytamiz deyishmoqda,

Qaragin hammayoqda.

**Chigirtka bolasi:**

— Endi qayga boramiz,

Ushlashsa, yolboramiz.

(*O‘ylanib qolishadi. Qovunjon,*

*Handalak, Tarvuz ularni tutishmoq-chi bo'lishganda "voydod"lab chap berib qochishadi. Biri yotgan Qovoqvoyning ustidan sakrab o'tadi.)*

**Qovunjon:**

— Semizlik qilib,  
Nuqul yiqilib  
Yetolmading-a!

**Tarvuz:**

— Naynovlik qilib,  
Rosa yiqilib,  
Tutolmading-a!

**Handalak:**

— Ikkoving ham bemaza,  
Daxmazayu, daxmaza  
(*Qovoqvoy uyg'onadi.*)

**Qovoqvoy:**

— Uyqu bermaysanlar hech —  
Yugurishib erta-kech,  
Tinchimni buzasanlar,  
Haryoqda kezasanlar.

**Qovunjon:**

— Dunyodan xabari yo'q,  
Ko'zлari lo'q,  
O'zi suq.

(*Birdan Qovoqvoyning qorni esiga tushib ketadi.*)

**Qovoqvoy:**

— Ochib qolgandi qornim,  
Muzlay boshlaydi burnim.  
(*Oftobda terlagan burnini ushlab ko'radi.*)

Qarang, burnim terlasa,  
Qornim ocharkan rosa.  
Izlaysanlar hasharot.

**Qovunjon:**

— Sen-chi, izlaysan ovqat.

**Tarvuz:**

(*bolalarga murojaat qilib*)

— Bolalar, sizga savol,  
Javob beringlar darhol.  
Hasharot kimga qarshi?  
(*Bolalarga bir oz qarab turib*)  
Qoyil, topdingiz yaxshi.

**Qovunjon:**

— U hasharot — josus, yomon  
Doim keltirar ziyon.  
Uya qo'ygan o'tloqqa,  
Izg'ishadi haryoqqa.  
Uchrasa meva, ekin  
Yeyaveradi tekin.  
Qayoqdasan, Handalak?

**Handalak:**

— Buyoqdaman, ey, tarrak.

**Tarvuz:**

— Qani ketdik uchovlon,  
Bo'laylik hushyor, chaqqon.

(*Chopib chiqib ketishayotganda Dehqon bobo kelib qoladi.*)

**Tarvuz:**

— Keldilar, Dehqon bobom.

**Ikkalasi:**

— Dehqon bobo, assalom!

**Dehqon bobo:**

(*alik olib bo'lgach*)

— Shuni bilinglar, biroq  
Dalada ishlar chatoq.  
Oralagan hasharot,  
Bo'lish kerak ehtiyyot.  
Kirishinglar tez ishga —



Barchasini qirishga.  
Kim mard bo'lsa chinakam,  
Bizga beradi yordam.

**Uchchalasi:**

(*maqtanib, ko'krak kerib*)  
— Xo'p bo'ladi, bobojon,  
So'zingizga kiramiz,  
Qayda bo'lsa qiramiz.  
Sira qo'ymaymiz tirik.  
Ishimiz bo'lar yirik.

**Dehqon bobo:**

— Yashanglar, barakalla,  
O'tmasin fursat-palla.

**Qovunjon:**

— Anavi yotgan Qovoq,  
Yordam bermaydi biroq.

**Tarvuz:**

— O'zi yordamga muhtoj.

**Dehqon bobo:**

— Topinglar biror iloj.

**Qovunjon:**

— Yo'limizga yurmaydi,  
Ag'anaydi — turmaydi.

(*Uni Qovoqvoy eshitib qoladi.*)

**Qovoqvoy:**

— Nega turmas ekanman,  
Nega yurmas ekanman.

Tur desangiz, turaman,

Yur desangiz, yuraman.

(*O'rnidan turaman deb yana  
yiqilib tushadi. Boshqalar kulishadi,  
qo'l siltab chiqib ketishadi, o'zi bir  
amallab turadi.*)

**Qovoqvoy:**

— Qarang, turdim amallab,

Uxlab qopman hayallab.

(*o'zi yakka*)

Kallam nega umrbod

Darsni qilolmaydi yod?

Yoki ichi bo'shmikan?

Miyamikan — go'shtmikan?

Nima o'qisam esdan —

Chiqib qoladi tezda.

(*O'z boshiga do'qillatib urib  
ko'radi, og'rigach "voy-voy" laydi.  
Buni kuzatgan holda G'ujumoy  
kirib keladi.*)

**G'ujumoy:**

(*Ashula aytadi.*)

— Mening otim G'ujumoy,  
Oyimlar-chi Uzumoy.

Bilasanmi, Qovoqvoy,

Rosa shirinman o'zim.

Rosa pishganman o'zim.

Voy, voy Qovoqvoy,

Basharasi tovoqvoy.

Doimo xomxayolsan,

Bo'shanglarga misolsan.

Tanangda yo'qdir yog'ing,

Tortolmaydi oyog'ing.

Voy, voy Qovoqvoy,

Basharasi tovoqvoy.

**Qovoqvoy:**

(*Uni quvlayman deb yiqilib  
tushayozadi.*)

— Yuragimga sig'mas qil.

**G'ujumoy:**

— Alam qilsa, darsni bil.

Yordam desang, biz bormiz,

Yordamga biz tayyormiz!





— Ozsam bo‘laman tarrak.

**Dehqon bobo:**

— O‘yna, turfa mashqlar qil,  
Mashqing bekor ketmas bil.  
Harakatu harakat,  
Harakatdan barakat.

**Hamma:**

— Qani, Tarvuz, o‘ynab qol,  
Chiniqarsan ehtimol.

**Tarvuz:**

— O‘ynay qolay o‘ynasam,  
Qani, chalinglar qarsak.  
Bo‘shashma-ey, Handalak,  
Mendan har bir raqqosa —  
Bo‘ladi o‘rnak olsa.

(*Musiqa chalinadi, qarsak yan-graydi. Tarvuz o‘yinga tushadi. Ularning o‘yinini ko‘rib Qovoqvoy ham lapanglab kela boshlaydi. G‘ujumoyni ham o‘yinga tortishadi.*)

**Tarvuz:**

— Menga qarang,  
O‘zim tarang,  
Yurar, demang  
Arang-arang.  
Aylanaman,  
Shaylanaman.  
Ham semizman,  
Ham ixchamman,  
Ayting, axir  
Kimdan kamman?  
Aylanaman,  
Shaylanaman.

**Handalak:**

(*zavqlanib*)

— Sheryurakman,

Handalakman.

Hasharotni

Yengajakman,

Handalakman.

**Boshqalar:**

(*Lapar aytishadi.*)

— Xo‘ppa semiz Tarvuzvoy,  
Beqasam to‘n kiyan toy,  
Kiyan toy.

Gir aylanib o‘ynaysan,  
Yasha, Tarvuz, qo‘ymaysan.  
Xo‘ppa semiz, tuki yo‘q,  
Suvdan bo‘lak yuki yo‘q!  
O‘zi rosa pishigan,  
Barcha xursand ishidan.

**Tarvuz:**

— O‘yinini ko‘rib qo‘y  
Tarvuz tog‘angni,  
Tarvuz tog‘angni.  
O‘yin degan bunaqa —  
Bo‘lar og‘ayni,  
Bo‘lar og‘ayni.

(*Qovoqvoyni o‘yinga tortishadi. Uqochadi. Hammalari o‘ynab sahnanning chap tomoniga o‘tib ketishadi. Bir ozdan keyin yuziga to‘r tutib olgan O‘rgimchakkana boshliq hasharotlar paydo bo‘lishadi. Atrofga alanglashadi.*)

**O‘rgimchakkana:**

— Bo‘lib yurlaring ziyrak,  
Xo‘p, bunday qilish kerak.  
Buyrug‘im — qat’iy buyruq!  
Hech biring demagin “yo‘q”.



- Ko'sak qurti:**  
(ta'zim qilib)  
— Qani, aytsinlar asta,  
Bajaramiz birpasda.
- O'rgimchakkana:**  
— Qay biri landavurroq,  
Shunga qo'yinglar tuzoq.  
O'z ichidan yov toping,  
O'z ichidan ov toping.
- Chigirtka:**  
— Landavuri Qovoqvoy,  
Bir ish chiqar, hoynahoy.
- O'rgimchakkana:**  
— Ishda aniqqlik lozim,  
Bajaruvchi bormi, kim?!
- Chigirtka:**  
— Bunaqa ish xususda  
Ko'sak qurti ko'p usta.  
Yashirinchayuradi,  
Yaxshi reja quradi.
- O'rgimchakkana:**  
— Olishdan avval qo'lga,  
Solib ko'ringlar yo'lga.
- Ko'sak qurti:**  
— Birlikda bajaraylik,  
G'orga olib boraylik.
- O'rgimchakkana:**  
— Kim ko'rinsa, bekorga —  
Olib bormanglar g'orga,  
Sirimiz bo'lar oshkor,  
Gapim tagida gap bor.  
Bo'lsangiz qancha puxta,  
Yovga solasiz no'xta.
- (O'rgimchakkana chiqib ketadi.  
Boshqa hasharotlar alanglashadi.
- Qarashsa, yana hamma Dehqon bobo boshchiligidida Qovoqvoya gap uqdirib kelishmoqda, ular qochib qolishadi.)**
- G'ujumoy:**  
(yalinib)  
— Qovoq, o'ynay qol bir oz.
- Qovoqvoy:**  
(zarda qilib)  
— O'yinimga yo'q asos.
- Dehqon bobo:**  
— Osilibdi Qovoq labi,  
O'tgan yildagi kabi --  
Yo qoldimi sinfda?
- Qovoqvoy:**  
— Sira undoq emas-da.
- Dehqon bobo:**  
— Kasalmikan bo'lmasa?
- Tarvuz:**  
— Ham dangasa,  
Bemaza.
- Qovoqvoy:**  
(jahli chiqib)  
— Dangasaman, bemazaman,  
Qovoqman. Kallam sira  
ishlamaydi — ahmoqman.
- Dehqon bobo:**  
— So'zlasang so'zla tayin,  
Tushunib eshitayin.  
Yuzingdan qochirib rang,  
Unaqa bo'lma tajang.
- G'ujumoy:**  
— U sinfda qolgani yo'q.
- Dehqon bobo:**  
— Yaxshi bola, ko'nglim to'q.



### **G‘ujumoy:**

— Muallim debdi shunday:  
Ta’tilda sanqib yurmay,  
O’rgansang karrajadval,  
Hamma ishing bo‘lar hal.

### **Qovoqvoy:**

— Bo‘lmasa-chi, buni qarang,  
Men sinfda qolarmishman.  
O‘zim tugul boshqani ham —  
Xijolatga solarmishman.

### **Dehqon bobo:**

— Do‘stlarga yaxshi gapir,  
Yordamga tayyor axir!  
(*Erkalaydi.*)

### **Qovoqvoy:**

— Agar ochiqroq aytsam,  
Yalingim kelmas hech ham.

### **Dehqon bobo:**

— Yalinma, qil iltimos,  
Bu do‘slikka tushar mos.  
Tayinlay Chanoqvoysi,  
Qoldirmayin bir oyga.  
Karrajadvalni esa,  
O‘rgatib qo‘yar rosa.

### **Qovoqvoy:**

— U mendan kichkina-ku,  
O‘rgata olarmi u?

### **Qovunjon:**

— Aql yoshdamas, boshda.

### **G‘ujumoy:**

— Sening xayoling boshqa.  
Yordam beray desa kim,  
O‘zing qochasan doim.

### **Dehqon bobo:**

— Baxting bor-da, Qovoqvoy,

Kelib qoldi Chanoqvoy.

Tuzalay desa kasal,  
Tabib kelarkan jadal.  
(*Chanoqvoy kirib kelib hammaga salom beradi.*)

### **Qovoqvoy:**

— Men-chi, kasal emasman,  
Unga maxtal emasman.

### **Chanoqvoy:**

— Ishlarine qalay, o‘rtoq?

### **Dehqon bobo:**

— Ishi bir oz chatoqroq.  
O‘rgatsang karrajadval,  
Ishi bo‘lar ekan hal.

### **Chanoqvoy:**

— O‘rgatgin desa qachon,  
O‘rgataman op-oson.

### **Qovunjon:**

— Eshitding-mi, ey,  
   Qovoq,  
Do‘slik bo‘ladi bundoq.

### **Qovoqvoy:**

— O‘rganding deya kimdan  
Hamma kular ustidan.  
Rosa izza bo‘laymi,  
Kuyib jizza bo‘laymi?

(*Dehqon bobo qo‘l siltab chiqib ketadi.*)

### **Tarvuz:**

— Esingni yeganmisan,  
Kichkinamas, juda zo‘r.  
Nega qilmaysan pisand,  
Bo‘lmasa kurashib ko‘r.

### **Qovoqvoy:**

(*Boshini ushlab, o‘ylab turib*)

— Bo'pti kurashib ko'ray,  
Ko'tarib yerga uray.  
Kuchimni bir chog'lasam,  
Mendanmas majaqlasam.  
Mayib qilsam-chi agar,  
Men emasman javobgar.  
(*Ikkalasiga belbog' boylatishadi.*  
*Kurashga tushadilar. Qovoqvoy*  
*yiqiladi.*)

**Handalak:**

*(sakrab)*

— Chanoqvoy mitti,  
Qovoqni yiqitdi.  
(*Qaytaradi, Qovoqvoy turmaydi.*)

**Qovunjon:**

— Nima bo'ldi tur, o'rtoq,  
Maza ekanmi tuproq?

(*Qovoqvoy o'zidan ketib qolganga*  
*o'xshab yotaveradi.*)

**Chanoqvoy:**

— Qovoqvoy, o'rningdan tur,  
Yiqitganimga uzr.

**G'ujumoy:**

*(Tekshirib ko'radi.)*

— Qovoqning holi og'ir  
“Tez yordam”ga chop hozir!  
(*Hamma uni o'rab oladi, suv*  
*sepishadi, o'ziga kelmaydi.*  
*Handalak daraxtdagi telefon*  
*go'shangini olib raqam teradi.*)

**Handalak:**

— “Tez yordam”-u,  
“Tez yordam”  
Biz tomonga kel ildam.  
Manzilimiz: Paxtazor,

Bir yonida tokzor bor.  
Shu yerda yotar kasal,  
Ahvoli ancha o'sal.  
Yo'q, hasharot chaqqanmas,  
Yaxshi, urmoqda yurak.  
Ha, ha, ukolmi? Kerak!  
Ketmang uzoq, bedarak,  
Mening ismim, Handalak.  
(*Qovoqvoy o'rnidan turolmaydi.*  
*Hamma atrofida mashina*  
*kelayotganini bildirish uchun tez*  
*aylanadi. Qovoqxola paydo bo'ladi.*)

**Qovoqxola:**

— Dod, tushimmi, o'ngimmi?  
Kimlar urdi o'g'limni?  
Voy qayoqqa chopaman,  
Zo'rni qanday topaman?  
(*O'g'li onasini tanib yotaveradi.*  
*Boshqalar bu paytda qochib ketgan*  
*bo'ladi. Ba'zilar atrofda ko'rinish*  
*turishadi.*)

Ko'zingni och, oppog'im,  
Yolg'izginam, Qovog'im.  
Qanday chiday alamga,  
Kun berishmas bolamga.  
(*Xola bir chetda turgan G'ujumoya*  
*tashlanadi. U ham qochadi.*)

**G'ujumoy:**

— Men emasman, ey, xola,  
Kurashgan boshqa bola.  
Chanoq bilan kurashdi,  
Bir oz belni burashdi.

**Qovoqxola:**

— Qani menga shu fursat,  
O'sha zo'ringni ko'rsat.



Kuchlarini sinashgan,  
Yolg‘izimni qiyashgan,  
Ahvolini qaragin,  
Majaqlashibdi jag‘in.

(*Mashina ovozi keladi. Tarvuz, Qovunjon, G‘ujumoylar yugurib kelishadi, sahnani aylanib chiqishadi. Sahnaga sumka va bir qulochli shpris ko‘targan Lavlagijon bilan Oysholq‘omlar kirib kelishadi.*)

#### Oysholq‘om:

— Yalpisiga, assalom!  
Doim bo‘linglar sog‘lom.  
Xizmatingizga keldik,  
Yo‘l bo‘ylab rosa yeldik.

#### Lavlagijon:

— “Tez yordam” doim tayyor,  
Ming bir xilda dori bor.  
Aytsam gapning ochig‘i,  
Bor chuchugi, achchig‘i.  
Kasallarni sog‘ qilar,  
Ko‘ngillarni chog‘ qilar.

(*Biri sumkasini ochadi, biri shprisni sozlaydi. Buni ko‘rgan Qovoqvoyning yuragi taka-puka bo‘la boshlaydi. Unga yaqinlashib kelishadi. Qovoqvoyning oyisi ham cho‘chiy boshlaydi, bolasini bag‘riga bosib oladi. Ko‘zları olayib ketadi.*)

#### Oysholq‘om:

— Cho‘chimasin hech kasal,  
Ukol misoli asal.

#### Lavlagijon:

— Og‘rigan kim, bilaylik,  
Darhol yordam qilaylik.

#### Qovoqxola:

(*cho ‘chib*)  
— Tuzalib qoldi u sal,  
Men emas, o‘g‘lim kasal.

(*O‘g‘lini tashlab qocha boshlaydi. O‘g‘li onasining etagidan ushlab qoladi. U tortadi, o‘g‘li qo‘yib yubormaydi. O‘g‘lini tortib, birga qochishadi. Ularning ketidan shifokorlar shprisni o‘qtalgancha quvlashadi, yana sahnaga kirishadi, dodlab qochishadi. Tarvuz, Qovunjon, Chanoqvoylar ham birga qochishadi. Aralashib ketishadi. Birdan O‘rgimchakkana to‘dasi Qovoqvoyni ikki tomonidan kelib tutib oladi. Bu paytda onasi uni tashlab qochib qoladi.*)

#### PARDA

#### IKKINCHI KO‘RINISH

(*Allaqanday tashlandiq g‘or. Teparoq joyda podshohlarga o‘xshab O‘rgimchakkana o‘tiribdi. Atrof o‘rgimchak uyalari— to‘rlari. Sakrab-sakrab Chigirtka kiradi.*)

#### Chigirtka:

— Janob O‘rgimchakkana,  
Huzuringizda mana —  
Muntazirmiz erta-kech.

#### O‘rgimchakkana:

— Bunaqa demangiz hech  
Degandim necha marta.  
Tag‘in aystsang agarda



Osaman oyog‘ingdan.

**Chigirtka:**

— Kechiring, qulog‘imdan

Chiqib ketibdi bir oz.

Eslatdingiz juda soz.

Buyurganingiz, janob,

Eshikda turar shu tob.

**O‘rgimchakkana:**

— Oshkor bo‘lmasin-a sir,

Mayli keltir,

Birma-bir.

**Chigirtka:**

— O‘zi bitta-ku, taqsir.

**O‘rgimchakkana:**

— Ha, mayli qani ko‘ray,

Shoshma to‘rimni o‘ray.

(*O‘z to‘riga bekinib oladi.*

*O‘rtalariga Qovoqvoyni olib Ko‘sak qurti bilan Chigirtka kiradi.*

*Qovoqvoyning ko‘zi bog‘lab qo‘yilgan bo‘ladi. Ko‘sak qurti asta uning ko‘zini ochadi.*)

**Qovoqvoy:**

(*hayron*)

— O‘ynaymizmi shu yerda,

Pastqam joy

Ekan-ku, voy.

O‘ynagan yaxshi qirda.

(*ko‘zini ishqalab*)

Nega Chigirtka,

Olib kelibsan chetga.

Qanaqa joy o‘zi bu,

Hammayoq qop-qorong‘i.

**Ko‘sak qurti:**

— Avval sal nari yurgin,

Endi-chi, salom bergin.

**Qovoqvoy:**

— Kimga beraman salom?

Kallang ekan rosa xom.

**Ko‘sak qurti:**

— Tag‘in xiyol nari bor,

Salom bergin-chi bir bor —

To‘g‘riga qarab.

**Qovoqvoy:**

— Salom!

**O‘rgimchakkana:**

— Vaalaykum assalom.

(*Chiroq yonib to‘r orasida allaqanday bashara ko‘rinadi.*

*Qovoqvoy alanglaydi, qo‘rqa boshlaydi.*)

**Chigirtka:**

— Bunchalar qo‘rqma, Qovoq,  
Ul-bul desalar biroq,  
Gap qaytarmay degin xo‘p.

**Qovoqvoy:**

— Yoz chog‘ida ishim ko‘p.

**O‘rgimchakkana:**

— Nima deyapti o‘zi,  
Eshitilmaydi so‘zi.

**Chigirtka:**

— Ishlari bormish bir oz.

**O‘rgimchakkana:**

— U holda bo‘libdi soz.  
Qani yoqilsin chiroq,  
Gaplashinglar yaxshiroq.

Avval o‘ynab-kuldiring,  
Keyin gapga ko‘ndiring.

(*Chiroqlar yonib atrof ravshanlashadi. Hammayoq ko‘rinadi.*

*Allaqanday musiqa chalinadi.  
Chigirtka sakraydi. Ko'sak qurti  
buralib-buralib o'yinga tushadi.  
Ular Qovoqvoyni ham o'yinga  
tortishadi.)*

**O'rgimchakkana:**

- O'ynanglar, ho, o'ynanglar,  
Aytganimni o'ylanglar.

**Ko'philik:**

- Kel, Qovoqvoy, o'ynaymiz,  
Seni qo'ldan qo'ymaymiz.

*(Bu payt Qovoqvoy o'yinga  
aralasholmay, atrofga alanglab  
qochishni mo'jallab turadi. Uni  
yana o'yinga tortishadi.)*

**Qovoqvoy:**

- O'ynamayman, ketaman,  
Bu yerlarda netaman?  
Qidirib qolar oyim.

**O'rgimchakkana:**

*(Ko'sak qurtini yoniga chaqirib)*

- Gapirgin-chi muloyim,  
Qaranglar sal ko'ngliga,  
Ul-bul bering qo'liga.  
Yomon bo'lmoqda afti.

**Qovoqvoy:**

- Yig'lagim kelayapti.

*(“Voy, oyи, voy, oyи” deb  
beo 'xshov yig'lay boshlaydi.  
O'yinni to'xtatishib uni ovutishga  
kirishadilar. O'rgimchakkana to'r  
yopinib o'yinga tushadi.)*

**O'rgimchakkana:**

- O'yna, o'yna, Qovoqvoy,  
Bu yer juda yaxshi joy.

*(Qovoqvoy o'ynamaydi.)*

**Ko'sak qurti:**

- Egmayapti bo'ynini,

**O'rgimchakkana:**

- To'xtatinglar o'yinni.

*(Qovoqvoyni chuqur yoniga  
keltirishadi.)*

Ko'rdingmi, ana chuqur,

Ichini yaxshilab ko'r!

Tagida yotar ajdar,

So'zga kirmasang agar

Ishimizni boshlaymiz,

Seni g'orga tashlaymiz.

Tushib qolsang-chi g'orga,

O'lajaksan bekorga.

**Qovoqvoy:**

- Nima istaysiz mendan?

**O'rgimchakkana:**

- So'rab turmaymiz sendan,  
Berajakmiz topshiriq.

**Chigirtka:**

*(asta)*

— Topshiriq — juda qiziq.

Biz yoursak-chi, dalada

Hatto pana-panada —

Darov ko'rib qolishar,

Rosa quvib solishar.

**Ko'sak qurti:**

- Bir ishda bersang yordam,  
Soz bo'lardi judayam.

Sen ham xursand bo'lasan,

Doim o'ynab, kulasan.

**O'rgimchakkana:**

- Gapni ko'p aylantirmay,  
Hadeb aljirayvermay,



Keltir uni hoziroq,  
Tanishib qo'ysin Qovoq.  
(*Ko'sak qurti tezlikda bir xalta-chani olib keladi.*)

**Ko'sak qurti:**

— Mana shudir bor-yo'g'i,  
Hasharotlar urug'i.

**Chigirtka:**

— Ola qol, kel, ola qol,  
Ishing bitadi darhol.  
O'zingni bo'shatamiz,  
Uyingga kuzatamiz.

**O'rgimchakkana:**

— Qilma aslo iltimos,  
Buyruq deb, uqdir, vos-vos!

(*Qo'rqqanidan Qovoqvoy xalta-chani qo'liga oladi.*)

**Qovoqvoy:**

— Voy-bu, uning ichida  
Nima bor, badbo'y juda...

**Ko'sak qurti:**

— Dalada ham sekin och,  
Atrofga soch.

Tezda qoch!

**Qovoqvoy:**

— Izimdan chopishmas-mi?  
O'zimga yopishmasmi?

**Chigirtka:**

— Hali ular kichkina,  
Senga qilmas hech nima.

**O'rgimchakkana:**

— Yaxshilikcha xo'p degin,  
Xursand bo'lsan keyin.

**Ko'sak qurti:**

— Kimni sen yomon ko'rsang,

Ahvolin qilasan tang.

**Qovoqvoy:**

— Sochsam qutulamanmi?  
Yoki tutilamanmi?

**Ko'sak qurti:**

— Qutulasan, ketasan,  
O'z uyingga yetasan.

**O'rgimchakkana:**

— Esingdan chiqib qolsa,  
Biror joyda yo'qolsa,  
Javob berasan o'zing!  
O'yib olinar ko'zing.

**Qovoqvoy:**

— Esimda qolmas sira,  
Ko'zim ham bir oz xira.

**Ko'sak qurti:**

— Shiralik yegin ko'proq,  
Esingda qolar uzoq.

**O'rgimchakkana:**

— Qani, ishga tezroq bor,  
Esingdan chiqmasin g'or!

**Qovoqvoy:**

(*tomoshabinlarga qarab*)

— Bolalar, nima qilay,  
Qay biri menga qulay?  
Qochsam tutishar darrov,  
Qovoqligim bo'lar g'ov.  
Saqlash uchun jonimni,  
Hech kim olmas yonimni.  
Olaymi yo olmaymi?

(*O'ylaydi.*)

Nima desangiz mayli...

O'ylab ko'ray bir o'zim,  
Zora ishlasa esim.

Aqlim ishlaganda sal,

Bo‘lmasdim buncha o‘sal.  
Har holda ola qolay,  
Qutulsam bas, har qalay.  
(*shartta hasharotlar yoniga kelib*)  
Mayli beringlar dangal.  
**Ko‘sak qurti:**  
— Mana, ishing bo‘ldi hal.  
**O‘rgimchakkana:**  
— Qani, tez kuzatinglar,  
Yanglishsa tuzatinglar!  
(*Hasharotlar unga qulluq qilishadi.*  
*Xaltachani Qovoqvoyning beliga bog‘lab qo‘yishadi. Shundan keyin uning ko‘zini ham bog‘lashadi-da, olib chiqib ketishadi).*

#### PARDA

### UCHINCHI KO‘RINISH

(*Qovoqvoylarning uyi. Qovoq shaklidagi uyning tomi. Eshigi qovoq yaprog‘idan. Har bir buyum Qovoqqa tegishli. Qovoqvoy o‘ziga o‘xshagan to‘pni o‘ynab yuribdi, to‘pi ham qovoq shaklida. Unga i p boylab olgan bo‘ladi. To‘p o‘ynab, qo‘shiq aytadi.*)

**Qovoqvoy:**  
— To‘pim to‘p-to‘p,  
Qochma ko‘p-ko‘p.  
Nima desam,  
Degin xo‘p-xo‘p.  
Yuzlaringdan  
O‘pay cho‘p-cho‘p.

(*Takrorlaydi.)*  
Ey, bolalar, qalay qo‘shig‘im sizlarga yoqdimi?  
Uni o‘zim to‘qidim.  
(*gerdayib*)  
Bo‘lmoqchiman men shoir,  
Kitob yozaman  
Qovoqqa doir.  
Bir pasda she’r to‘qiymen,  
Uni yozmay o‘qiymen.  
Buni menga Po‘lat Mo‘min bobom o‘rgatgan,  
Qalbimga ilhom o‘rnatgan.  
“Odob va oftob” degan  
she’rlarini o‘zgartirib,  
“Oftob va koptok” degan she’r yozganman:

Oftob tepada,  
Koptokni tepaman.  
Qoyilmi?  
Men bilan futbol o‘ynaysizmi?  
(*Bolalarga to‘pni tepadi. To‘p qaytib kelib boshiga tegadi.*)  
Voy-voy boshim, voy boshim  
Yorildimi yo qoshim!  
(*Qoshini paypaslab ko‘radi.*)  
Uncha tegmabdi yomon,  
Hozircha boshim omon.  
Bu o‘yin ham foydasiz.  
Ey, oyijon, qaydasiz?  
Kelayapti yig‘lagim,  
Voy, oyi, hoy, oyi.  
**Qovoqxola:**  
(*yugurib chiqib*)  
— Toychog‘im,



Ovunchog‘im,  
Nima deysan, do‘mbog‘im,  
Nima yeysan, qovog‘im?

**Qovoqvoy:**

— Koptok tegdi boshimga,  
Shu sabab ko‘z yoshimga.

**Qovoqxola:**

— Qo‘y, yig‘lama, yolg‘izim,  
Ham o‘g‘limsan, ham qizim.

**Qovoqvoy:**

— Kerakmas, qiz emasman!

**Qovoqxola:**

— Mayli boshqa demasman.

(*Og‘ziga qovurilgan qovoq urug‘i soladi. Uni tuflab tashlaydi.*)

**Qovoqvoy:**

— Yemayman qovoq urug‘,  
Sira uning yog‘i yo‘q.

(*Onasi og‘ziga konfet soladi.*)  
Shirin ekanu juda,  
Nimasi bor ichida?  
Buni yesa bo‘ladi,  
Rahmat desa bo‘ladi.

**Qovoqxola:**

— Ichida bor asali,  
Shuning uchun mazali.  
Sendan o‘zim o‘rgilay,  
Jonim qoqindiq bo‘lay.  
O‘qiy qolgin kitobing.

**Qovoqvoy:**

— Mazam yo‘q meni ancha.

**Qovoqxola:**

— Qochgan bo‘lsa-chi tobing,  
Bo‘lsin o‘zing aytgancha.  
Xafa bo‘lma, jon bolam.

**Qovoqvoy:**

— Sira ham yo‘q hafsalam.

Tunov kuni Chanoqvoy,  
Masxara qilib, voy-voy,  
“Qovoq sinfda qoldi.  
Ikki karra uch — olti”  
Degani qildi alam.

**Qovoqxola:**

— Parvo qilma, jon bolam,  
Tuzalib ham ketarsan,  
Kelasi yil o‘tarsan.  
(*Ketadi.*)

**Qovoqvoy:**

(*O‘zicha mashq qilgan bo‘ladi.*)

— Men shoir bo‘lmoqchiman,  
Eng mashhur bo‘lmoqchiman.  
Qofiyam joyidami?  
Buzmayman qoidani.  
Ikki karra uch — olti,  
Kitob, qalam yo‘qoldi.  
Bilib qolibman sal-pal.

(*Sevinib bolalardan so‘raydi.*)

Oson-ku karrajadval.  
Bilish ekan juda jo‘n,  
Uch karra uch bo‘lar o‘n.  
Endi ishlarim qandday  
To‘g‘ri topdimmi, qalay?

(*Zaldan noto‘g‘ri deb aytishadi.*)

Kim u noto‘g‘ri degan?

Qofiya bilmas ekan.

(*Ikki qo‘lidagi barmoqlarini  
uchta-uchtadan qilib sanab chiqadi-  
da, yana yanglishib ketadi, qayta  
sanaydi, to‘qqiz chiqadi.*)

Uchta uch bo‘lar to‘qqiz,





Men bir oz uyquchiman,  
Yetishmas menda chidam.

**Sehrgar:**

— Agar ko'nmasang shartga,  
Jo'nab qolaman shartta.

(*Keta boshlaydi.*)

**Qovoqvoy:**

— Ey, bobo, axir shoshmang.  
Qilmang unaqa tarang.  
Ozgina o'ylab olay,  
Balki bo'lar noqulay.

(*Sehrgar bekinadi. Qovoqvoy topolmay yig'laydi. Yig'i ovozini eshitib Qovoqvoyning oyisi yugurib chiqadi. Qovoqvoy oyisiga qaramay toonga chiqadi-da, atrofga qaraydi.*)

**Qovoqxola:**

— Nima qildi, Qovog'im,  
Yana seni urdi kim?

**Qovoqvoy:**

— Narroq turing, oyijon,  
Ishim bo'lmasin yomon!

**Qovoqxola:**

— Ketsam ketay, Qovog'im,  
Yuvay qozon-tovog'im.

(*Ketadi.*)

**Qovoqvoy:**

(*o'zicha*)

— Bo'limganida g'oyib,  
Ish bo'lardi ajoyib.  
Eh, o'zim qovoqkalla,  
O'tib ketdi soz palla.

(*Qovoqvoy tomdan tushadi.*)

*Sehrgarni izlaydi. Ko'sak qurti*

*bilan Chigirtka paydo bo'ladi.)*

**Ko'sak qurti:**

— Uni bizlar yubordik,  
O'rgatgin deb yolbordik.

**Qovoqvoy:**

— Ketib qoldi-ku o'zi,  
Qiyan ekan shart-so'zi.

**Chigirtka:**

— Nima desa ko'naver,  
Qaytib kelar, qo'yaver.  
Juda ham egma bo'yin,  
O'zingga bo'lar qiyin.

**Ko'sak qurti:**

— Qaltiraysan namuncha,  
Nima bo'ldi tuguncha?

**Qovoqvoy:**

— Qayergadir ko'muvdim,  
Belgilar ham qo'yuvdim,  
Topolmayapman sira,  
Degandim ko'zim xira...

(*Chigirtka va Ko'sak qurti Qovoqvoyga do'q qilib, urmoqchi bo'lishganda Sehrgar bilintirmay kela boshlaydi. Ular qochishadi. Qovoqvoy xomush.*)

**Qovoqvoy:**

(*o'zicha*)

— Nega ko'na qolmadim,  
Yurishardi omadim.  
O'zimga o'zim qildim,  
Kamchiligidimni bildim.  
Eh, ko'nsam bo'lar edi.

**Sehrgar:**

(*Keladi.*)

— Yordam beraman endi.



**Qovoqvoy:**

(sevinib)

— Ne desangiz yuraman,  
Xo‘p, yettida turaman.

**Sehrgar:**

— To‘rtinchi shartim, bola,  
Ishni qilma hech chala.  
Nima o‘rgatsam, uni —  
Yod olasan shu kuni.  
Yana bir shartim, o‘g‘lon,  
Sira gapirma yolg‘on.  
Barcha shartimga ko‘nsang,  
Bajarishga mard bo‘lsang,  
Karrajadvalni, chin gap,  
O‘rgataman yaxshilab.

**Qovoqvoy:**

(Cho ‘chib boshini ushlaydi, nima  
deyarini bilmaydi. O‘ylab qoladi.)

— Ey, bobojon, siz agar  
Bo‘lsangiz chin Sehrgar,  
O‘rtoqlarim har birin  
Aytib bering-chi sirin.

**Sehrgar:**

— Eshitib ol so‘zimni,  
Yumib turib ko‘zimni,  
Dilingdigin aytaman,  
Shunday kuchga egaman.  
Chanoqvoy yordam bersa,  
Qo‘pollik qilding picha.  
Qalay topdimmi, Qovoq,  
Buyog‘i bo‘ldi qandoq?  
Shunaqa nuqsoning bor,  
Bilib oldim ko‘zingdan, —  
Kichkinadan o‘zingdan —  
O‘rganishga qilding or.

Gapim to‘g‘rimi, Qovoq?

**Qovoqvoy:**

— So‘zingiz to‘g‘ri, biroq —  
Topdingiz axir qandoq?

**Sehrgar:**

— Berma bunaqa savol,  
Buzilar fikr-xayol...  
Shartim bajarilmasa,  
Ishing bo‘lar bemaza.  
Kuchin yo‘qotar sehrim,  
Yomon ishlaydi zehnim.

**Qovoqvoy:**

— Qanaqa mashq bajaray,  
O‘rgating-da, har qalay.  
(U to ‘nka ustiga chiqadi.)

**Sehrgar:**

— Xo‘p, bo‘lmasa, tayyor bo‘l,  
Mana bunday ko‘tar qo‘l.  
Topshiriqqa qulq sol,  
Avval chuqur nafas ol.

(Sehrgar shu tarzda har xil  
harakatlarni o‘rgatadi. Qovoqvoy  
charchaydi, holdan ketib to‘nka  
ustidan zo‘rg‘a yerga tushadi.)

**Qovoqvoy:**

— Karrajadvalni bir-bir  
O‘rgata qoling hozir.

**Sehrgar:**

— O‘tir mayli, Qovoqvoy,  
Shu yer bo‘lsin bizning joy.  
Ikki karra uch — olti,  
Qovoq sinfda qoldi.

**Qovoqvoy:**

— Ey, bobojon, hoy-hoy-hoy,  
Shunday derdi Chanoqvoy.



**Sehrgar:**

— Chanoqvoy shunday derdi,  
U menga ma'lum edi.  
Gapga yaxshi qulog sol,  
Tezda uni yodlab ol.  
Terak shoxi bo'lar mo'rt,  
Ikki karra ikki — to'rt.

**Qovoqvoy:**

(*Qaytaradi.*)

— Terak shoxi bo'lar mo'rt,  
Ikki karra ikki — to'rt.

**Sehrgar:**

— Bekor ishga yugurma,  
To'rt karra besh — yigirma.  
Do'stlar aytgan gapga ko'n,  
gapga ko'n,

Beshta ikki bo'lar o'n, bo'lar o'n.

(*Qovoqvoy bilan Sehrgar yuqoridagi  
to'rtlikni qo'shiq qilib takrorlashadi,  
bolalarga maqtanishadi, bolalar ham  
zaldan ularga jo'r bo'lishadi.*)

Bugundan kech qoldirmay,  
Yodlab olgin har qalay.

Tayyor bo'lsin ertaga,  
Men so'rayman jo'rttaga.

**Qovoqvoy:**

— Juda ko'p-ku, bobojon,  
Yod olish emas oson.

**Sehrgar:**

— Qovoq, ko'ngling bo'lsin to'q,  
Qiynalmasang rohat yo'q.

(*sekin Qovoqvoyning yoniga  
kelib*)

Chigirtka, Ko'sak qurti,  
Senga nega do'q urdi?

**Qovoqvoy:**

— Aytsam ketadi boshim.  
Qandayin yeymen oshim?

**Sehrgar:**

— Saqlasang ham uni sir,  
Bilvolaman bari bir.

(*Qovoqvoy sekin Sehrgarning  
qulog'iga bir nima deb shivirlaydi.*)

**Sehrgar:**

— Faqat sen yo'l boshlaysan,  
Ishni o'zim boplayman.  
Senga bo'lmas hech nima,  
Ey, Qovoqvoy, cho'chima.  
Ko'nglingni qilaver to'q.  
Qiynalmasang rohat yo'q!  
(*G'oyib bo'ladi.*)

**Qovoqvoy:**

(*sahnaning oldirog'iga kelib*)

— Qiynalmasang rohat yo'q!  
Shoirligim yaxshimi?

Yoki sizlar qarshimi?

Semiraman, ozaman,  
Bir zumda she'r yozaman.  
Shoirlikka berilib,  
Yurajakman kerilib.

(*Boshini ushlab nimadir o'ylagan-  
day uyoqdan-buyoqqa yuradi.*)

Qofiya-qofiya o'ynaysizmi?

O'zimday tez o'ylaysizmi?

Mening otim-chi, Qovoq.

Unga qofiya ahmoq.

Kulavermang bekorga,

O'xshab ba'zi beorga.

PARDA

## 2-PARDA TO‘RTINCHI KO‘RINISH

(Yoz. G‘o‘za gullagan payt.  
Sahnaga Chanoqvoy boshchiligidagi  
yelkalariga dori purkagich orqalagan  
Tarovuz, Qovunjon, Handalak va  
G‘ujumoylar kirishadi. Qo‘llarida  
bonkacha, kapalak tutadigan  
suzg‘ich. Ular g‘o‘zaga tushgan  
Ko‘sak qurti, O‘rgimchakkana,  
Kapalaklarni ushslashga kelishgan.  
Chanoqvoy qo‘sish qoshlaydi.)

### Chanoqvoy:

— Ey, o‘rgimchakkanalar,  
Ko‘rinmas pakanalar.  
Ham xolangiz, ammangiz,  
Asirman deb hammangiz  
Ko‘taringlar tezda qo‘l,  
Hech bermaymiz sizga yo‘l!

### G‘ujumoy:

(Davom ettiradi.)

— Yalmog‘iz ko‘sak qurtlar,  
Yaramaslar — beburdlar,  
Ey, ochofat chigirtka,  
Asirman deb chiq chetga.  
Men hammangni ushlayman,  
Jag‘-jag‘ingga mushtlayman.

### Tarovuz:

— Seni topmay qo‘ymayman.  
Ko‘zlaringni o‘ygayman.  
Yuzingga qora surkayman,  
Gazli dori purkayman.  
Rosa boplab urgayman,

Purkayman! Purkayman - o-o-o!

### G‘ujumoy:

— Ovozing ekan baland.

### Chanoqvoy:

— Buni deydilar talant.

### Qovunjon:

— To‘g‘ri aytadi Chanoq,  
Talantga oq yo‘l har choq.

### Tarovuz:

— Hofiz bo‘lardim mashhur,  
Yo‘l bermas qorin qurg‘ur.

(Qovoqvoy ko‘rinadi.)

### Qovunjon:

— Nima bo‘lgan Qovoqqa?  
Boqib qopti osmonga.  
Ishi o‘xshar yomonga.

### Chanoqvoy:

— Kel, og‘ayni, buyoqqa.

### Tarovuz:

— U nimani izlaydi?

### Qovunjon:

— Yengil ishni ko‘zlaydi.

### Tarovuz:

— Osh bo‘lsa, ish bo‘lmasa,  
Yoz bo‘lsa, qish bo‘lmasa.

### G‘ujumoy:

— Xafa bo‘lmasin Qovoq,  
Uni ranjitma bundoq.

### Tarovuz:

— Doim yuradi bekor,  
Ham ishyoqmas, ham beor.  
Ishda pishsin biz kabi,  
Shunday do‘stlar talabi.

### Qovunjon:

— Kelishlariga qarang,



Qadamin bosar arang.

(*Qovoqvoy asta-sekin keladi.*)

**Tarvuz:**

— Qovoq, Qovoq, xom Qovoq,  
O'qishda, ishda qoloq.

**Qovoqvoy:**

— O'zing-chi, rosa quvsan,  
Iching to'la liq suvsan.

**Tarvuz:**

— Men-chi dalada ishlab,  
Yuribman toyday kishnab.

**Qovoqvoy:**

(*kerilib*)

— Men uchratdim Sehrgar,  
Nima istasam agar —  
Qila olamiz shuni,  
Uchrashamiz har kuni.  
Chanoqvoy, quloq solgin,  
Mendan-chi, o'mnak olgin.  
Rostini aytsam senga,  
Karrajadvalni menga  
O'rgatib qo'ysi talay.  
Ko'nglim ochildi gulday.  
Men shoir bo'lmoqchiman,  
Bor emish menda chidam.  
She'r to'qiymen bir zumda,  
Hatto tushda, uyqumda.  
Yuribsanlar bo'shashib,  
Ishlaringdan adashib.

**G'ujumoy:**

— Gaping rostmi, Qovoqvoy,  
Maqtanyapsan hoynahoy?!

**Qovoqvoy:**

— Ishonmasang, so'rab ko'r,  
Bilarsan kim ekan zo'r!

**Qovunjon:**

— Yettita ikki qancha?

(*Qovoqvoy ancha vaqt o'y lab goladi, bolalardan borib so'raydi.*)

**Tarvuz:**

— Yettita ikki — ancha.  
(*Boshqalar kulishadi.*)

**Qovoqvoy:**

(*Ko'zini yumib olib eslaydi.*)

— Terak shoxi bo'lar mo'rt,  
Yettita ikki — o'n to'rt.

Topish bo'ladi bundoq,  
Bilib qo'y, Tarvuz o'rtoq.

**Chanoqvoy:**

— Ey, qoyil-ku, ey qoyil,  
O'rganibsan astoydil.

**Qovoqvoy:**

— Eshitib tur, ey, Tarvuz,  
Uch karra uch, bu — to'qqiz.

(*Yana bolalardan so'raydi. Ular "To'g'ri-to'g'ri" deyishadi.*)

To'g'ri, to'g'ri, ha, to'g'ri,  
Uni topmagan o'g'ri.

Hammang haqingda bir-bir,  
She'rlar to'qiymen hozir.

Seni deydilar Qovun,  
Sendan yasalar sovun.

Ey, Tarvuzim, ey, Tarvuz,  
Yumalaysan betormoz.

Ey, G'ujumoy, ey, G'ujum,  
Qilgin menga tabassum.

Ho've, yumaloq Handalak,  
Beqasam kiygan chelak.

**Chanoqvoy:**

(*chetga qarab*)

— Buni o‘zi to‘qibdi,  
Darsni durust uqibdi.  
Qilsa agar hafsala,  
Unda ham ishlar kalla.

**Qovoqvoy:**

— Toshloq joyda yugurma,  
To‘rt karra besh — yigirma.  
Do‘srlar aytgan gapga ko‘n,  
Ikkita besh bo‘lar o‘n.

**Hamma:**

— Qoyil, qoyil, Qovoqvoy,  
Kallang bo‘pti ancha boy.

**Qovoqvoy:**

— Menga qo‘ygan — talay shart  
Bajaryapman, bo‘lib mard.

(*Keriladi.*)

Sehrgar kuchli juda.

**Chanoqvoy:**

— Bu gaplaring behuda.

**Qovoqvoy:**

— Uchrashtirsam, Chanoqvoy,  
Sen bo‘lasan o‘sal-loy.

**Chanoqvoy:**

— Ahvolingga kulaman,  
Senga hayron bo‘lamан.  
Ishonmaysan hali ham,  
Sehrgar mendan kuchsiz,  
So‘zing bemaza — tuzsiz,  
Berolmas senga yordam!

**Qovoqvoy:**

— Qo‘lini-chi, Sehrgar  
Shunday silkitsa agar,  
Paxta bo‘ladi xirmon.

**Chanoqvoy:**

— Barcha gaping g‘irt yolg‘on.

**Qovoqvoy:**

— Qo‘lini shundoq qilar,  
Hasharotlar qirilar.

**Chanoqvoy:**

— G‘alatirog‘-a so‘zing,  
Laqma ekansan o‘zing.  
Vahma gaping qilgin bas,  
Bundayin ish qilolmas!  
Ko‘rsatib bo‘psan, Qovoq,  
So‘zlarining yolg‘on, chatoq.  
Kelmoqchi edi qachon?

**Qovoqvoy:**

— Bugun otganida tong.

**Chanoqvoy:**

— Demak, gaplari yolg‘on!

**Qovoqvoy:**

— Men uchratdim, gapim rost,  
Har gapimga bor asos,  
Yoki kelar ertalab.

**Chanoqvoy:**

— Sehrgar — bu yolg‘on gap.  
Qovoqvoyning boshi xom,  
U kelmaydi, gap tamom.

**Qovoqvoy:**

— Keladi u.

**Chanoqvoy:**

— Kelmaydi.

Unchalik ketma katta.

**Qovoqvoy:**

— U keladi, albatta!  
(*Yig‘laydi.*)

**Chanoqvoy:**

— Kelsa kelar, ha mayli.

**Qovoqvoy:**

— Tongda kelar poylayman.



**Chanoqvoy:**

— Kelmaydi, bahs boylayman,  
Bari bir men yutaman.

**Qovoqvoy:**

— Va'da bergen, kutaman.

**Qovunjon:**

— Shartimiz shu, kelmasa —  
Bo'lavermay dangasa,  
Hasharot terish uchun  
Chiqajaksan sen bugun.

**Chanoqvoy:**

— Ikki karra besh-chi, o'n!  
Do'stlar aytgan gapga ko'n.

**Qovoqvoy:**

— Sehrgar aytgan buni,  
Soz ekanmi mazmuni?

**Chanoqvoy:**

— Aytgan bo'lsa aytgandir,  
Bahs boylashdik biz, axir.

**Qovoqvoy:**

— Ishga chiqqanim bo'lsin,  
Menga sehrgar kelsin.  
Hasharotdan qo'rqlayman,  
Uni tirik qo'yayman.

Paxtazorga kiraman,  
Ko'ringanin qiraman.

**Tarvuz:**

— Qovoq, Qovoq, xom Qovoq,  
Turgan bitganing tovoq.

**Qovoqvoy:**

— Kim Qovoq?

**Tarvuz:**

— Sensan Qovoq.

**Qovoqvoy:**

— Sen-chi Tarvuz.

**Tarvuz:**

— Ha, men Tarvuz.

**Qovoqvoy:**

— Bolalar, men Qovoqman-a?  
Sizlarga chin o'rtoqman-a?  
Sen qo'zivoy Tarvuzsan,  
To'xtamas, betormozsan.

**Tarvuz:**

— Sen tomosha Qovoqsan.

**Qovoqvoy:**

— Dori yegan Tarvuzsan.

**Tarvuz:**

— Sen-chi, sapcha Qovoqsan.

**Qovoqvoy:**

— Sen tuzlangan Tarvuzsan.

**Tarvuz:**

— Sen-chi, oyim Qovoqsan  
Ya'ni doim Qovoqsan.  
Kuchimiz sinashamiz,  
Kel, boksga tushamiz!

(*Boksga shaylanadi, boks  
qo'lqopini topib kelishadi.*)

**Qovoqvoy:**

— Suvingni chiqaraman!

**Tarvuz:**

— Urug'ing chiqaraman!

(*O'yin boshidayoq Tarvuz uning  
chakagiga solib qoladi.*)

**Qovoqvoy:**

— Voy, chakagim, voy-voy,  
Urish yo'q-da to'satdan,  
Bu hisobmas, boshqatdan.

**G'ujumoy:**

— To'g'ri aytar Qovoqvoy.

(*Yana tushadilar, Qovoqvoy*



*yengilay deganda sahnadan  
Chigirkalar, Ko'sak qurtlari chopib  
o'tishadi. Hamma shoshib qoladi.  
Shu paytda G'ujumoy Dehqon  
boboni suyab sahnaga olib kiradi.  
U gapirolmaydi.)*

**Chanoqvoy:**

— Nima qildi, bobojon?

**G'ujumoy:**

— Hollari ancha yomon.

**Dehqon bobo:**

(zo'rg'a)

— Uch-to'rttasi kelib zo'r,  
Ustimga tashladni to'r.

Olishdim anchagini.

**Qovoqvoy:**

— U-chi, O'rgimchakkana!

**G'ujumoy:**

— Sen bilasan qayoqdan?

**Chanoqvoy:**

— Gap olasan Qovoqdan.

(*Dehqon bobo holdan keta boshlaydi. Shpris o'qtalgan Lavlagijon va Oysholg'omlar Ko'sak qurti va Chigirkani quvib o'tishadi.*)

**Oysholg'om:**

— Qochma, qochma, go'rso'xta.

**Lavlagijon:**

— Qo'ymaymiz, qochma, to'xta!

(*Ular bu yerdagilarni ko'rib  
to'xtashadi, hasharotlar qochib  
ketadilar. Oysholg'om va Lavlagijon  
Dehqon boboga yordam berishadi.*)

**Oysholg'om:**

— Bu holda bo'lmas axir,

Kasalxonaga hozir —

Avaylab eltish kerak.

**G'ujumoy:**

— Hollari og'ir demak,  
Endi nima qilamiz?

**Oysholg'om:**

— Tezda davo qilamiz.

(*Dehqon boboni olib ketishadi.*)

*Faqat Tarvuz bilan Qovoqvoy qoladi.)*

**Tarvuz:**

(g'ayrat bilan)

— Qovoq do'stim, qani, ha,  
Barin ushlaymiz, olg'a!

**Qovoqvoy:**

(*Qo'liga qarasa — qo'lqop*)

— Qovoqvoy, sen ham ol, ha,  
Orqada qolma, olg'a!

Yovuzni axtaraman,  
Bir urib ag'daraman!

Yorayin-da jag'ini,  
Chiqaray abjag'ini.

(*Qo'lini ko'taradi, chopib chiqib  
ketadi.*)

**PARDA**

**BESHINCHI**

**KO'RINISH**

(*Birinchi ko'rinishdagi manzara.  
Erta tong. Tarvuz, G'ujumoy,  
Handalak, Chanoqvoy, Qovunjonlar  
o'tirishibdi.*)

**Tarvuz:**

— Ishga ancha kech qoldik,  
Qani tezroq yo'l oldik.



Hasharotni uyquda —  
Ushlash qulaydir juda.  
**G'ujumoy:**  
— Qovoqni kutish kerak,  
Yaxshimas tashlab ketsak.  
Sehrgar cholni axir  
Men ham ko'rib qo'yay bir, —  
Deya o'ylab yurardim.  
Undan madad so'rardim.

**Chanoqvoy:**  
— Sehrgardan G'ujum ham,  
So'ramoqchi-ya yordam?

**Tarvuz:**  
— Men so'rardim bir ishni:  
Ya'ni ozroq ozishni.

**G'ujumoy:**  
— Ishonmaymizu ammo...  
**Chanoqvoy:**  
— Gaplaringiz bema'no,  
Nimalar bo'ldi sizga,  
Ishoning aqlingizga.  
Qovoqqa o'xshab tag'in —  
Ayta qolay ochig'in —  
Yurmangiz bo'lib izza,  
Kuyinib, bo'lib jizza.

(*Chanoqvoy gapirayotganda*  
*Qovoqvoy shoshib-pishib ko'zini*  
*ishqalab kirib keladi.*)

**Qovoqvoy:**  
— Sehrgarim keldimi?  
U bir nima dedimi?  
Xuddi uning tovushi  
Eshitildi quloqqa.

**Chanoqvoy:**  
— Sehrgarda es-hushi.

**Qovoqvoy:**  
— Ketib qoldi qayoqqa?

**Chanoqvoy:**  
— Hech kim kelmadi, o'rtoq,  
Avvalo, salom, Qovoq!

**Qovoqvoy:**  
— Uning gapini hozir  
Eshitib qoldim axir.  
Senlardan cho'chidimi?  
Sehr qilib uchdimi?

(*Uyoq-buyoqqa yugurib qaraydi,*  
*qidiradi.*)

**Chanoqvoy:**  
— Bo'lma buncha jonsarak,  
Sehrgardan yo'q darak.

**Qovoqvoy:**  
— Sehrgar ovoziga  
Ovozing o'xsharkan sal.

**Chanoqvoy:**  
— Qarang-a da'vosiga,  
Bo'lmaydi sira o'sal, —  
Qovoqvoy yutqazsa ham.

**Tarvuz:**  
— Rosa qilmoqda alam.

(*Shu orada G'ujumoy, Tarvuz*  
*chiqib ketishadi.*)

**Chanoqvoy:**  
— Qilsang badantarbiya,  
Yaxshi ishlaydi miya.

**Qovoqvoy:**  
— Shuning uchun albatta,  
Kirib qoldim g'ayratga.

(*Har xil harakatlar qilib ham-*  
*mayoqqa yuguradi. Shu payt Tarvuz,*  
*G'ujumoy kelib qolishadi.*)



### Tarvuz:

— Kuchli bo'lsang agarda  
Boksga tush bir marta.

### Qovoqvoy:

— Buzilmasmi qoida?

### G'ujumoy:

— O'ynaymizmi shu joyda?  
O'zim bo'laman hakam  
Yutganga bor zo'r hadyam.

(*Tarvuz bilan G'ujumoy yugurib chiqib ketishib boksyorlar qo'lqopini topib kelishadi. O'yin boshlanadi. Oldin Qovoqvoy bor kuchi bilan harakat qiladi. Tarvuzning mazasi qochadi. Keyin Tarvuz kuch yig'ib Qovoqvoyni yenga boshlaydi. Oxirida Tarvuz yutadi. Qovoqvoy o'tirib oladi. G'ujumoy Tarvuzga bir bonkada suv keltiradi. Tarvuz esa uni Qovoqvoyna beradi, u ichib oladi, o'midan turadi. Tarvuz bilan ko'rishadi.*)

### Qovoqvoy:

— Hammadan oldin ketay,  
Juda zo'rini tutay.

### Chanoqvoy:

— Qovoq o'rtoq, qani yur.

### G'ujumoy:

— Sal dam olay, shoshmay tur.

(*G'ujumoy chiqadi.*)

### Qovoqvoy:

— Bir oz poylasam agar,  
Kelib qolar Sehrgar.

### Chanoqvoy:

— "Ikkita besh bo'lar o'n,

Do'stlar aytgan gapga ko'n!"

Deya aytuvding o'zing,  
Bitta bo'lsin-da, so'zing!

(*Shu payt G'ujumoy yana hovliqib kiradi.*)

### G'ujumoy:

— Yuguringlar, yuguring  
Qovunga yordam bering.  
U cho'zilib yotibdi,  
Kimlardir tosh otibdi.

(*Chanoqvoy yugurib ketadi.*)

### Tarvuz:

— Oramizda bor josus,  
Ish ko'rmoqda g'alamis.  
Hasharoqlarga birdak  
Berib kelmoqda ko'mak.  
(*Birdan yig'lab*)

Ey, og'aynim Qovunjon,  
Ishqilib bo'lgin omon!

(*G'ujumoy, Tarvuz, Handalak yugurib chiqib ketishadi.*)

### Qovoqvoy:

(*o'zidan xavotir olib*)

— Kimni deyapti josus?!

Yaxshi emas bunday so'z.  
Menga ishora qilar,  
Balki sirimni bilar.

(*Shu payt Qovoqxola o'g'lini qidirib kelib qoladi.*)

### Qovoqxola:

— Bolajonim, Qovoqvoy,  
Qorning ochdir hoynahoy?  
Poyladim qilmay toqat,  
Yedingmi biror ovqat?  
Oppog'im, nima deysan,



Ayta qol, nima yeysan?  
(*Cho 'ntagini kavlaydi.*)

**Qovoqvoy:**

— Menden olmang xavotir,  
Bo'lmoqdaman betoqat,  
Hozir kerakmas ovqat.  
Bo'lmoqchiman mard, botir.  
Gapning ochig'in aytsam,  
Sehrgar berdi yordam.

(*Bir chetda ularga bilintirmay  
Sehrgar ko'rindi. Uning gapini  
eshitadi.*)

**Qovoqxola:**

— Sehrgaring bo'ldi kim?

**Qovoqvoy:**

(*o'zicha*)

— Ko'p gapirmang, bo'ling jim.  
Terak shoxi bo'lar mo'rt,  
Ikki karra ikki — to'rt.  
Do'sting aytgan gapga ko'n,  
Beshta ikki bo'lar o'n.

(*O'yinda tushadi, oyisi chapak  
chaladi.*)

Ha, ha, beshta ikki bo'lar o'n,  
O'rganvolish ekan jo'n.  
Qilsam badantarbiya  
Yaxshi ishladi miya.

**Qovoqxola:**

— Beshta ikki bo'lar o'n,  
Do'stlar aytgan gapga ko'n.  
Dilim alag'da edi,  
Keta qolayin endi.

**Qovoqvoy:**

— Ketsangiz, keting mayli,  
Eh, Sehrgar tufayli,

Ko'p narsa bilib olay,  
Ish soz bo'lar har qalay.

(*Onasi ketgach Sehrgar  
berkinib turgan joyidan chiqadi.  
Qovoqvoy indamay teskari qarab  
turgan Sehrgarni ko'rib sevinadi.*)

**Qovoqvoy:**

— Sehrgar bobo, salom,  
Kelmaysiz deb batamom,  
Umidimni uzgandim,  
O'zga reja tuzgandim.  
Yashasin! Endi maza!  
Sira bo'lmayman izza.

**Sehrgar:**

— Yasha, Qovoqvoy,  
yasha!

Shartimizga yarasha —  
O'rganibsan astoydil,  
Qoyilman, juda qoyil.

**Qovoqvoy:**

— Mashqni bajardim bir oz.

**Sehrgar:**

— Bu ishing bo'lmabdi soz.  
Harakatdan albatta,  
Kirarding-da g'ayratga  
Yengar eding Tarvuzni.

**Qovoqvoy:**

— Kim aytdi-a bu so'zni?  
Qanday bildingiz, bobo?

**Sehrgar:**

— Buncha so'raysan, obbo.  
Gapga chalg'itma meni,  
Mashqni boshlaymiz qani.

**Qovoqvoy:**

— To'qqiz joyda uch --

Yigirma yetti.

**Sehrgar:**

— Qovunjonga ham

Jarohat yetdi.

**Qovoqvoy:**

— Qoyilman sehringizga.

**Sehrgar:**

— Aytganimni qil takror  
Degan edim necha bor.

**Qovoqvoy:**

— Besh joyda to'qqiz —  
Qirq beshdir, shaksiz.

**Sehrgar:**

— O'nta o'n?

**Qovoqvoy:**

— Bo'lar yuzta.

**Sehrgar:**

— Bo'libsan ancha usta.  
Bekor ishga yugurma.

**Qovoqvoy:**

— Besh karra to'rt — yigirma.

**Sehrgar:**

— Dars o'tamiz kun ora.

Yoz ichida sen zora

O'rgansang karrajadval,

Bo'lmasding sira o'sal.

Ko'p ishing hal bo'lardi,

Do'stlar ko'ngli to'lardi.

Unutmagin sen shuni:

Do'stlaringga har kuni,

Yordam berishdan qochma,

To'g'ri yo'ldan adashma.

(*Sehrgar g'oyib bo'ladi.*)

**Qovoqvoy:**

— Yordam berishdan qochma,

To'g'ri yo'ldan adashma!

Qovoqvoy o'ylang, qani...

(*Sehrgarning ketidan yuguradi.*)

Bir oz to'xtang, arzim bor,

Etay sizni xabardor.

**Sehrgar:**

(*qaytib qolib*)

— Qani gapir, bolakay.

**Qovoqvoy:**

— Quloq soling, men aytay,  
Gapim bor juda qiziq.

Olgan edim topshiriq.

**Sehrgar:**

— Ya'ni bir to'rva urug'?

**Qovoqvoy:**

— Undan sira qolgan yo'q.

Allaqachon yo'qotdim,

Chuqur tomonga otdim,

Shuning uchunmi Tarvuz —

Meni-chi, deydi josus.

**Sehrgar:**

— Bu ishingdan ehtimol,  
Xabari bordir xiyol.

**Qovoqvoy:**

— Shubha qilar bekorga.

**Sehrgar:**

— Xo'p, qani,

ketdik g'orga.

**Qovoqvoy:**

— Mayli, birga boraman,

Beriroyda turaman.

Ular urug'ni so'rар.

**Sehrgar:**

— Yo bo'lmasa yeb qo'yar.

Kimki bo'lsa agar mard



Qo‘ymaydi bunaqa shart.  
Sen go‘yo bahodirsan,  
Hamma ishga qodirsan.  
**Qovoqvoy:**  
(*dadijanib*)  
— Mayli, borganim bo‘lsin,  
Yomon qoni to‘kilsin.  
(*Shaxdam qadam tashlab ketishadi.*)

PARDA

## OLTINCHI KO‘RINISH

(*Ikkinchiko‘rinishdagi O‘rgimchak-kana qarorgohi. O‘rgimchak-kana yuziga to‘r tutib olgan. Huzurida askarlari. Ular o‘yin tushib qo‘shiq aytishmoqda.*)

### Chigirtka:

— Men Chigirtka,  
Chigirtka,

Yemish bo‘lsa chiqitga —  
Chiqarmasdan yegayman,  
Kuchim teng bir yigitga.

### Ko‘sak qurti:

(*jo‘r bo‘lib*)

— Yemish bo‘lsa, chiqitga  
Chiqarmaydi Chigirtka, o...

### Boshqalar:

— Chiqitga-yo, chiqitga-yo,  
chiqitga...

### Ko‘sak qurti:

— Yumalayman gohida,  
O‘rmalayman gohida,

Maza qilib yuraman  
G‘o‘zalarning shoxida.  
Bizlar yashil tusdamiz,  
Yemirishga ustamiz.  
**Boshqalar:**  
— Ustasiz-o, ustasiz-o,  
ustasiz...

(*Shu payt Sehrgar bilan Qovoqvoy sezdirmay kirib kelib ularni kuzatishadi. Birdan qo‘shiq-o‘yin to‘xtaydi.*)

### O‘rgimchakkana:

— To‘xtatinglar o‘yinni,  
Egmaysanlar bo‘yinni.  
Paxtzorda yurdim men,  
G‘o‘zalarni ko‘rdim men.  
Paykal-paykal g‘o‘zalar,  
Ko‘rmagan sira zarar.

### Chigirtka:

— E, e, muhtaram janob,  
Bo‘lmangiz buncha xunob.

### Ko‘sak qurti:

— Topshiriqni ul Qovoq,  
Bajarmayapti biroq.

### O‘rgimchakkana:

— Senlar tekin yeysanlar,  
So‘zni yolg‘on deysanlar.  
Lapashanglar, bo‘shanglar,  
Baring ishdan bo‘sanglar.  
Hammagini bilurman,  
Aytganimni qilurman,  
Har tomonga choplaring,  
Gunohkorni toplaring.

(*Hasharoitlar sekin-asta chiqib ketishadi. Bu gapni eshitgan*



*Qovoqvoy Sehrgarning orqasiga berkinadi.)*

**Sehrgar:**

— Salom, O'rgimchakkana,

Nega xunobsan yana?

**O'rgimchakkana:**

— So'zla,

kim bo'lding o'zing?

G'alatiroq-ku so'zing!

Kirib kelding qayoqdan?

**Sehrgar:**

— Kelganmiz eshik yoqdan.

Aslimni desang agar,

Ertakdag'i sehrgar!

Barchaga yordam bermak

Men uchun sharaf demak.

Kelganimdan, albatta,

Qolmoqdasan hayratda.

Gunohkordan so'ylanding,

Qovoqvoyni o'ylanding.

O'ylaganining tezda man

Paydo eta olaman.

**O'rgimchakkana:**

— Qovoqvoy, yo'q-ku, qani,

Aldayapsanmi mani?

**Sehrgar:**

— Bilsang, uni sehr etib —

Qo'yanman-da, berkitib,

Istasam-chi, bir zumda

Keltiraman izimdan.

*(Sehrgar Qovoqvoyni qidirib topolmaydi. U qochib ketgan bo'ldi.)*

**O'rgimchakkana:**

*(yolg'iz qolib)*

— Sehrgar bo'lsa rostdan  
Topmas edi bexosdan,  
Yordam so'rasammikan?  
To'rga o'rasammikan?  
Qovoqni keltirsa-chi,  
Sehrgardir balki chin.

*(Shu payt Sehrgar Qovoqvoyni yetaklab keladi. U indamay yerga qarab turadi).*

**Sehrgar:**

— Izlaganingiz Qovoq,  
Huzuringizda shu choq!

**O'rgimchakkana:**

— Sehrgar ota, qoyil,  
Men ishondim astoydil.

Sehrgar, ruxsat sizga,

Uni qoldiring bizga.

**Sehrgar:**

— Ko'z oldimda topshiriq —  
Bering, bajarar to'liq.

**O'rgimchakkana:**

— O'rtamizda ko'pdir gap,  
U ketdi bizni aldab.

**Sehrgar:**

— U hali juda so'tak,

Unga kerak

O'rgatmak.

**O'rgimchakkana:**

— Bajarilmadi buyruq,

Nima bo'ldi huv, urug'?

**Qovoqvoy:**

— Yerga ko'mib qo'yuvdim,

So'ng yo'qotib qo'yuvdim,

Topolmayapman sira.

*(Indamay yerga qarab turadi.)*



**Sehrgar:**

— Esi anchayin xira,  
Xatosin tuzatamiz,  
Urug'larni topamiz.

**O'rgimchakkana:**

— Qancha so'rasangiz pul  
Ikki bor to'lay nuqul,  
Menda-chi, boylik katta,  
Sevinasiz albatta.

**Sehrgar:**

— Menga kerak emas haq,  
Bunaqa demang mutloq.

**O'rgimchakkana:**

— Bizning ko'pimiz o'ldik,  
Judayam jondan to'yidik.

**Sehrgar:**

— Attang, bo'lmabdi yaxshi,  
Hammyoq sizga qarshi.

**O'rgimchakkana:**

— Qayga borsak cho'chiymiz,  
Yetmayapti kuchimiz.

**Sehrgar:**

(*Qovoqvoyna yolg'on dakam do'q urib*)

— Va'da berdingmi — bajar!  
Bajarmasang-chi agar,  
Seni derlar betayin.

**O'rgimchakkana:**

— Menga ma'qul gapingiz,  
Tegsa zora nafingiz.

**Sehrgar:**

— Xo'p, mayli, men ketayin  
Urug'larni topaman.  
Qovoq aybin yopaman.  
Men kimga bo'lsam kerak,

Uch bora chalsa chapak,  
O'sha yerda bordirman,  
Xizmatga tayyordirman.

**O'rgimchakkana:**

(*Go'yo hurmat qilganday o'nidan turadi.*)

— Askarlarimga aytay

Sizni topishar atay.

Ularga bering yordam,  
Xursand bo'laman har dam.

**Sehrgar:**

— Shart bo'yicha, albatta,  
Men bo'laman uvatda.

(*Qovoqvoyni yetaklab chiqib ketadi.*)

**PARDA**

**YETTINCHI  
KO'RINISH**

(*Birinchi ko'rinishdagi paxtazorning cheti — uvat. Chigirtka, Ko'sak qurtlari chopib o'tishadi. Sahnaning o'ng tomonidan Oysholg'om, Lavlagijon hamshiralalar sumkasi bilan bir quloch shprisni ko'tarib kelishadi.*)

**Oysholg'om:**

— Tutqizmasdan Chigirtka  
Qochib ketdi, huv chetga.

**Lavlagijon:**

— Biri esa Ko'sak qurt —  
G'o'zani qilar nobud.  
Qo'limga tushsa bormi,  
Yorar edim naq qornin.



**Oysholg‘om:**

— Qovoqvoy bizdan doim  
Qochib yurar.

**Lavlagijon:**

— U balkim,  
Ukol qilar deb o‘ylar.  
Hech kimga aralashmay  
Yordam bermay, qarashmay  
Yolg‘iz — bir o‘zi o‘ynar.

**Oysholg‘om:**

— Adashmay yursa mayli  
Qovoqligi tufayli.

(*Ular chiqib ketishadi. Xomush holda Qovoqvoy kirib keladi, izidan Sehrgar paydo bo‘ladi.*)

**Qovoqvoy:**

— Salom, Sehrgar bobo,  
Qaydan bo‘ldingiz paydo?

**Sehrgar:**

— Ey, Qovoqvoy,  
ishlar ko‘p,

Nima desam, degil xo‘p.  
Ko‘sak qurt, Chigirtkani  
Ushlaymiz endi, qani.  
Mana bu uzun arqon,  
Sirtmoq solamiz chaqqon.

**Qovoqvoy:**

— Sehrgarsiz-ku axir,  
Qila qoling-da sehr.

**Sehrgar:**

— Hasharotlarga balkim,  
O‘tmaydi mening sehrim.  
Qo‘rqma, ikkov ushlaymiz,  
Ko‘ngillarni xushlaymiz.  
Ko‘sak qurt, Chigirtkani

Imlab qo‘ygin men tomon.

Kelib qolsa Chigirtka  
Kesak otgin bir chetga.

**Qovoqvoy:**

(*qo‘rqib*)

— Qarang, bobo, Ko‘sak qurt  
Bitta o‘zi kelmoqda.

**Sehrgar:**

— Sen o‘zingni dadil tut,  
Ushlaymiz yaqinroqda.

(*Bekinadi. Ko‘sak qurti kiradi.*)

**Ko‘sak qurti:**

— Nega qo‘rqmay bir o‘zing —  
O‘tirbsan, Qovoqvoy?  
Chigitrakovoya ko‘zing —  
Tushgandir-a hoynahoy?

**Qovoqvoy:**

— Yaqinda ko‘rdim uni,  
Olib ketdi urug‘ni.  
Seni, kelsa, agarda,  
Tursin dedi shu yerda.

**Ko‘sak qurti:**

(*Bir chetga o‘tiradi.*)  
— Meni quvdi Oysholg‘om,  
Qo‘lga tushsam,  
ishim xom —

bo‘lar edi. O‘lardim.

**Qovoqvoy:**

— Qutular eding balkim.

**Ko‘sak qurti:**

— Qutulish qayda deysan,  
Nayzasin ko‘rganmisan?  
Nega kerak bu arqon?

**Qovoqvoy:**

— Ha, nimalar degansan,



Xo‘p aldagan ekansan.

Seni bog‘layman hozir!

Mendan yegaysan tazir.

(*Qovoqvoy arqonni olib Ko‘sak qurtiga otadi. Olishadilar. Qurt chaqqonlik qilib Qovoqvoyning o‘zini bog‘lay boshlaydi, Qovoqvoy Sehrgarni chaqirolmay qoladi. Birdan Sehrgarning o‘zi paydo bo‘ladi. Uning yordamida Qovoqvoy ozod bo‘lib, ikkovlashib Ko‘sak qurtini bog‘lashadi.*)

**Sehrgar:**

— Yasha,

    Qovoqvoy, qoyil,

Doim bo‘laver dadil.

(*Chigirtkaning qadam tovushlari eshitiladi.*)

**Qovoqvoy:**

— Chigirtka kelayotir.

**Sehrgar:**

— Olma sira xavotir!

(*Ikkalasi bekinishadi. Chigirtka o‘ynab kirib keladi-da, Ko‘sak qurtiga ko‘zi tushadi.*)

**Chigirtka:**

— Bechora Ko‘sak qurti

Rosa sho‘ring quribdi.

(*Arqonni yechmoqchi bo‘lib urinayotganida Qovoqvoy bilan Sehrgar bostirib kirishadi. Uni ham ar-qonning qolgan qismiga bog‘lashadi.*)

**Sehrgar:**

(*Qovoqvoyga*)

— Mahkam qilib bog‘layver,

Bir yaxshilab dodin ber.

**Chigirtka:**

— Sotqin ekansan, Qovoq, Jonni òg‘ritma, ahmoq.

**Qovoqvoy:**

— Endi bo‘lar holing tang, Sehrgar bobo, yashang!

(*Orqasiga qarasa Sehrgar yo‘q. Hayron.*)

**Chigirtka:**

— Xiyonat qilding bizga, Aytamiz shohimizga!

**Ko‘sak qurti:**

— Bizni bo‘shatib yubor!

**Qovoqvoy:**

— Bekor aytibsan, beor.

(*Atrofida aylanib yuradi. Ularning burniga chertadi, qitiqlaydi, rosa kalaka qiladi. Gohida tomoshabinlarga kerilib, maqtanib ham qo‘yadi. Oysholg‘om bilan Lavlagijon nayza o‘qtalgan holda kirishadi. Qovoqvoyning ishini ko‘rib hayratda qolishadi.*)

**Oysholg‘om:**

— Ha, Qovoqvoy, albatta.,

Bizlar qoldik hayratda.

Bu chindan qahramonlik,

Yengilibdi yomonlik.

Ikkovini bog‘labsan,

Mardligingni oqlabsan,

Endi noming har tomon

Bo‘lib ketadi doston.

**Lavlagijon:**

— Bu ishingni hoynahoy,



Ko'rib qolsa Chanoqvoy,  
Rosa qoyil qolardi,  
Seni ham tan olardi.

**Qovoqvoy:**

— Bog'ladim qo'lu-tanin,  
Topish kerak qolganin.

**Lavlagijon:**

— Qani, do'stlar, buni siz,  
Chetga olib chiqing tez.

(*Hasharoitlarni olib chiqib ketishadi.  
Ularning ketidan Qovoqvoy ham  
maqtanib asta katta-katta qadamlar  
tashlab chiqadi. Qovunjon bilan  
Tarovuz kirib keladi.*)

**Tarovuz:**

— Bugun xursandman bugun,  
Og'ayni — naynov Qovun.  
(*Qo'shiq aytadi.*)

Kim ichadi maza suv, maza suv  
Sharbatga boy shundoq u.  
O'zi muzday ichsa kim, ichsa kim,  
Deydi: "Oh, oh maza-ku,

maza-ku",

Ichgan yurar darmonda-  
darmonda,

Ichmaganlar armonda-armonda.

**Dehqon bobo:**

(*Keladi.*)

— Yashavor, o'g'lim Tarovuz,  
Senga tegibdi-da so'z.

**Tarovuz:**

— Dehqon bobo, assalom!  
Sog'aydingizmi tamom?  
Ichib ko'ring — qonasiz,  
Tag'in so'rab qolasiz.

Bu yil hosil juda mo'l,  
Hasharotga hammamiz  
Sirayam bermaymiz yo'l.

**Qovoqvoy:**

(*Shoshib Qovoqvoy kiradi.*)

— Kelmadimi Sehrgar?

(*Hamma unga hayron bo'lib  
qaraydi.*)

**Qovunjon:**

— Sirayam kelgani yo'q,  
Bo'laversin ko'ngling to'q.

**Tarovuz:**

— Maza suvdan bir ozroq  
Ichib ol, do'stim Qovoq —  
Yig'asan es-hushingni,  
Gapirmaysan tushingni.

(*Qovoqvoy Tarovuz uzatgan suvni  
ichadi, ancha o'ziga keladi, atrosga  
olazarak qaraydi.*)

**Qovoqvoy:**

— Assalom,  
Dehqon bobo,

Sog'aydingizmi?

**Dehqon bobo:**

— Obbo,  
Rahmat,  
Qovoqvoy, rahmat!  
O'zi nima harakat?

**Qovoqvoy:**

— Ochig'in aytsam agar...  
Men uchratdim Sehrgar,  
Paxta terimida ham —  
Beradi sizga yordam.

**Qovunjon:**

— O'zi tinchlikmi, Qovoq?



So‘zing hali ham chatoq.

**Qovoqvoy:**

- Karrajadvalni talay
- Qoyil qilib o‘rgatdi.
- O‘rganishda eng qulay
- To‘g‘ri yo‘lni ko‘rsatdi.
- Yolg‘on gapga yugurma,
- Besh joyda to‘rt — yigirma.
- Do‘srlar aytgan gapga ko‘n,
- Beshta ikki bo‘lar o‘n!
- Badantarbiya qilib,
- Kuchga to‘ldim ishqilib.
- Qalay, qoyil qildimmi?
- Hammasini bildimmi?

(*Hamma unga hayron bo‘lib turganida Sehrgar kiyimidagi chol kirib keladi.*)

**Sehrgar:**

- Yetib keldi Sehrgar,
- Yo‘qoldi xavfu xatar.
- Qovoqvoy:**  
(*sevinib, hovliqib*)
- Salom,
- Sehrgar bobo,
- Ishlar juda ham a’lo.
- Endi kulib o‘ynayman.
- Yaxshilikni o‘ylayman.
- Sehrgar bobo, sizga —
- Deyman chin dildan rahmat!
- Men tushdim to‘g‘ri izga,
- Bir iltimos bor faqat:
- Egasiz ko‘p hunarga,
- Mumkin bo‘lsa ularga —
- Sehringizni ko‘rsating,
- Hech kim deyolmaydi g‘ing.

**Sehrgar:**

- To‘g‘rimas bunaqa so‘z
- Tuzalmabsan-da hanuz.
- Tarvuz, qani suvdan ber,
- Peshonadan chiqsin ter.

(*G‘alati tarzda suvdan ichadi. Soqolini artib qo‘yadi.*)

Sog‘misan, do‘stim Qovun,  
Bu yil bo‘libsan uzun.

**Qovunjon:**

- Qalaysan, do‘stim Qovoq?
- Zaryadka qilib bir-bir,
- Oldingilardan hozir
- Bo‘lgandirsan kuchliroq?

**Sehrgar:**

- Gaping to‘g‘ri, Qovunjon,
- Bo‘ldi qo‘rqmas va chaqqon.
- Hasharotni bog‘ladi,
- Do‘srlar ko‘nglin chog‘ladi...

(*Qovoqvoy maqtanibroq turadi. Oysholg‘om, Lavlagijonlar kirib kelishadi.*)

**Oysholg‘om:**

- Sizlarga der assalom!
- Lavlagijon,
- Oysholg‘om.

**Lavlagijon:**

- Chaqirgan ekansizlar,
- Mashinada g‘iz etib,
- Huzuringizga yetib —
- Kelib turibmiz bizlar,
- Kimki so‘rasa yordam,
- Bizlar tayyormiz har dam.

**Dehqon bobo:**

- Juda yaxshi kelibsiz,



O‘z vaqtida kelibsiz.

**Oysholg‘om:**

— Kim u kasal, bilaylik?

Avval ukol qilaylik.

**Tarvuz:**

— Yo‘q,

hammamiz soppa-sog‘.

**Dehqon bobo:**

— Anov Qovoqvoy biroq...

**Lavlagijon:**

— Qovoqvoy chin bahodir,

Bizlar guvohmiz axir.

Botir ekan chinakam.

**Qovoqvoy:**

— Sehrgar berdi yordam.

**Sehrgar:**

— Qovoqvoy hozir durust,

Mardlik qildi ustma-ust

Ochig‘in aytsam senga.

**Qovunjon:**

— U sinfdan-sinfga —

Endi o‘tadi ildam.

**Qovoqvoy:**

— Sehrgar berdi yordam.

(*Hansirab G‘ujumoy kirib keladi.*)

**G‘ujumoy:**

— Yashshamagur Ko‘sak qurt

Paykaldha ekan beburd.

Chiqib qoldi yo‘limdan,

O‘ziyam xo‘p savadim.

Olib qochdi savatim.

Chiqmaganda qo‘limdan...

(*Dehqon boboni ko‘rib qolib, yoniga borib ko‘rishadi.*)

Dehqon bobo, sog‘misiz,

Rosa tashvish tortdik biz.

**Dehqon bobo:**

— Ha, yaxshiman,

G‘ujumoy,

Tinchmi o‘zi hamma joy?

**Tarvuz:**

(*shoshib*)

— Qolgan hasharotlarni,

U yaramas zotlarni,

Kim boradi ushlashga,

Bobomlarni xushlashga?

**Hamma:**

— Biz hammamiz tayyormiz.

**Qovoqvoy:**

(*Sehrgar yoniga borib*)

— Mana, bizlar ham bormiz.

**Dehqon bobo:**

— Boringlar, barakalla,

O‘tmasin qulay palla.

(*Barcha chiqib keta boshlaydi.*

*Sahna bo‘sh qoladi. Ko‘sak qurti va Chigirtka bolasi gochib kirishadi.*)

**Chigirtka bolasi:**

— Zo‘rg‘a qutuldim omon,

Kelishmoqda biz tomon.

(*Tarvuz, Qovunjon, Handalak, G‘ujumoylar bostirib kirib ularni ushlab olishadi.*)

**G‘ujumoy:**

— Dehqon bobo, qaydasiz,

Endi rahmat aytarsiz?

**Dehqon bobo:**

(*kelib*)

— Bu yerdaman, G‘ujumoy,



Hasharotdan barcha joy —  
Tozalandimi endi?

**Tarvuz:**

— Ko'ngillar bir oz tindi.

**Qovunjon:**

— Eng zo'ri qolgan yana.

(*Shu paytda Qovoqvoy O'rgimchak-kanani o'z to'riga o'rav yetaklab keladi.*)

**Qovoqvoy:**

(*g'ururlanib*)

— Mana, O'rgimchakkana!

**Hamma:**

— Yashavor,

                  Qovoq, yasha!

**G'ujumoy:**

— Maqtovlarga yarasha

Botir bo'libsan qoyil.

Kurashibsan astoydil.

(*Arqon bilan bog'langan Chigirtka, Ko'sak qurtini olib kirishadi. Bolalari ularning yoniga boradi. Asir tushgan O'rgimchakkana ham shu yerda.*)

**Dehqon bobo:**

— Chanoqvoy ko'rinxmaydi...

**Qovoqvoy:**

— Yurgandir o'ynab,  
                                    daydib.

**Sehrgar:**

(*kelib*)

— Siz so'ragan Chanoqvoy

Go'yo gijinglagan toy.

Qaydaligin bilaman,

Hozir aytib kelaman.

(*Chiqadi. Boshqalar Qovoqvoyni o'rav, uni maqtay boshlashadi. U keriladi. Uyoqdan-buyoqqa yuradi.*)

— Botirlik qilib rosa

Chanqagandir tomog'ing,

Mana, suvdan ich, maza,  
Bosiladi chanqog'ing.

(*Qovoqvoy suvdan ichadi.*)

**G'ujumoy:**

— Kelmoqda Qovoqxolam.

**Qovoqxola:**

(*Shoshib-pishib kirib keladi.*)

— Muncha quvnoqsan, bolam,  
Qovoqqinam, yolg'izim.

Ham o'g'limsan, ham qizim.

**Qovoqvoy:**

— Doim deysiz shunaqa.

**Qovoqxola:**

— Ketib qolding qayoqqa?

Sendan o'zim o'rgilay,

Ayta qol, nima qilay?

**Qovoqvoy:**

— Doim qildingiz erka,

Yuzim qarardi yerga.

**Qovunjon:**

— Undan olmang xavotir

O'g'lingiz — chin bahodir.

**Qovoqxola:**

— Botirimdan o'rgilay,

O'zim girgitton bo'lay.

(*Erkalab o'padi.*)

**Tarvuz:**

— Qoyil, Qovoqvoy, qoyil.

**Qovoqvoy:**

— Qidirdim-da oy va yil,



So'ng topdim Sehrgarni,  
Hayron qildim senlarni.  
(*Sehrgar oldingi kiyimlarini  
qo'liga olib kirib keladi.*)

**Chanoqvoy:**

— Ishonmayman bu so'zga,  
Ochig'in aytay sizga,  
Oddiy do'stingiz sizning  
Mana menman Chanoqvoy.

**Hamma:**

— Chanoqvoy ekan-ku, voy...  
(*Qalpoq va yasama soqolini  
yechib, o'zining chanoqdan  
bo'lgan qalpog'ini kiyib oladi.  
Qovoqvoyning rangi o'chib, hayron  
bo'lib qoladi. Tarvuz unga darrov  
suv beradi.*)

**Tarvuz:**

— Beshta ikki bo'lar o'n,  
Do'stlar aytgan gapga ko'n!

**Chanoqvoy:**

— Ishonma deb Sehrgarga,  
Aytgan edim necha marta.  
Endi, Qovoq, o'zingdan ko'r,  
Har narsadan do'stlikdir zo'r.

**Qovoqvoy:**

(*o'ziga kelib*)

— Karrajadvalni menga  
O'rgatganing-chun senga —  
Chin dildan deyman rahmat.

**Dehqon bobo:**

— Ha, Qovoqvoy azamat.

**G'ujumoy:**

— Ey, durust-ku bu so'zing,  
Ochilib qopti ko'zing.

**Qovoqvoy:**

— Do'stlar, shum hasharotni  
Zararli, yomon zotni —  
Bog'lagan menmas, biroq —  
Bog'lashgan anov Chanoq.

**Dehqon bobo:**

— Qovoqvoy,  
senga farmon,  
Sen ularni qil gumdon.

(*Qovoqvoy ularni sudrab olib  
chiqadi-da, yana qaytib keladi.*)

**Qovoqvoy:**

— Topshiriqni bajardim,  
Boshqasi bordir balkim?

**Dehqon bobo:**

(*sevinib*)

— Endi tamom hasharot.

**Tarvuz:**

— Kimga tegar mukofot?

(*Hamma bir-biriga qarab qolishadi.  
Qovunjon yugurib chiqib ketadi-da,  
Dehqon boboga qovoq shaklidagi bir  
nimani keltirib beradi.*)

**Dehqon bobo:**

— Qovoqvoyga, albatta,  
Rahmat deymiz, eng katta.

(*Lentani Qovoqvoyning bo'yniga  
osib qo'yadi.*)

Chin botirsan, Qovoqvoy.

**Qovoqvoy:**

— Unga loyiq Chanoqvoy.

(*Lentani bo'ynidan olib Chanoq-  
voyning bo'yniga ilmoqchi bo'ladi.*)

**Dehqon bobo:**

— Unga ham bordir yana.

*(Cho 'ntagidan chanoq nusxa  
medalni olib, uning bo'yniga osib  
qo'yadi.)*

Boshlang, qo'shiq, tantana!

*(Hamma chapak chaladi. Chanoqvoy va Qovoqvoy sahnaning  
oldinrog'iga borishadi. Bir-biri  
bilan quchoqlashib ko'rishadi.  
Qo'shiq boshlanadi.)*

**Hamma:**

— Beshta ikki bo'lar o'n, bo'lar o'n,  
Ishim bo'lsin desang o'ng,  
desang o'ng,  
Laqillama bekorga, bekorga,  
Do'stlar aytgan gapga ko'n,  
gapga ko'n.

*(Dehqon bobo, Chanoqvoy, Taruz  
bilan Qovunjon, Oysholg'om,*

*Lavlagijon, Handalak va boshqalar  
ham sahnadan o'tishadi. G'ujumoy  
o'ynaydi. Qo'shiqning davomi  
eshitiladi.)*

Bog'larda bor, gulg'uncha,  
gulg'uncha,

Qovoqvoy ham birmuncha,  
birmuncha —

Yordam bilan tuzaldi, tuzaldi,  
Xayr, do'stlar, ko'rishguncha,  
ko'rishguncha.

**Qovoqvoy va Chanoqvoy:**

*(Pardanining oldiga chiqishadi.)*


Xayr, do'stlar, ko'rishguncha,  
ko'rishguncha!

Xayr, do'stlar, ko'rishguncha,  
ko'rishguncha.

PARDA


*(Tamom)*


2002-yil



# **TEZDA TOP JAVOB**

**(TOPISHMOQLAR)**





\* \* \*

Juda sevamiz uni,  
Xilma-xildir mazmuni.  
Bo'lmasa ham muallim,  
Bera oladi ta'lim.  
U barchaning ulfati,  
Bo'lar ba'zan surati,  
Qani, o'rtoq, buni top!  
Eslagan der: bu...

(*kitob*)

\* \* \*

O'zi kattakon bino,  
Ishlangan xo'p mustahkam.  
Quruqda yurmas aslo,  
Uchmaydi osmonda ham.  
Faqat suvda suzadi,  
Daryolarda kezadi.  
Qani, do'stlar, bu nima?  
O'zbekcha nomi...

(*kema*)

\* \* \*

Tog'dan tushsa shaldirar,  
Oyna kabi yaltirar.  
O'zi bo'ladi suyuq,  
Sovuqda qattiq-quyuq.  
Issiqdan uchar, qochar,  
Daryoda tez-tez chopar.  
Buni topmoq oson-ku,  
Demak, buning oti...

(*suv*)

\* \* \*

Yurar ko'pincha sekin,  
Payt kelsa, ekar ekin.  
Suv ichar keragida,  
O't yonar yuragida.  
Ho'kiz emas, yer haydar,  
Ko'rganlar rahmat aytar,  
Uning ishi juda zo'r,  
Nomi bo'lsa...

(*traktor*)



\* \* \*

O'zing yursang, yuradi,  
To'xtasang, jim turadi.  
Minsang, uchib ketadi,  
Uzoqlarga eltadi.  
G'ildiragi ketma-ket  
Bu — uchqur...

*(velosiped)*

\* \* \*

Bir yashikcha bor qiziq,  
Beli burmali chiziq.  
Prujinaday cho'zilar,  
Turli ohang tuzilar.  
Bandi bor ikki yoqda,  
Ustasi chalgan chog'da,  
Eshitamiz bearmon,  
Ruscha nomi ham...

*(garmon)*

\* \* \*

Tengdir bo'yi va eni,  
Toza tutadi seni.  
Guli bor bir burchida,  
Bo'lar har o'quvchida,  
Uning joyidir cho'ntak.  
Barcha bilar ehtimol,  
Bilasiz, bu...

*(dastro 'mol)*

\* \* \*

Bug'doyzorda yuradi,  
O'roq emas, o'radi.  
Bolg'asi yo'g'u, yanchar,  
Don yig'ar ancha-ancha.

O'zi misoli kema,  
Xo'sh, bolalar, u nima?  
— Ruxsat bering, aytayin,  
Buning oti...

*(kombayn)*

\* \* \*

Paxtazorga kema kelar,  
Bilasizmi, nima qilar?  
Ustida bor katta qorni,  
Yaxshi ko'rар paxtazorni.  
Paxtalarni ho'plab o'tar,  
Qorni to'yan paytda to'kar.  
Haydovchiga bor xonasi  
Nomi...

*(terim mashinasi)*

\* \* \*

Oldin gul edi nuqul,  
Gul yong'oq bo'ldi butkul.  
Yorilib ketgach yong'oq,  
Yana gul chiqdi oppoq.  
Juda ham lo'ppi o'zi,  
Tagida bor yulduzi.  
Terib uysang tog' bo'lar,  
Urug'idan yog' bo'lar.  
Darrov o'ylang bu haqda,  
Bu-chi, oq oltin —...

*(paxta)*

\* \* \*

Bir narsa bor, xo'p qiziq,  
Nur sochsa, bo'lar issiq.  
Na pilik, na moyi bor,  
Uy shiftida joyi bor.

Yonsa yo‘qdir tutuni,  
Hamma yoqtirar uni.  
U egadir zo‘r kuchga,  
Uning nomi...

(*lampochka*)

\* \* \*

Bordir ikkita pichoq,  
Birga yashashar har choq,  
Qilgan ishlari yaxshi,  
Agar yurishsa qarshi,  
Shundagina ish bitar  
Bichiqchi kiyim bichar.  
Hozir, o‘ylab boqay-chi,  
Oson ekan, bu...

(*qaychi*)

\* \* \*

Bordir qator tishlari,  
Borib-kelib ishlaydi.  
Pichoq emas, qirqadi,  
O‘tin undan qo‘rqadi.  
Ish vaqtida sayraydi,  
Ko‘p ishlarga yaraydi.  
Bilib qo‘ying bir karra,  
Ustaga kerak...

(*arra*)

\* \* \*

Ruchka emas, yozadi,  
Yozaversang, ozadi.  
Har xildir rangi-ro‘yi,  
Bir qarich kelar bo‘yi.  
Fabrikadan chiqqan “cho‘p”,  
Kerak bo‘lar juda ko‘p.

Bilmaysizmi shuni ham?  
Eng tanish so‘z, u...  
(*qalam*)

\* \* \*

Og‘aynijon, senga savol,  
Bordir zarur o‘quv quroq.  
Ko‘chamas, yo‘li tayyor,  
Kitob emas, varag‘i bor.  
Yoziladi so‘zu gaplar,  
Kichiklar ham bilar...

(*dafstar*)

\* \* \*

Berib turgin e’tibor,  
O‘zi buyum, bandi bor.  
Tumshug‘i boru qushmas,  
Qalpog‘i boshdan tushmas.  
Har kuni bizga kerak,  
O‘zing topgin, u...  
(*choynak*)

\* \* \*

Suhbat, ishga shaylanib,  
O‘tiramiz aylanib.  
Bordir to‘rtta oyog‘i,  
Yo‘qdir ko‘zi, qulog‘i.  
Yo‘qdir unda hatto qo‘l,  
Biz o‘tirgan bu...

(*stul*)

\* \* \*

Toping tezroq,  
Beshta o‘rtoq,  
Bo‘yi besh xil,





Ishlar ahil,  
Bir tilakda,  
Bir bilakda.  
— Umi, o'rtoq,  
Beshta...

(*barmoq*)

\* \* \*

Oislarda yotar tuya,  
Yonboshida adir-qiya  
Turolmaydi o'z o'midan,  
Tortib bo'lmas hech burnidan.  
Yasalganday toshdan boshi,  
Qishda oppoq ko'zi-qoshi.  
— Qani-qani yurgin, o'rtoq,  
Sayohatga chorlaydi...

(*tog'*)

\* \* \*

Bo'lka nonday to'rtburchak,  
Qurilishga eng kerak.  
U olovda pishiydi,  
Mashinalar tashiydi.  
Ba'zi bir xil imorat,  
Nuqul shundan iborat.  
— Loyni ishlab uyiшар,  
Qoli pda... quyishar.

(*g'isht*)

\* \* \*

Bordir katta dasturxon,  
Unda olam namoyon.  
Daryolaru o'rmonlar,  
Tog'lar, dashtlar, ummonlar.  
Devorga o'rnatganmiz,

Darsini o'rganganmiz.  
— Bordir kichik-kattasi,  
Dunyoning...

(*xaritasi*)

\* \* \*

Sinfimizning to'rida  
Turadi o'z o'rnida.  
Qora bo'lsa ham yuzi,  
Toza turadi o'zi.  
Yozamiz, o'chiramiz.  
— Ishlatishar yozgani,  
— Sinfdag'i...

(*doskani*)

\* \* \*

Eng yaxshi do'sting,  
Taniysan o'zing.  
Har kun tong-sahar  
Keltirar xabar.  
Ochsang yuzini,  
Aytar so'zini.  
Har kun bir marta  
Kelar...

(*gazeta*)

\* \* \*

Ummon ichra jonli uy,  
Hayratda deysiz, voyvuy...  
Baliqlarni tiriklay —  
Yutar, ishi yirikday.  
Undan fontan otilar,  
Toping, u ne atalar?  
— Kattakon baliq taxlit,  
Nomi qisqa — ulkan...

(*kit*)

\* \* \*

Issiq tandir topishar,  
Devoriga yopishar.  
Ichida qiyma go'shti,  
Pishsa qog'ozday po'sti.  
Laganlarga terishar,  
Mehmonlarga berishar.  
Yeyish maza-da rosa,  
Pishganda issiq...

*(somsa)*

Bor ajoyib fabrika,  
Loyiq tahsin-tabrikka.  
Talay ishchi sig'adi,  
Shirinliklar yig'adi.  
Xizmatchilar-vazirlar,  
Doim gulga g'izillar.  
— Chindan mehnat  
askari  
Aqlli...  
*(asalari)*

\* \* \*

To'rvachada shaldirar,  
Bolg'a,  
toshdan qaltirar.  
O'xshar miya, kallaga,  
Bo'linadi pallaga.  
Mazasi eng ichida,  
Goho o'yinbop juda.  
— Kuz chog'ida kel,  
o'rtoq,

Birga qoqamiz...

*(yong'oq)*

\* \* \*

To'qaylarda o'sadi,  
Qirg'oqlarni to'sadi.  
Naynovgina gavdasi,  
Kovak bo'lar novdasi.  
Yetmasdan bir yoshiga,  
Kokil chiqar boshiga.  
Charchamaymiz chalishdan,  
Nay yasasak...

*(qamishdan)*

O'xshaydi qizil tutga,  
O'xshar yana yoqutga.  
Egatlarni orala,  
Pishganlarin sarala.  
Murabbo pishirishar,  
Non bilan tushirishar.  
Mazali ekan hay-hay,  
— Terib yedik...  
*(qulupnay)*

\* \* \*

Yozda pishar mevadir,  
Ko'p xislatga egadir.  
Barg tagida  
har qachon  
Tizilgan ipsiz marjon.  
Avaylab, asta qoqsang,  
Zab mazadir yeboqsang.  
Liqqa-liqqa,  
liqqa yut  
Pishganida shirin...  
*(tut)*

\* \* \*

Ko'chatini ekishar,  
 Xo'p parvarish etishar.  
 Gulga kirar,  
     ko'karar  
 Yashil yong'oq ko'payar.  
 Pishsa rangi qizarar,  
 Yaltirashi ko'z olar.  
 Ham ovqatdir,  
     ham dori.

— Yashasin...  
 (pamildori)

\* \* \*

Ko'klam gullaydi  
     chaman,  
 Rangi-chi turli-tuman.  
 Pishsa mazadir o'zi,  
 Yuzingga o'xshar yuzi.  
 Yulduz chiqadi kessang,  
 Qarsillar agar yesang.  
 Topishdan chetda qolma,  
 Ajoyib meva...  
 (olma)

\* \* \*

Ozodalik ashysosi,  
 Bordir popuk-hoshyasi.  
 O'zi oppoq  
 Va yumshoq.  
 Yuvinsang-chi yaxshilab,  
 Yuz-qo'ling qo'yari silab.  
 — Gapimni aytay ochiq,  
 Rohatdir yumshoq...  
 (sochiq)

\* \* \*

Olmaga o'xshar  
 Go'yo sariq shar.  
 Hid sochar haryon,  
 Mazasi nordon.  
 Kesib yeyilar.  
 Ezib yeyilar.  
 — Uni topish jo'n,  
 Oltinday...  
 (limon)

\* \* \*

Chiqib olsang gar unga  
 Uchasan chapga-o'ngga.  
 Shamoldayin yeladi,  
 Rosa zavqing keladi.  
 Yayrab deysan:  
     “Hay-yu, hayt!”  
 Endi nomin o'zing ayt!  
 — Kecha bog'da uch  
     o'rtoq,  
 Tinmay uchdik...  
 (arg'imchoq)

\* \* \*

Oyijoni  
 Quloch otgan  
 Poyalarga suyalib.  
 Munchoq ko'zli  
 O'g'il-qizlar  
 Mo'ralashar uyalib.  
 Uzib berayin o'zim  
 Pishgan chog'ida...  
 (uzum)

\* \* \*

O'simlikning asili,  
Bo'ladi turfa xili.  
Qarasang, quvnar ko'zing,  
Misoli kulgan yuzing.  
Sezib xushbo'y hidini,  
Bildik bog'bon didini.  
— Rosa maqtagan bulbul,  
Buncha xushbo'y...

(atirgul)

\* \* \*

Boshida toj, u shoh emas,  
Yalangoyoq, gado emas.  
Sudrab yurar uzun etak,  
Etak rangi atlas demak.  
Bog'da kezar asta-asta,  
Barcha qarar ming havasda.  
— Javob topib qo'ying maxsus,  
Antiqa qushdir...

(tovus)

\* \* \*

U sovuqdan yaralgan,  
Qahratonda taralgan.  
Oynadayin yaltirar,  
Issiqdan-chi qaltirar.  
Qarang, ana, tarnovda  
Yosh to'kmoqda darrovda.  
— Uni tag'in demang tuz,  
Aslida u sovuq...

(muz)

\* \* \*

Har uy, xonada bo'lar,  
U tufayli nur to'lar.

Yuzida goh pardasi,  
Bor erur tuynukchasi.  
Chang-chungga to'latmaydi,  
Sovuqni yo'latmaydi.  
U — xonaning ko'zidir:  
Kimki o'ylab qarasa,  
O'zimizning...

(deraza)

\* \* \*

Ikki og'ayni sherik,  
Birgalikda ish yirik.  
Uchratasiz har xilin,  
Bilar bir-birin tilin.  
Bittasi qolar uyda,  
Boshqasi  
ko'cha-ko'yda.  
Burni o'xshar teshikka,  
Yopishvolgan eshikka.  
Bittasi temir yigit,  
Deyilar qulfu...

(kalit)

\* \* \*

Bordir turli tomoni:  
Ko'pdir foyda, ziyoni.  
Og'zi yo'g'u yamlaydi,  
Oyoqsiz qadamlaydi.  
O'ziga qo'ysang — ofat,  
Jilovlasang-chi, rohat.  
Rangi misli qizilgul,  
Ko'p narsani etar kul.  
Pishirar nonu palov,  
Uning nomidir...

(olov)

\* \* \*

Bandi nozik — oriqdir,  
Avval guli sariqdir.  
Bir qarasang, shardayin,  
Bir boqsang, oq salladay.  
Guli uchsa, shardayin,  
Qolar quruq kalladay.  
Ariq bo'yida nuqlu —  
Ochiladi...

(*qoqigul*)

\* \* \*

Dastasi bor ushlashga,  
U — qulaydir ishlashga.  
Beli mahkam bog'langan,  
Xizmat uchun chog'langan.

Yerga tegar soqoli.

Ozodalik timsoli.


Xoh bu yilgi, bulturgi,  
Zarur buyum...

(*supurgi*)

\* \* \*

Yer tagida tanasi,  
Quyuq yaproq panasi.  
Parvarishdan semirar,  
Goh hasharot kemirar.  
Tayyorlanar shakar, qand,  
Yeganlar bo'lar xursand.  
Yerni asta kavlagin,  
Chiqar undan...

(*lavlagi*)





## MUNDARIJA

5

CHIROY QO'SHAY O'LKAMGA  
(*She'rlar*)

63

CHALAKAM-CHATTILAR  
(*Hajv va hazillar*)

87

ERTAKLARIM, ERTAKLARIM —  
KITOBIMGA YETAKLARIM

149

TEZDA TOP JAVOB  
(*Topishmoqlar*)

*Adabiy-badiiy nashr*

**PO'LAT MO'MIN**

**BOLAJON, BOLAJONIM**

*(She'rilar, ertaklar, topishmoqlar)*

*Muharrir Abdurahmon Akbar*

*Rassom U. Solihov*

*Texnik muharrir Ye. V. Tolochko*

*Musahhiha G. Azizova*

*Kompyuterda teruvchi R. Azizova*

IB № 0950

Bosishga ruxsat etildi 05.02.2004. Bichimi 70x90<sup>1/16</sup>. Tayms garniturası.  
Shartli b.t. 11,7. Nashr b.t. 11,0. 10000 nusxada bosildi.(1-zavod 5000 nusxada).  
Shartnoma № 55-2003. Buyurtma №207. Bahosi kelishilgan narxda.

«Cho'pon» nashriyoti, 700129, Toshkent, Navoiy ko'chasi, 30.

O'zbekiston Matbuot va axborot agentligining Toshkent kitob-jurnal fabrika  
kasida chop etildi. Toshkent, Yunusobod dahasi, Murodov ko'chasi, 1-uy.